

---

---

# 民國叢書

第二編

· 77

歷史·地理類

西北革命史徵稿

陝西革命先烈  
褒恤委員會編

上海書店

---

---

---

陝西革命先烈褒恤委員會編

# 西北革命史徵稿

上卷



本書據1949年版影印

先生勛鑒三十三年

敝會

曾以所印西北革命史徵

初稿送覽並請閱後函示意見良以時往世移年逾一紀整理放失其道彌艱明知脫漏舛謬之處必不在少至非集衆廣思莫衷至是故請於檢閱時隨事指正函告簽定俾得重行易稿期於至當嗣後共計接到來函三十四件糾謬補缺實多定正除已依照來函逐一補入更是茲猶恐尙有遺脫故一面廣徵諸先烈之碑銘行述及私家傳記合併印存以資互證茲以歲月不居延引過久一面就現已是正之本重行付印板本較前微爲精善計分上中下三卷上卷爲記事中卷爲傳記下卷爲附錄所徵誌銘



及最近續輯者附入下卷茲再申敘前意仍請於閱覽時  
見有記載舛誤與事實刺謬者卽祈隨時見教其或情節  
較複一時不易筆舉者亦乞迅賜函告卽當派員面取節  
略載筆從事總期無負已往之先烈不乖當日之史實俾  
得衆情允洽永成信史然後更煩梓人刊爲定本不獨敝  
會不負執筆之責已也茲附上重印西北革命史徵稿一  
部共計上中下三冊卽請檢收示及爲禱專此並頌  
公綏

陝西革命先烈褒卹委員會啓

三十八年二月

## 凡例

一、本書原名西北革命史以二十六年起着手徵集資料中經抗戰人事變遷所得稿件無幾其辛亥首事秦隴復漢軍之文件隻字無存討袁護法之役檔案均存督署直軍入關付之一炬靖國軍之役時間較長其大本營則在三原韓黃之戰成爲灰燼國民二軍之役中原旋師不持片紙以故執筆者羌無根據向非當年從事之人幾等於懸空虛造其所徵到之稿又多罅漏不完往往於一事之本末一人之出處輾轉函問幾經釐定故各先烈傳記有極似簡略者一再期待無法增補不得已於三十三年將既成之稿作三次分印三冊分別送致各方同人請予補正糾繆隨時交來以備輯成定稿其後次第收到來函是正者約三十餘起當即逐一補入但審視全文仍難成爲定稿竊念日月逾邁人事遷移故決就刻下更正之稿再行付印定名曰西北革命史徵稿以俟更有所得再圖鉛墨庶期永成定本

一、西北革命軍事蹟綿歷三十餘年中間包括西北革命歷次戰役方與廣袤數省參與革命人士無慮千百今欲排比事實勒爲專書不惟具有史才史識史學之通才卒不易得即本事材料亦感缺乏茲刊僅就力所能及以存事實未可與一般著述者相提並論

一、書中於死事先烈概從立傳更能得其誌銘墓碑家傳者亦統爲編入藉資互證其

見在之人除敘事時見於文中既不別立專傳

一、三十年來西北革命人士捐軀賣志於疆場者實不止於此數聞見有限搜訪未周其間漏列者應不在少當再從事訪求仍盼閱者如有所見隨時來函提示俾他日重印定本時可以補正

一、本書已經付印尙續有收到之稿如李壽亭樊亮丞李養泉程遠鵬茲一並附入下冊之末全書目錄已在印上冊時先經印出故各篇之目不及列入總目致成脫寫

一、本書共印成上中下三卷上卷爲記事之文中卷均爲傳記下卷爲附錄及諸先烈之墓誌碑銘並續得之文在焉

一、各革命戰役中殉職捐軀者有文職軍佐地方耆紳賓客之從軍者團隊人員於例均得備列其名且其中實多俊偉秀異之材惜乎所得甚少仍乞閱者有所聞知隨時見敘事關史實敬希無吝往復

一、本書徵稿以楊子廉先生費神最多其所徵到之稿亦最夥例得敘出

# 西北革命史徵稿序

褒卹會頃以文來言所爲西北革命史徵稿經十餘年之搜集纂著近始成書急思授梓而苦於經費之無着因備言採訪之艱難綴輯之曠日經時請爲籌撥印資庶免散失之虞不惟任其事者十餘年之辛勩不止虛擲而諸先烈之聲光浩氣與西北三十年來之革命史實亦將永賴以無墜余詳檢全秩則自辛亥以來西北首事諸公以暨數十年來革命之事跡與夫先後死事之國殤舉彌有遺焉雖其間文字之裁量繁簡事實之容有未備體例之或未盡合於史志然信則傳信疑則傳疑舉其所知以求其所不知要爲無害也余喜其條貫清晰一寓目而西北數十年之史實碩然可見因給以印刷之資俾早日付印成書想亦西北人士及有心我國革命史實者所共樂觀也余則猶以爲著錄史志不厭精詳他日若更得求諸故老網羅散失排比精審的然成一西北革命信史佈之通國藏之史藏則又余之所殷望也書既付印來請弁語因書此以誌之中華民國三十八年元月陝西省政府主席董釗識

## 題詞

追憶陝西靖國軍及圍城之役諸事凄然成詠十首

于右任

一

（中呂醉高歌）關前春雨人歌塞上驚沙浪鎖勸君莫唱家山破太華遙開萬朵

二

（前調）禹王廟上風高黃祖陵前樹老長途駐馬鄉人笑留得詩情畫稿

七年山禹門渡河至延安轉三原

三

（前調）當年仗義登壇蒼隼騰巢竟返雲屯牧野繁星爛西北天容照眼

成立總司令部編義師爲五路

四

（前調）死傷誰覆戎衣飢饉翻憐戰壘文人血與勞民淚天下歌呼未已

弔于鶴九李春堂宋相臣樊鍾靈山惠有光諸先生

五

(前調) 幾章民治殘詩幾頁人豪戰史名儒名將兼名士時代光明創始  
弔朱佛光李子逸胡登生彭仲翔柏厚甫周定侯諸先生

六

(前調) 魂招東里心驚路入南仁月冷山河百戰人民病五丈原頭自省  
南仁村爲王勿幕先生殉難處十一年夏歧鳳敗後予由甘肅南下

七

(前調) 貝加湖畔雲開烏拉山前凍解誓師大漠風雲待金鼓東征未改  
由蘇聯至五原入陝

八

(前調) 名城高掛殘暉燕子猶尋故壘兵民負土墳前淚爭祭當年餓鬼  
西安圍城後市民二墳皆負土所成故名曰負土墳

九

(前調) 豐碑爲墓文豪凶歲難安父老秋風忽起咸陽道多少高墳蔓草  
友人欲爲王陸一立碑予以年荒阻之

十

(前調) 自由之戰經年革命成功尙遠太平樂府人間遍呼喚中華運轉

## 著 論

中國國民革命之興起其成爲此時期之社會主要思潮與發動此革命之主要力量者南北地區各有其因素而共同三民主義建國及建設新世界之大道邁進在珠江流域省分值太平天國革命運動失敗之後流風墜烈猶影響於民間雖金田旗鼓已銷歇於頑梗之衣冠而嶺海吏傷仍指點爲沉默之傳說外則帝國主義之侵略使人民生活情狀起絕大之變革其由農村經濟破壞迫而遠涉海外者或則盡應諸殖民地之殘虐或則憧憬於民主之治或則深察遠想知社會存伏之危機民生困窮鬥爭必起生產形式已至窮則必變之時凡此原因必將鑄鍊爲主張創造成時勢

總理應運挺生所倡導之主義所決定之革命策略其爲歷史使命與地理環境之真實曠時代而不容疑者也至於黃河流域民族之意識故國之眷瞻二百餘年來遺民孤忠長在天壤空山零雨以經術相傳授梓保志行並研究水利農田貯儲墾牧諸學爲經世之用而不沾滌於當世功名北方之學所用精微翔實者蓋義理之審辨深則吏變之周防護生民之利病切則庶政之設想不廢且異族之重政下非復明夷待訪之年而今日之山河非皇漢興漢之舊今日之文物非先民締造之遺人民憔悴呻吟厚焉向盡勢已絕不可久又自英法聯軍及八國聯軍進犯以來彼專制政府對外則失地喪師馴順受命對內則驕頑壓迫益絕人民之生機而爲國家求自救自立之絕大障礙當是之時舍革命之外無他途北方人民益發奮起矣雷霆奮發南北相應故其時雖主義之傳導未週行動之紀律未一而咸知此事之不容已即亦各忠其所知各盡其所安各就一地方之力從事革命所謂先爲天下作驅除仁者見其仁智者見其智此亦革命必有之經歷也主義之推行與成就非有此經過不爲功夫革命固爲一科學之事而當其爆發之初智力之不齊人事之不臧顧未嘗深思密計往往悉凌厲動亂之能事以出之若其反於科學條理者其實此種腐莽衝突現象蓄之既久實反映社會內情之不安認舊現狀既毋須保持即大破壞不暇抉擇止革命所以必發生之故也在大破壞中隨而發現何者仍當保留何者且當建設之新條理然後革命行動與其力量乃漸麗於革命主義之所要求斯亦仍合於科學之觀察也革命發生後一切事態發展在不斷進步中亦不斷使革命之領導歸於充實革命爲無前例之事其策略亦隨時勢而推移此革命大業中之甘苦吾人苟非欲倖炫天功固當黯黯回憶承認此事實也故中國革命發生並發展於若干不同之地區方法形式諸不盡同而惟主義之趨向有歷史之命定有時代之指示信仰無殊目的共赴以卒底於成功之域故殊不能以方域之見只認革命之一巨流而泯却發生革命之全面意義其形勢較細客觀條件較艱苦之他一地區凡其事之所能至皆其力之所已盡志士仁人之苦鬥犧牲尺寸寸天之殫精區畫山川受隔風氣罕聞然成其爲革命策源地在整個革命運動中之效獻固炳然長在也前事不忘所貴乎史無闕文抑一切不獲已之事實不可再之教訓不必要之殘傷不忍諱之闕憾以檢討革命事業之用心比事而屬辭知人而論世則知成敗之迹相需相應之效有以明作始之簡而將畢之巨造端乎一方而同功乎天下

今日去辛亥革命已三十年始欲敘此經過爲他日史事之徵故首當申言此項工作之意義夫關係國家民族之一大事與若干人生命心力之所注自辛亥而討袁護國護法尤以陝西靖國軍之展現爲西北革命同志乃至全北方革命同志死生患難之所經營以一隅之地當六省之兵歷五年之久岷嶓之山黃河之水百戰千戰萬人一人安可使光滅景絕顧大風鄉里寂然咸當時經制軍政建樹文物規模燦然不以危迫在時最爲辛苦之籌爲在今日見開創之謨則斯更不能不及時續載也吾人固謂陝西爲中國西北乃至全北方革命之策源地亦北方革命同志集獻心力之地遠應天南共荷神聖之使命事且可徵又惟求信載筆之始謹述論云

# 西北革命史徵稿目次

敘言

目次

題詞

大事記

辛亥革命紀事

二次革命紀事

討袁護國之役紀事

靖國軍革命紀事

首都革命紀事

圍城紀事

先烈紀傳

西北革命史徵引用書目



西北革命官佐死事表

西北革命士兵陣亡表

西北革命在事有勞表

附錄 陝西革命先烈褒卹會經過及組織

# 西北革命史徵稿（上卷）

## 西北革命大事記

民元前七年乙巳（清光緒二十一年）秋井勿幕歸自日本以同盟會員開始運動西北革命

民元前六年丙午（清光緒二十二年）春同盟會黨人井勿幕鄒子良等三十餘人在三原招開全體會議決定徵收會員及推進會務各方法并鄒諸人旋赴北山各縣規劃於耀縣創設畜牧場派人於宜君馬欄及黃龍山各地查勘鉄礦並爲黨人聯合秘密機關

是時清廷議築西潼鉄路由官方借外資辦理陝西在籍職官張拜雲吳寶三等聯合地方紳商上書郵傳部爭之請由當地募股改歸商辦清廷不許

民元前五年丁未（清光緒二十三年）蒲城教育分會會長兼高小學堂教員常自新等進行革命謀洩爲縣令李體仁拘捕刑訊學生原斯僊死於杖下激起全省各學堂

### 罷課風潮

民元前四年戊申（清光緒三十四年）張拜雲李仲特焦子靜王子端等十餘人發起於西安設立健本學堂

張拜雲焦子靜合股開設公益書局及公益印字館於西安購運印刷革命書報刊物並爲黨人祕密集會機關

郭希仁王銘丹賀紱之等數十人於西安組織麗澤館聲鐸社公開演說啓發民智鄒子良在省城西嶽廟設女子小學皆爲革命祕密機關

是年陝西同盟分會成立公推李仲特爲會長九月重陽日井勿幕郭希仁柏筱餘高又明焦子靜吳希真及方外吳虛白等二十餘人託事分赴北山各地會於中部公祭黃帝陵爲文誓墓

民元前三年己酉（清宣統元年）陝西新軍混成協成立錢定三張翔初張靖清張伯英諸人先後回陝服務新軍開始運動軍界同志及哥老會黨人加入革命團體張伯英等自新諸人於省城南院門設一武學研究社爲軍界革命同志祕密集會地點陝西省諮議局成立郭希仁被推副議長同志如李仲特井崧生柏筱餘等皆爲議紳

民元前二年庚戌（清宣統二年）三月井勿幕第三次回陝召集黨人在涇陽柏氏花園開會報告東南各省革命情形並擬自西北發難計畫決議實行聯合會黨共同進行議定後勿幕與郭希仁焦子靜鄒子良諸人遂在城南大雁塔開會哥老會黨徒遂有正式加入者

是年六月初三日井勿幕錢定三張伯英党自新張聚庭鄒子良胡景翼李仲三等與哥老會首領張雲山萬炳南王榮鎮等三十餘人開聯席會議於大雁塔歃血爲盟共圖大舉於是西北革命三大主流（同盟會軍學各界暨哥老會黨）乃彙爲一

是年冬郭希仁等以諮議局名義公揭新軍督練公所總辦王統江罪狀於北京資政院劾之去職西北人士之在軍中者始得依資遷升任用漸握實權

民元前一年辛亥（清宣統三年）九月初一日陝西新軍舉義光復西安外縣各地黨人豪傑及哥老會黨徒紛起響應

初五日陝西軍政府成立衆推張鳳翔任大統領錢定三萬炳南同任副統領

初八日山西新軍黨人閻錫山等光復太原

十二日駐華陰廟巡防統領胡明貴率部反正光復潼關

十三日清軍攻潼關胡明貴與戰死之

十四日錢定三率衆百餘東行至渭南遇害

十九日新疆伊犁新軍全部反正光復伊犁

二十一日張伯英率衆克復潼關

十月初一日清吏升允前部甘軍攻我長武

初五日張伯英率衆出潼關與清軍相持於靈寶間

十七日張雲山率衆敗升允軍於長武

十九日張伯英再戰清軍於盤豆鎮不勝退守華陰

二十二日陝軍大統領張鳳翔率衆東援廿六日誓師於華陰二十七日進攻潼關不克

二十六日西路民軍與升允軍戰於長武冉店橋大敗向字營全營覆沒我軍退守乾州

二十九日張鳳翔張伯英以五路之師攻潼關敵軍不支連夜退出潼關

三十日我軍第二次收復潼關

十一月九日清軍攻陷娘子關晉民軍分南北兩路退却

十一日陝北路招討安撫使井勿幕東路節度使陳柏生率衆渡河光復運城與晉民軍

之南來者李岐山等會合援晉

十五日張鳳翽張雲山馬玉貴等分兵三路與升允軍大戰於乾州北原

二十一日張伯英率衆復東進至觀音堂澠池一帶

同日陝軍副統領萬炳南與升允軍崔正午部戰於鳳翔不利退守岐山

二十二日敢死軍統領曹印侯大敗甘軍於鳳翔西之柳林舖

二十三日北路招討使第一標統帶胡景翼敗升允軍於三水張戶原

十二月初二日東路民軍陳樹發李仲三等與清軍戰於牛頭原七里店各地均大敗張伯英退保雒南潼關復失

二十六日東路民軍派代表赴潼關與清軍議和二十八日雙方代表會於泉店簽定停戰條約東路戰事平

民國元年壬子舊曆正月初一日清升允軍陸洪濤部陷醴泉進逼咸陽

初六日吳世昌吳善卿等敗清軍於咸陽

初十日吳善卿率衆攻醴泉中伏陣亡

十三日陳柏生派兵攻醴泉標統嚴飛龍先登歿於陣

十八日乾州守軍張雲山與升允軍馬安良部局部議和

十九日陝民軍請牛夢周張曉山諸先生赴醴泉十八里舖見升允勸令罷兵息民雙方定立議和條約並約以二十四日與民軍諸人會於興平至期不果升允於是日卽引兵西去西路戰事結束

三月十一日甘肅道員黃鉞據秦州反正

是年秋陝革命黨人井勿幕胡景翼宋向辰曹印侯等皆出國留學

二年癸丑春郭希仁辭國會參議院議員出遊歐洲

是年秋二次革命起陝黨人鄒子良馬開臣被殺

三年甲寅春陝都督張鳳翽被免職入京陸建章督陝改稱將軍陝軍被裁汰幾盡

四年乙卯陝晉各革命黨人均星散

是年冬郭希仁歸自歐洲講學華下共學園陝甘晉豫各地黨人皆歸之

五年丙辰春郭希仁避難赴山西趙城夏六月景梅九被逮檻送京師黨人李秋軒等欲劫奪之不得

三月陝黨人王紹文張深如等數十人密組討袁軍謀洩被逮同日就義者十八人時稱

## 十八烈士

陝黨人郭堅曹世英等起兵討袁自韓鄧入北山渭北各地黨人多起而應之

五月胡景翼繼陸建章之師於高平擒陸子承武

六月陝軍第四混成旅旅長陳樹藩改稱護國軍建章乞降離陝薦陳繼任陝西督軍

七月續桐溪馮欽哉馬青苑等數十人率衆渡河北伐敗於榮河武志文岳維岐死之

六年丁巳夏復辟事作陝黨人宋相臣樊靈山郭堅等率千餘人渡河北伐至猗氏爲晉軍所敗宋樊皆死焉郭堅棄軍逃歸

十月十九日焦子靜高峻據白水獨立稱護法軍陳樹藩以兵攻之

二十六日陝警備軍統領耿直使人刺陳樹藩於督署不中以兵攻之戰於長安城中者三日旋敗退西行郭堅自鳳翔以兵來援會於岐山遂揭靖國軍幟以討陳

陳樹藩攻耿直於岐山戰於城下八日耿郭等旋棄岐山東行與高峻軍合入白水據之

十二月十三日夜張義安殲陳樹藩軍於三原

十四日黎明耿直率衆襲蒲城不克死之



十五日胡景翼曹世英同至三原共組靖國軍

二十日胡曹兩軍大敗陳樹藩軍於三原城外

二十六日靖國軍左翼軍曹世英進據高陵冒合郭堅軍渡河進攻省城

二十八日東路郭曹各軍與陳樹藩軍戰於壩橋草灘一帶

二十九日靖國軍右翼軍張義安進佔省垣西關外大營盤

七年戊午舊曆正月初一日張義安進佔西關陸軍學校旋退出

初十日張義安與陳樹藩軍戰於小雁塔

是時陝北盧占魁率衆數千至三原加入靖國軍

十九日張義安破陳樹藩軍樊鍾秀部於省西南甘家寨鍾秀使人約降義安許之越日

鍾秀率餘部改樹靖國軍幟東行由藍田入商維據之

二十二日張義安進佔小雁塔攻省城旋奉胡景翼命退屯鄠縣

二十七日張義安與陳樹藩軍及鎮高軍戰於鄠縣追敵陣亡右翼軍撤歸涇原

二月二十一日靖國軍東路郭堅攻同州不克退據羌白鎮

是月陳樹藩軍鎮高軍自渭南渡河欲攻高陵以威脅三原靖國軍胡曹各部與戰於

相橋關山一帶旬餘日敵軍退去

三月郭堅所部與陳樹藩軍戰於羌白盧占魁以騎兵援郭樹藩軍退

四月初郭堅在羌白再被樹藩軍圍攻幾兩月城內食盡遂退出北佔蒲城興市鎮

六月郭堅率衆西行克復乾縣岐山扶風武功郿縣

是月于右任由滬歸陝各軍共推爲靖國軍總司令張伯英爲副總司令改編靖國軍爲六路

七月靖國軍第二路司令樊鍾秀率部出臨潼欲通渭北軍不得西行攻鄠縣亦不克轉據盩厔終南鎮

高峻收復郿陽楊彪收復韓城

八月十四日靖國軍第四路司令胡景翼入固市陷敵被挾入西安

九月十六日靖國軍第一路司令郭堅收復汧陽隴縣進佔寶雞

是月滇軍第八軍軍長葉荃率部由四川經甘邊援陝至隴縣鳳翔守軍約降

十月初三日靖國軍副總司令張伯英及第一路司令郭堅暨滇軍司令葉荃先後入鳳翔樊鍾秀部亦收復盩厔

是月也井勿幕自省城歸三原衆推爲靖國軍總指揮

十一月靖國軍總指揮井勿幕赴鳳翔晤滇軍葉荃開軍事會議

十九日井勿幕歸自鳳翔至興平南仁村爲郭堅部將李東材所害

是時直奉晉甘鄂五省軍隊同時入關援陳樹藩除鄂軍在安康外晉軍渡河陷韓城甘軍佔邠長麟遊直軍佔渭南奉軍西至武功攻扶風岐山皆與靖國軍接

十二月二十日靖國軍第四路董振五馮子明李虎臣各部奉令援西路與奉軍戰於扶風武功間董振五中彈陣亡

八年己未陰正月直奉鎮嵩各軍及陳樹藩軍東西分八路向靖國軍各路作總攻擊鎮嵩軍陷整屋郿縣靖國軍第二路樊鍾秀退鳳翔陳樹藩軍圍乾縣五閱月奉軍陷岐山郭堅取消靖國軍與奉軍妥協惟直軍攻交口相橋陳樹藩東路軍各部攻興市及施家鎮皆不得逞

三月南北停戰議和北政府派張瑞璣南方派續桐溪來陝劃界至四月杪和議停頓陳樹藩增兵攻乾縣益急乾縣守軍王珏食盡退出歸三原改編爲靖國軍第七路

九年庚申夏六月胡景翼自省城歸三原被推繼井勿幕爲靖國軍總指揮

是年大旱靖國軍乃就渭北各縣籌賑濟修學校興水利開始調查涇陽吊兒嘴工程焉

十年辛酉春滇軍回四川靖國軍第六路盧占魁率部隨之西行至廣元部衆潰散第二路樊鍾秀復循商雒至南陽靖國軍副總司令張伯英隨同東去  
夏六月直軍閻相文入關逐陳樹藩而代之陳軍餘部盡歸胡景翼

八月靖國軍第一路司令郭堅入省被殺所部李奪麻振武等復稱靖國軍

十月胡景翼取消靖國軍總司令于右任先期避居東里堡靖國軍三四兩路皆受直軍編制

十一年壬戌春靖國軍第三路支隊司令楊應（後改虎城）使人迎于總司令西行設總司令部於鳳翔並於武功設行營焉

直奉戰起直軍東援胡景翼曹世英皆率所部出關于總司令親督楊應部與直軍之留興平者戰不利楊部北走榆林李麻等部亦敗退鳳翔劉鎮華繼馮玉祥爲陝西督軍派人敦請于總司令于拒之自鳳翔西行經隴右入四川至重慶沿江達於上海焉  
四月胡景翼曹世英率部助馮玉祥敗趙倜兵於鄭州下開封豫局底定

十二年癸亥胡景翼駐順德彰德練兵勦匪

十三年甲子九月胡景翼遣李仲三等密聯馮玉祥孫岳決計討曹吳

十月二十二日胡景翼會馮玉祥於北苑會合各部隊發動首都革命是夜馮部鹿鍾麟

首入北京囚曹錕

二十三日首都反正胡馮孫諸人會於南苑共組國民革命軍通電討賊

十一月一日國民一二兩軍大敗吳佩孚軍於楊村落堡間二軍旅長李紀才生擒吳部

師長潘鴻鈞吳部悉潰佩孚由海道南遁

十三日胡景翼受命督辦河南軍務

二十四日胡景翼率部南下大敗吳軍於彰德道口清化間

十二月十一日胡景翼至鄭州宣佈就河南軍務督辦職

十二日胡景翼至開封吳部田維勤陳文釗王爲蔚各部皆來降

十四年一月國民一二三軍聯名發電並派使請迎 孫總理北上主持大計 總理允

之旋啓節北行至天津而病

三月十二日 孫總理逝世於北京協和醫院

四月朔國民二軍大破劉鎮華及憨玉琨之師於豫西河南平

十日胡景翼疾卒河南軍務督辦任遺命以岳維峻繼

七月孫岳督辦陝西軍務李雲龍爲幫辦率部收復西安楊虎城亦率部自榆林南下收復西路各縣楊部旋隸國民三軍陝西平

十一月岳維峻會孫傳芳於徐州議攻奉魯

十二月國民二軍北路司令鄧寶珊收復平漢路旋與國民三軍合攻天津下之孫岳改任直隸軍務督辦鄧寶珊爲幫辦李雲龍繼任陝西督辦

國民二軍東路總司令李紀才率師攻魯克曹州兗州前鋒及泰安而降將田維勤靳雲鶚等叛李紀才退歸開封

岳維峻使田玉潔爲援軍總司令率部東援與魯軍張宗昌部戰於兗州曲阜間不勝諸軍遂退開封

國民軍總司令馮玉祥棄軍赴俄遊學張之江代統其衆

十五年乙丑一月岳維峻棄開封西行至陝州爲劉鎮華餘部所阻諸軍食盡潰二月岳維峻棄師渡河遂暫留晉中諸將李雲龍田玉潔等皆由間道回陝

國民軍師長蔣世傑守信陽吳佩孚攻之相持三月食盡遂言和

三月劉鎮華率衆入潼關李雲龍部退守西安

國民一軍全部自北京退南口奉軍來攻與戰不勝退綏遠包頭一帶國民二軍一部隨之西行

四月劉鎮華前部攻西安

十六日楊虎城率部自三原入西安與李雲龍共守西安

二十日劉鎮華圍西安

六月劉鎮華別部攻三原

八月麻振武率衆攻富平旋與劉鎮華合兵圍三原

是月蒲城陝軍團長綏天相鄭百川殺其旅長綏保傑抗劉鎮華保傑者故陝軍李天佐部後歸劉鎮華數年至此復與劉鎮華通款故天相等殺之

九月十五日于右任馮玉祥自俄經內蒙歸抵五原各部公推馮爲國民聯軍總司令全軍加入國民黨十九日在五原誓師

十月國民一軍孫良臣率師自平涼東下援陝

## 十二日三原圍解

二十日于右仁自平涼至三原成立二三聯軍臨時總司令部

十一月中旬國民一軍大敗劉鎮華兵於咸陽西安間之猴兒寨二十七日復戰於西安東南西北兩面敵均敗退

## 二十八日西安圍解

十六年丙寅馮玉祥入西安取消一二三軍名義統編各軍爲國民聯軍推于右仁爲聯軍駐陝總司令

三月岳維峻歸自山西擴編舊部爲國民聯軍南路軍

六月西北國民聯軍改編爲國民革命軍第二集團軍由馮玉祥率領參加北伐第十路楊虎城部隨同出關

七月北伐軍會師中原于右仁解聯軍駐陝總司令職南赴武漢參加組織國民政府九月馮部師長宋哲元攻涇陽三原國民聯軍第十一路田玉潔通電去職舊國民二軍各部殘餘之留陝者皆受宋哲元編

十七年丁卯三月國民聯軍第八路李雲龍聯合建國豫軍樊鍾秀自商維反馮不克所



部敗散同時樊軍亦敗於信陽鍾秀被炸死

六月宋哲元攻党玉琨於鳳翔玉琨敗死西北國民軍至是遂盡無復存者矣

# 辛亥革命紀事

自甲午庚子兩戰役後國人深知滿清政府之腐敗專制不足代表國家與並世文明各國相頡頏我總理孫中山先生乘時首出創立同盟會於日本東京號召同志大倡革命排滿之說於是賢哲宏識英銳有志之士同受革命學說之洗禮奔走聯絡大事運動革命書報如總理小傳鈇券民報回天手段諸書輸入內地輾轉傳閱感動激發民族革命思想益深滲入於青年學生暨各階層人士之腦髓心靈當時西北人士首先加盟者直隸有張繼杜義諸人山西有谷仲言王蔭藩榮福桐榮炳景梅九朱炳麟燕斌景耀月諸人陝西有康寶忠于右任井勿幕鄒子良曹雨亭趙世鈺諸人最初谷仲言任山西同盟分會會長景梅九任評議長康寶忠任陝西同盟分會會長趙世鈺任評議長彼等更另設一明明社專介紹西北各省人士入會凡入會者先經明明社審查後始介紹之民國紀元前六年（清光緒三十二年）于右任爲創辦神州日報東渡向留日學界募股秦隴晉豫四省學生協會爲集款二千數百元以助之卽明明社號召之力顧此皆留學界在外初以文化鼓吹革命之事而各省內地聞風興起作爲事實之倡導預備者

更有人但因極端祕密各就同志者或五七人或十餘人自相聯合各爲單位晉豫各省當日情形未見載記事多不彰其在陝省各地者紳學界如郭希仁曹印侯賀紱之焦子靜李仲特李桐軒張拜雲吳寶三張東白尙天德王子端常銘卿井崧生柏筱餘高又明陳會亭師子敬董雨麓劉介夫寇勝浮鄒子良馬開臣任師竹巖文軒吳希真張仲良李仲三曹俊夫王治平宋向辰樊靈山胡定伯張立卿嚴敬齋王一山李襄初胡景翼軍界如張翺初錢定三彭仲祥党自新張聚庭張靖清陳柏生張伯英曹健安張仲仁馬彥若朱敘五凡百餘人或膺軍隊要職或爲林泉退吏或在野名流或承學士子或任學堂教授或聯各地游俠或密置武器或廣佈新聞其跡似各不相謀其心則彼此互照及井勿幕銜命歸陝統一組織然後衆流匯合羣情一致而各地青年志士益復風起雲從如春草之怒茁如初潮之澎湃由是運動新軍結連會黨磅礴怒磨礪以須矣

哥老會本故明遺老所創以反抗滿清恢復明朝爲宗旨者也其組織詳密規律謹嚴清代二百餘年其黨徒遍布全國中下各層社會成一有體系之潛在力量號召之力倍於恆人萬千其黨徒魁桀如張雲山萬炳南諸人夙多淵跡軍伍我革命黨人因得密與聯絡於是西北革命勢力由新舊各派合流爲一及武漢義旗一舉而三秦關輔遂於

九月一日首先響應數日之間繫清吏破滿城掃除二百六十餘年之糴腥濁穢光復漢物樹立西北革命基礎與東南各省革命志士呼吸噉應同建中華民國共和大業顧關隴當日僻在西北距東南各省寫遠其發難也驟其爲勢也孤雖光復之舉收功崇朝而清軍之抗義者於西則有清吏升允率甘回各軍由蘭州平涼建瓴而下直逼乾州鳳翔於東則有豫軍毅軍各營自靈陝以進薄潼關我三秦革命軍以新造單弱之衆當前後夾攻之敵分頭迎戰搏鬥數月外而援應阻絕音耗鮮通內而餉械無源血肉相薄擲頭顧忍飢寒饜兵廣原之上忍死圍城之中氣壯河華則風雲變色血殷隴坂則日月奪光較諸漢陽龜山之役金陵雨花之戰其慘激壯烈有過之而無不及焉又況夫當日始事諸人排衆議犯危難置身家性命一切於不顧而獨致力於排滿革命其間有死於疆場死於囹圄死於敵死於職死於道路流亡死於憂勞疾病彼其人唯知忠於國家民族不暇有功利成敗之念故能臨危授命義不反顧充其志氣之激發南山可礪黃河可帶白骨可成灰碧血可成塵而精神終不可屈撓迨後共和甫建賢智者流首先引退或杜門却掃或解兵求學意謂光復既成自當冠裳櫛俎從容謀議以求所謂長久治安之道志不復用兵革顧未幾而大盜竊國軍閥亂政各地黨人忠義奮發在總理領導之下攘

袂投箸再接再厲百折不回遂相繼而有二次革命及討袁護國護法靖國與夫首都革命西安圍城諸役迄於北伐勝利國民政府統一成功而止

由前言之則辛亥以前爲因而辛亥爲果由後言之則辛亥爲因而後次諸役爲果事本一貫途非多歧地非一隅人非一省實皆懸一革命建國之共同鵠的奉總理三民主義以爲周旋趨而赴之毫無猶豫者也夫豈囿於一隅哉

（一）辛亥以前祕密運動情形

民國紀元前七年乙巳（清光緒三十一年）同盟會於日本東京成立井勿幕時在日本首先加盟未幾卽帶孫總理之救國主張及宣言回陝其宣傳方法先由親友而至於多數關心國事之人最先贊成者西安爲郭希仁常銘卿王子端焦子靜李桐軒諸人渭北有三原宏道學堂教員廣東謝墉及同州師範學堂教員湖北李某此後勿幕徧歷渭北各縣及西安等地歷時不足一年獲有各學堂學生七八人及社會各階層同情同志者如鄒子良柏筱餘高又明胡定伯王守身馬開臣王一山等僅三十餘人耳默察情勢一刻似無大的發展卽欲仍赴外省聯絡同人因根基未定且保皇黨勢力在陝日漸膨脹均不贊同勿幕遠去勿幕乃緩其行旋於翌年春間在三原北極宮某宅招開

一全體曾議研究徵收會員及推進會務方法有主張急進多收會員者有主張縝密緩進者最後決定縝密緩進並於介紹同志時另訂一種方法不致新會員一步踏入堂奧蓋勿幕意在擴大範圍欲結連向有實力之三合會及各地刀俠而一般同志多係士人深以若輩行爲不檢難與爲伍力反對之勿幕又以籌款等事親赴北山宜君中部一帶視察每至一地均有同志數人同行乃擇定於耀縣境內山區地帶創一畜牧場於馬欄山及黃龍山各地查勘鉄礦出鄒子良主守身諸人分頭負責興辦併與一般工農聯絡逾年丁未勿幕始赴四川轉東南各省與黃克強朱貴金諸人連絡

當勿幕初次回陝運動時高又明介紹一僧人吳虛白吳蓋三合會中人也由吳又介紹洪寶臣唐相尙二人皆慕親會中領袖也慕親會者相傳爲明末遺老傳青主李二曲諸人所創慕親二字暗寓懷念明朝之意二百餘年一般漢族人士經滿清政府威脅利誘意志銷沈而方外之人獨相傳保守不失渭北各地鄉人嘗有傳言清家（清家即指滿清朝庭鄉人土語）得之易失之易意謂滿清入主中國得之甚易則將來失之亦必易也又曰吳請吳送意謂清兵入關由吳三桂請來將來亦必有姓吳之人驅之使去也此種話頭流傳甚久直至光緒末年猶有鄉老談及此與辛亥以前之宣統二年半所

在駐防消諸謠傳遙爲應和若合符節大抵皆由三合慕親等會在有意無意之間展轉傳說用以詛清室之覆亡者亦可見西北各地民族觀念之堅韌潛伏而方外雜流中亦實大有人在也一日諸人會晤於西安勿幕曰吾今欲作一事人材缺乏又無錢欲罷之又不能責任在身可奈何吳卽應曰那只有通而變否則兵無糧而自散況無兵乎神道設教古之道也精神專一則動靜合用矣勿幕深以爲然又稔知孫黃初提倡革命時亦嘗聯合洪門致公堂三點會諸團體乃決與哥老會黨取聯絡由少數同志先向同盟會諸同人詳言利害請其贊同此種主張並聯軍界同志暨各地刀俠及慕親等會經數月之久始克奏效乃共擬一新名義曰同盟堂自此西北祕密組織有所謂山水香堂者卽通統山同盟堂梁山水桃源香各黨會聯合一致之隱語也（按清末陝省大吏深慮各地革命黨人潛伏暴動乃於扼要地點設兵嚴防西安四城門樓及鐘樓均駐有重兵以戒備火警爲名榜其名曰消防駐在所黨人新進者不免仍有戒心會中乃造爲某菩薩降乩俚語云不必怕不必怕四門兵牌先念下蓋以消防駐在所五字從下倒念爲所在駐防消係佛告人滿清八旗駐防之兵卽將消滅藉以壯黨人之氣也又傳云國窮造銀圓內中把銅摻中間一盤龍光緒鎖邊邊若問江山事去他娘的三十三則借清廷發行

光緒龍洋形式加以指斥者又云用算不用算宣統二年半又清宣統帝名溥儀登極後凡文字中例應避諱而各縣衙署二門向皆名爲儀門因改儀爲宜儀宣二字本同音古且通用故也然宜與泥字亦同音遂相傳謂宣統皇帝自泥其門覆亡之先兆也凡此者皆當日黨人所編造謂之放風）

民元前六年丙午（清光緒三十二年）清庭倡修西潼鐵路議借外資由官府辦理蒲城張拜雲朝邑吳寶三等皆以在籍職官聯合當地士紳上書郵傳部爭之請由陝西當地紳商募股興修改歸商辦清庭不許但准加入商股一半定爲官商合辦由是各界人士知清庭別有用意不能開誠信民非實行革命不足救亡復興始以文化運動爲入手方法又以官立各學堂限制綦嚴監視又極嚴密學生言行稍一不慎立予開除乃與焦子靜李桐軒王子端等十餘人就省垣富平會館創設健本學堂一所招收各縣有志青年學生不限資格藉以培養革命人材拜雲又與焦子靜諸人合資開設公益書局於西安延師子敬爲總經理子敬者富平人嘗在蒲城縣署戶房供職與井崧生勿幕及其他同盟會中諸人皆同志往還甚密者也由是祕密購運革命書籍散布流傳並購置印刷機器一套添設公益印字館印刷書報宣傳革命思想言論而鄒子良此時亦由日



本歸於省城西嶽廟創辦女子小學同時郭希仁王銘丹賀紱之曹印侯劉藹如諸人別倡麗澤館聲鐸社到處演說號爲開通民智實皆黨人聚會之祕密機關也

此時黨人聯合尙極祕密或三五人爲一組織或五七人結一團體其互相問訊時則任指一物如茶壺茶盞之類問曰此物那裏來的如係黨人則必應之曰此係中國的彼此卽相視以目不言而喻又或遇友人相訪主人先出其手作欲與之握手狀如係同志者卽還手對握暗以指尖上屈主人亦還指下屈互鉤之亦莞爾目成否則客或誤作普通握手指不上屈卽知爲門外漢矣其他密語暗號尙多不能悉舉謹就各人所設祕密機關列如下

西 安

公益書局 張拜雲焦子靜所設師子敬主之

健本學堂 焦子靜李桐軒等所設王子端主之

麗澤館 郭希仁賀紱之諸人主之

聲鐸社 王銘丹等主之

西嶽廟女子小學 鄒子良主之

馬家善書舖

馬開臣主之

西大街公正紙店

井勿幕西安寄居之所

三原

勤公社

柏筱餘張立卿紀時若王治平等所設以運銷新書及教育用品爲名者

同州

中學堂

亦一祕密機關尙天德寇勝浮李秀等主之

涇陽

柏氏花園

柏筱餘高又明主之

耀州

廟灣畜牧場

樊靈山胡定伯諸人主之

宜君

馬欄山鉄礦

王守身等主之

其他富平之有紀子文胡笠僧劉溪庵乾縣之有吳希真醴泉之有羅少鴻扶風之有張仲良涇陽之有高季維白水之有曹俊甫渭南之有嚴敬齋潼關之有李仲三又皆

無固定地點或與二三同學同志隨時隨地集合祕密進行革命工作者也

此外尙有四川謝持在寶鷄山中組設一農林畜牧試驗場以提倡實業爲名黨人中亦有與通往來者但其組織內容及動向均不得而知

勿幕既採用慕親會組織方法故於每次開會時儀式均極嚴肅高供神位如儀行禮又於神位傍添祀關壯繆岳武穆兩神牌關取其義氣千秋岳取其撻伐異族也致祭時均有誓文自此以後黨人日益衆又與新軍諸同志及哥老會黨均作初步聯絡因在大雁塔開一祕密會議多數主張暫時不宜主張平均地權以免引起一般人之誤會決議改爲土地國有並議用黃帝紀元公推郭希仁張翊初撰一祭黃帝陵祭文並訂於九月初間同人齊集中部公祭黃帝陵重陽日各地到者有四川七人廣東一人山西甘肅二三人陝西十六人共計二十餘人其中十餘人係扮作商人往北山一帶收買野牲皮者焦子靜則由按察司衙門請得公文一角帶拓字匠數人均係同志冒充僞言摹拓黃陵碑文送上憲者柏筱餘高又明則託巡警道張藻寫一介紹信云係赴北山各地攷察煤礦畜牧者勿幕與郭希仁等五人則由官方友人作函介紹於中部耀州淳化各縣令謂係赴延長考察石油礦者吳虛白等亦假遊方爲詞以故行蹤詭祕毫無聲各人既會

合卽於事前詳密安置有總管司二人內巡司一人外巡司一人各負全責以防意外致祭諱祝文時諸人情不自禁有嗚咽流涕者有高聲大哭者若喪考妣與祭之人無不墮淚吳希真年最幼而天真祭後兩日飲食皆不欲進諸人乃深感到文字動人不若儀式之有形有色深刻有效回西安後遂公同研商就慕親會方式加以改良爲推進會務之基本辦法故亦有稱爲追遠會者茲錄其祭文於後

維黃帝紀元四千六百〇五年九月重陽日玄曾孫某某等謹以鮮花清酒牲肴之儀敬獻於我皇祖軒轅黃帝之墓前而泣告曰惟我黃祖承天御世鍾奇孕靈乃聖乃神允允武舉修六府章明百物翦蚩尤於涿鹿戰炎帝於阪泉揮斥八埏疆理萬國用是奠基中夏綏服九州聲教覃敷訖於四海凡有血氣莫不尊親自是以後聖子神孫世世相承堯舜以禪讓緝熙湯武以征誅定亂泊乎秦皇漢武明祖唐宗皆能仰承遺緒奮厥聲威鎮撫百蠻光宅九土其間偶逢衰替暫遭綱維穢醜跳梁蠻夷猾夏然皆歷時未幾旋伏厥辜棄彼氍毹襲我冠服我民族屢蹶再振既仆復興卒能重整金甌澄清玉宇者莫非我皇祖在天之靈有以默相而佑啓之也迨至前明甲申之歲國運陵遲建州虜夷乘我喪亂驅其胡騎入我燕京竊據我神器變亂我衣冠侵佔我

版圖奴役我民衆神州到處徧染腥羶文化同胞備受壓迫難擬令下雖聖裔猶莫逃旗兵駐防徧禹跡而皆滿又無論揚州十日嘉定三屠二百年之慘痛猶存十八省之奇恥未湔已也且近年以來歐美民族對我環伺各欲嚮割大好河山而滿清政府恣其荒淫不恤國恥殷憂之士義憤填膺近有執義職而起者粵東如陸皓東鄭士良孫逸仙湘越如馬福益黃克強湖南如唐常才均矢志盟大力圖恢復某等生逢艱鉅何敢後人乃集合同志密籌方略誓共驅除縫虜光復故物掃除專制政權建立共和國體共赴國難艱鉅不辭決不自私利祿決不陷害同人本衆志成城之古訓建九世復讎之義師伏望我皇祖在天之靈鑒此愚衷威神扶佑以紓生民之苦以復漢族之業某等不自量力竭誠奉告不勝惶愧煎灼鬱結悲禱之至尙饗

自井勿幕歸陝運動首從蒲城開始進行後蒲城各階層人士加盟最早人數亦最多尤多激進份子民元前六年丙午（清光緒三十二年）各縣已奉清庭命令盡改舊日書院爲高等小學堂隔歲戊申（清光緒二十四年）黨人李桐軒陳會亭常銘卿等同任蒲城小學堂教員並組織教育分會（先一年省垣已成立教育總會）公推常銘卿爲會長楊鶴鳴爲副會長常川住會者有庶務員常仙洲書記員雷季陽演說員寇孝

庭劉芳初評議員井崧生原振之劉荃生諸人明倡天足興學戒煙息訟諸事密結草澤豪俠進行革命工作謀先由渭北發難誘致省軍出城乘機在西安起事是年九月初一日縣城關帝廟酬神演戲教育會同人在會場演說勸導婦女放足語涉滿漢種族問題有人從旁非議與在場學生爭論衝突一二頑舊紳士以學堂學生不守學規與人打架爲詞稟報縣署縣令李體仁卽以原稟送學堂傳閱常陳二教員引咎辭職學生挽留不得全體搬入北街關帝廟組設自治公學以爲抵抗李令遂使人持封條將學堂封閉教育會以責任攸關未能坐視卽於是日重陽之夜祕密開會決議暗殺勸學總董兼巡警總辦張某先解散官紳團體是夜井崧生潛伏巡警局外雷季陽率領學生十餘人衝入局內則見燈火輝煌當地痞棍多人正在聚賭見衆闖入誤認爲抓賭者登時紛紛亂竄季陽遂將巡丁四人及賭具拿獲由會具文解送縣署請求嚴懲李令覆一照會反謂教育會越權誣賭着將領事之人送署詳察同人大憤覆文辯駁遂與李令水火李令見同人之勢不相下也爲先發制人計以教育會鼓動學生圖謀不軌爲詞通稟撫按藩司各衙門奉批嚴拿查辦九月二十二日下午李令親率三班衙役分頭包圍學生及教育會立將會長雷季陽等搜出會內搜出總理小傳民報諸書復親至北廟公學學生代表雷

宗誠出見李令揚手便打被雷推開諸生見李滿面兇煞知無善意衆聲一齊喝打上前將李所乘官轎打碎李益怒喉令差役繃擁入內亂打亂抓諸生各執神廟木棍與之抵抗銳不可當差役多人皆帶傷復從外登屋瓦石亂下最後學生寡不敵衆盡被鎖拿至縣署李令高坐堂皇嚴刑拷供竟一日夜學生原斯健斃於杖下諸人皆忍死無言恣其毒掠無屈服者陳會亭等適於是日因事他出得免聞訊後星夜馳赴省垣報告省教育總會出與當道交涉並向省垣及外縣各學堂分頭呼籲激動全省學堂罷課風潮清吏見民氣激昂又恐據實奏報反干朝旨處分張拜雲乘機進言大府謂宜和平了結當道乃撤李令體仁職始已

民元前四年戊申（清光緒三十四年）井勿幕二次由日本回國道出北京適晉省黨人景梅九因與魯省黨人商震等在青島創辦震旦公學擬聯絡青島船廠工人同盟罷工爲德人偵悉下令逐客梅九先期入京與勿幕遇因導游山西至太原召集當地黨員討論起事方略衆以陝西民性強悍地勢雄峻可爲西北各省革命根據地決定秦晉聯合發動計劃勿幕歸陝後旋介紹梅九爲西安高等學堂教習藉以交通軍政各界是時同志日衆乃多設支會及通訊機關於各外縣又因去歲蒲案發生時教育分會所

存之同志加盟誓書（卽孫總理所手訂之人盟誓書）幾爲李體仁搜去乃與同人決議棄而不用由梅九另撰四言密語爲約章曰祕露死決接交寧缺分途並進破壞建設共同遵守自此黨人組織益加嚴密

民元前二年己酉（清宣統元年）陝西諮議局成立衆推王錫侯爲議長郭希仁爲副議長李仲特井崧生柏筱餘諸人均爲議紳由是黨人在諮議局內又有祕密組織且更得一公開議政之機會並得與軍政各界人士交通刺探清吏政治内幕踰年庚戌（清宣統二年）遂藉諮議之力量劾罷新軍督辦士毓江使之離陝

民元前一年庚戌（清宣統二年）三月井勿幕由滬歸陝言東南各同志以歷年舉事失敗之由非但謀畫未周亦因東南交通便利清吏消息靈通事機每易敗露欲改從西北着手比較穩妥乃召集各黨人在涇陽柏氏花園開會到會者有柏筱餘宋相臣樊毓秀鄒子良高又明王守身謝墉韋協度羅少鴻張仲良劉芬雷爾清高季維任傑劉溪庵孫激海吳盧曰洪寶臣等十餘人知其事而未克與會者郭希仁李桐軒焦子靜錢定三張翊初馬開臣等均仕西安鄒子良則在宜君馬欄山張奚若則往來西安與上海之間李季直因在上海主持克復報社吳希真因事在杭州劉子往來四川西安均未及



趕到此次會議對於重新分配各黨人工作及簡化手續積極進行均有重大決議未幾郭希仁焦子靜鄒子良李襄初王子端王一山馬彥舛等十餘人復開會於城南大雁塔規劃革命進行方法由是西安與渭北兩處分途進入發動階段矣

是年六月初三日同盟會黨人與哥老會首領復開聯席祕密會議於大雁塔到場者爲井勿幕張伯英錢定三胡笠僧鄒子良李仲山張聚庭馬開臣党自新張仲仁張雲山萬炳南王榮鎮陳樹發朱福勝馬玉貴馬福祥劉世傑郭金鏞陳殿卿劉剛才朱漢張玉成曹健安郭勝清張建有陳素子吳世昌李漢章陳得貴朱敍五劉仲明李長蘭邱彥彪薛建侯王克明等二十餘人號三十六弟兄歃血爲盟共圖大舉

自清光緒三十年陝西始有常備軍之設立大府分派各縣募良家子弟數千人初編六營仿日本式新操教授及練習體操天橋木馬浪橋阻欄等技是爲新式軍隊之始嗣後每年添募一營增至六營此時人民風氣尙極閉塞子弟當兵視爲畏途各縣地方官苟圖塞責亦不認真考核名爲選募實則授意鄉甲覓雇無業貧民頂替充數由是各地不農不工游食無賴之徒皆舊集於營伍之中然猶未慣嚴格訓練也哥老會黨人向視軍伍爲溷跡亡命之藪澤軌法牟利敷衍營規皆其慣技藉機頂名應叩輾轉緣附

故營哨官除由上司派充尙勉循資格外他如什長伍長以下品類龐雜皆不堪問迨至宣統二年陸續改編爲陝西陸軍混成協共計步兵兩標六營騎兵一營炮兵一營獨立連憲兵連暨工程輜重兵各一連旅團營長均由外省軍界調補初無本省人士及張翔初張靖清諸人畢業日本士官張伯英錢定三黨自新諸人畢業保定陸軍各學校先後奉派回陝循資入伍見習分任委員隊長班長及司務長各職於是中下級軍官始有本籍客籍之分而基礎仍未固也顧錢定三張聚庭諸人卽於是時拉攏會黨諸人與之狎習不拘形跡因得各吐曲衷引爲同志錢黨張諸人初在省城南院門組織一武學研究社藉售軍事書籍爲名實一祕密集會機關又於滿城內設分社一處藉以探察旗營消息此外如西關某茶館王榮鎮家盧慧卿家又皆軍界同志隨時集會之地點至於哥老會黨向皆自有其組織山堂碼頭徧布各地不可勝舉

是時有所謂督練公所者實總軍事之成其總辦爲道員王毓江陝撫恩壽之私人也政以賄成氣餒甚盛新進同志皆沈滯於下僚末級大爲革命進行障礙彭仲翔張聚庭馬彥若等聯絡軍界三十餘人揭王罪狀數十款於撫院請求查辦恩壽置之不理適是年有舉貢考職之事陳惠享馬彥若皆赴京仲翔遂與偕行至京控王於陸軍部同時

郭希仁李仲特諸人復援諮議局章程據仲翔等請願事件達恩王罪狀於資政院乃得撤王督練公所總辦職及其同黨十餘人而以毛致堂徐梅生代之毛徐二人反王所爲與陝人取聯絡於是張翔初始以督練公所一等委員晉升協司令參軍尋改參謀兼二標一營管帶張靖清擢二標教練官兼第三營管帶彭仲翔調升督練公所二等科員錢定三張仲仁党自新陳柏生曹健安劉伯明張伯英張季芳范篤生張虎臣諸人皆以次遷調爲隊官排長翔初任參謀後復查出王統江之黨羽幣寶多端斥退若干人由是西北人士在軍界者始大佔勢力加入革命團體者亦日益多旣而恩壽亦引病辭職藩司錢能訓護理巡撫篆事革命進行至此已無多障礙黨會之間亦日趨融洽作進一步之準備待時而動矣

關中游俠之風遠始於秦之統一六國遷天下豪傑聚於咸陽若輩旣無所事事惟以財力門第氣節相尙傳至後世流爲風氣漢代如朱家郭解季布陳遵之徒龍門史記傳載綦詳唐時所謂五陵少年新豐裘馬詩人每稱其豪秦俗本稱强悍復經此種漸染薰陶其風遂徧於民間昔稱鄠杜馮翊今則蒲富臨渭同朝韓鄒二華涇原同耀乾醴莫不各有其俗顧其人則分兩派一派爲良民卽世家子弟之不好讀書習文事者日以挽

強策肥飛鷹走狗相矜尙而一般農家子弟之駟駿者亦恆於耨耨之餘練習拳術技擊投師訪友抑強扶弱以自表異於衆此其人雖皆蔑視政府官而亦不爲越理犯分之事一派爲莠民卽所謂刀客也其初亦皆農村丁壯而天性傲惰不肯勤務本業或由家庭失教或因生計無資或交友不慎或受人欺侮於是買一利刃挾之游行亦自有其朋類招呼往來煙朋賭友爲其生活窟宅雖不輕忤良懦好人良懦好人亦不敢與之相近惟彼同類之間甲地與乙地甲羣與乙羣睚眦微嫌利益衝突引起爭端結成仇怨糾衆械鬥時有所聞間有恃強橫行詐財傷人之事地方官吏簽差查拿緩之尙可使其遠避急之則反遭其拒抗謂之游俠固不可謂之綠林亦不類社會一般人因名之曰刀客前者以義氣相矜尙本可以革命號召後者以悍鷙爲精神亦可憑藉其力量同人知其然也各就所在分頭結納開示其途轍化除其私見革命幹部遂得充實此亦西北民性養之有素者也

先是朝邑有王獅子者以私運鹽茶貨物往來晉陝之間抗捐漏稅雄於一方招養各地亡命之徒黨羽甚衆駐華陰巡防隊以計誘而捕殺之其徒嚴孝全（後改名飛龍）代長其曹清吏偵捕甚急孝全深匿之不出非其徒黨不與外人相接黨人李仲三變

儒服爲江湖游俠裝（清季走江湖者夏天多著短衫青綢褲大辮盤繞於項腰繫白洋布大帶麻鞋縛腿藏匕首其中人一望而卽知其非普通農商也）自西安徒步至新邑訪得其徒之在獄者深與交結詢悉孝全所在地並其面貌迄不得見逾時復往過於縣屬之北柿子村徑前通姓名孝全疑爲巡緝隊之偵已者使其徒縛而鞭之既絕復蘇者再嚴錮之二十餘日其徒時持利刃於其側磨之霍霍謂不吐實情且斷其足仲三百端解說疑終不釋仲三之再往也道經同州中學堂與寇勝浮尙天德約（寇任中學堂教務尙爲校長）逾十日不還則必有他變蓋固知其爲虎穴也至期果不返勝浮乃親至朝邑覓得其親信者使達於孝全告以確係同盟會中人始釋而禮待之居數日將別孝全曰他日苟有事者吾屬敬以二千人聽命矣故其後井勿幕河東之役下蓮城與毅軍血戰於靈寶閬鄉間嚴飛龍一軍獨稱勁旅以上皆辛亥事前祕密運動之最著者也

## （二）發動時期

辛亥（清宣統三年）秋八月武昌起義之前西安卽有謠言四起有謂八月初旬陸軍將校及各校學生將圖謀不軌者有謂八月十五將盡殺滿人者清吏卽加意防備及武昌警報至清吏大恐對於新軍之有革命嫌疑者議悉移駐邊遠州縣以圖分散其

勢力西安將軍文瑞連日調撥旂兵分守四城及滿城各門並定日在舊皇城演操又傳護撫錢能訓謂已悉黨人多名行將逮捕並統制郵電機關不發表外來消息新軍第一標第三隊將校錢定三與同志謀曰我輩早晚他移時不可失遂以九月八日爲期由新軍首先發難各地應之顧新軍諸同志平日稱服張翔初之穩健有謀略欲推爲首領而翔初適於是時率全營赴臨潼打野操三十日始歸諸人告以密謀時期翔初慨然曰昨聞移駐之令已下一二兩標各隊均定九月三日起行時限已迫安能待至初八日諸君苟皆同心者立即舉義可也衆意遂決立於夜半在大操場集合會議進行方法翌晨九時復同至數里外之林家墳開臨時會議公推翔初爲臨時大統領錢定三爲參贊一切部署悉定回營立時出發張聚庭帶數十人改換便裝暗藏槍枝散布城內城門附近爲接應張伯英陳柏生党自新朱敘五余永寬郭錦鏞各帶馬步兵十餘人託言入城領子藥由南門入分兩路直趨東羊市軍裝局錢定三張仲仁帶百餘人由西門入首至西關陸軍學堂收其槍械陸軍學生即起而應之隨衆入城翔初與劉伯明隨後整隊入城由西大街穿過爲各部隊接應曹健安亦率馬隊百餘人由南門入市人但見軍隊紛紛入城與往日有異而猶不知爲何事各部隊均秋毫無犯各照原定計劃分頭疾進所過之

處但囑商人閉戶而已張伯英諸人甫至軍裝局門外守兵卽逃散隨將軍裝局佔領曹健安佔領東門大差市端履門錢定三佔鐘鼓樓張雲山萬炳南分佔南院及藩司衙門駐南院之撫標綠營初欲出而抵抗雲山使人曉以大義而止旋即歸誠井崧生劉潤民李仲三李襄初馬青苑湯有光賈祿貴諸人旋詣鼓樓見錢定三定三撥五十餘人率之往北教場奪取官馬歸遂劫威寧縣獄率領諸囚至軍裝局發給槍械準備作戰終日之間槍鳴數響而已至哺時人民乃知革命之事

新軍入城之初除奪取軍裝局外僅佔領東南西三門滿城及北門尙爲滿清旂兵扼守是日午後城東南隅忽發現旂兵數百來奪軍裝局翔初與伯英率衆登陴擊却之旋即連夜佈置分派隊伍於五鼓進攻滿城至初二日巳正不能入翔初伯英督衆由南面排牆而進張雲山萬炳南率部自西面向北門進攻北門敵樓內所藏火藥被焚起火滿兵傷死者甚衆餘皆越城外逃滿城始克西安全城至是悉歸黨軍掌握西北革命事業遂取得第一步之勝利

### (三) 始義情形

新軍入城之始僅注全力於軍事且發難倉卒亦未預擬文告是日午後始命人至

諮議局報知郭希仁李仲特諸人同至軍裝局共議宣布文告此時軍事尙無名義東南各省消息又不靈通惟聞道路相傳湖北義軍用湘鄂豫復漢軍名義乃仿其意稱秦隴復漢軍刊製木質關防出示告諭民衆倉卒之際窘於設詞希仁援筆立書十六字曰各省起義驅逐滿人上應天命下順人心衆皆服其敏捷簡當旋又補充數語曰宗旨正大第一保民第二保商第三保外人漢回人等一視同仁特此曉諭其各放心至第三日又出四言布告云諭爾商民各安本分若有土匪搶劫奸淫派隊巡緝立斬不容

省垣既發難風聲所播外縣同志及各地豪傑紛起響應胡笠僧胡定伯諸人於耀州藥王山首豎義旗曹俊甫糾衆入白水縣城殺清吏岳西峯舉事於蒲城均稱復漢軍郭堅聚衆數百人稱馮翊軍同官姚振乾逐同官縣令華陰馬耀羣藍田楊茹林皆聚集當地豪俠同時並起駐華陰廟巡防馬隊胡明貴亦入潼關驅逐滿清官吏據城反正而哥老會黨徒之在外縣者一經號召遽起尤多如黃青雲之在長安余成龍王悅欽之在藍田劉松山牛春山之在商州黃金山之在臨潼陳坤山之在三原王悅德之在涇陽向紫山之在富平王金山之在興平崔丁海之在大荔一時泉湧風發如銅山西崩洛鐘東應關中四十餘縣數日之間莫不義旗高揭矣



當初一日黨軍之入城也省諮議局適於是日開會護理巡撫錢能訓西安將軍文瑞暨各司道均在場及槍聲作會散各官吏皆倉皇竄匿滿城破後文瑞失蹤或云投井死錢能訓於初六日經人搜獲初七日又搜獲按察司楊桐巡警道張藻提學使余堃諸人先後解送總部拘留省垣人心始大定

#### (四)軍政建置

滿城既克諸同人旋於初三日就軍裝局集合組織臨時機關分理各項事務首組總司令部設參謀軍需會計三部推楊西堂王偉齋主會計席子厚惠春派軍軍需郭希仁王子端常銘卿任參謀楊開甲編各學堂學生爲巡警隊維持市面宋相臣林卽卿辦外交保護外僑王錫侯張衡玉組織民政府馬圖生安諭回民南雪亭經管站郵政政張俊卿買東園管理電報局劉楚材管理郵政局王一山點收藩署暨藩庫檔卷底冊嚴敬齋梁成甫收管提學使署卷宗帳簿程島三保管古物陳列所曹引之保管石油工藝兩廠發售處鄭春享保管西倉張某保管東倉移檄各州縣申明革命宗旨並派旅省學生分赴各外縣提倡鄉團防匪衛民西安城關各坊巷亦令設團自衛使焦子靜井崧生李襄初分赴渭北各縣督辦民團招募游俠任李仲三爲東路招撫使收編嚴飛龍部衆張

王成爲西路招撫使張仲仁爲南路宣慰安撫招討使并勿幕爲北路宣慰安撫招討使曹健安爲西路節度使陳柏生爲東路籌餉使復改爲節度使諸事規模於是粗定

初四日各將領聚會於軍裝局三層樓之小屋中議定起義諸人位號張翔初首辭臨時大統領職經衆固留並表示一致服從旋提議舉副統領衆皆推錢定三會黨中人見乎詞更有推某某爲兵馬元帥者有爭執任某都督者意見橫生感情幾至破裂張雲山尤擴張軍實獨樹異幟勢不相下郭希仁乃邀彼黨中之明大義者相與譬解百端並曉以晚近中外大勢暨古今英雄已往事跡幾經調停始獲定議仍推張翔初爲大統領錢定三萬炳南爲副統領張雲山爲調遣步馬砲工輜各標營隊總都督吳世昌副之劉世傑爲軍令大都督郭勝清副之馬玉貴爲總理糧餉兼管軍務大都督馬福祥副之並決定以張伯英爲東路征討大都督行營設潼關張雲山爲西路征討右翼大都督行營設乾州萬炳南爲西路征討左翼大都督行營設鳳翔錢定三見會黨諸人識量淺薄徒知爭名位而昧於大計乃請於翔初謂急宜出兵東向收復潼關以防清軍來攻並自請行張伯英郭希仁諸人均趨其議委定三爲東路安撫招討使即日出兵由是各黨意見

稍釋號令乃歸一致茲列其組織如下

秦龍復漢軍大統領張翔初

副大統領錢定三

副大統領萬炳南

軍政府高等顧問郭希仁

祕書長茹卓亭

祕書常銘卿

祕書李子逸

參謀長彭仲翔

軍政司長党自新

軍需司長惠春波

糧餉司長張聚庭

民政司長楊開甲

教育司長張聚庭

兵馬大都督張雲山

副都督吳世昌

糧餉大都督馬玉貴

副都督馬福祥

軍令大都督劉世傑

副都督郭勝清

東路征討大都督張伯英

西路征討右翼大都督萬炳南

副都督吳世昌

西路征討左翼大都督張雲山

西路招撫使張玉成

副招撫使任宏發

東路節度使陳柏生

西路節度使曹建安

西北革命史徵稿

上卷

南路宣慰安撫招討使張仲仁


北路宣慰安撫招討使井勿幕


敢死軍統領曹印侯

湖北敢死軍旅長王振海

按此表中有數人其名義有隨後改任者有陸續新編者均不在此數日之內爲免繁雜計併列於此

軍事組織既定內務猶繁因復擴大總部組織初設軍令民政兩府及參謀處三部旋合併民政府參謀處爲總務府綜理軍民各事內分參政參議兩處及祕書廳銓敘局並改軍令府爲軍政部專理軍務自是政務亦均就緒茲列當時政務組織如左





外交部	部長	宋相臣
外交部	副部長	
教育部	部長	曹雨亭
教育部	副部長	
實業部	部長	張聚庭
實業部	副部長	張西軒
司法部	部長	王藻泉
司法部	副部長	黨松年
交通部	部長	錢陶之
交通部	副部長	南雪亭
	副部長	樊靈山

按此表諸人與當時情事亦稍有出入係據此次訪得材料填列

(五) 戰守紀要

自省垣光復之信聞於各外州縣地方官吏多半效順惟潼關潼商道瑞清及駐防

協台某因係滿人據城抗命並分向晉豫兩省請兵來援及初八日太原反正晉軍中道折回獨豫軍西進而潼關已有胡明貴十二日反正之舉豫軍於十三日抵潼關胡明貴率衆拒之戰於東原寡不敵衆兵敗身殉潼關遂失

錢定三率衆東守潼關十四日行至渭南遇難（詳情見定三傳中）後復命張伯英東出至臨潼遇嚴紀鵬自以誤害定三惴惴不安來省請罪願以所部效命前驅立功自贖遂令王榮鎮率之隨同伯英東援潼關伯英又於沿途招納藍田湯姑林臨潼曹印侯各部衆比至渭南軍勢大振而潼關已陷遂進至華陰以未悉敵軍衆寡暫未交鋒並派人星夜至省請增援兵十九日張翔初親率陳殿卿一營自省赴援張雲山又調鄧占雲一營循南山出右側方井勿幕亦率所部自渭北沿河東下出左側方三路夾兵尚未到達伯英卽於二十一日冒雨督戰開始攻敵連戰兩日直薄城下嚴紀鵬之衆均負阻持白刃奮勇先登鄉民緣西南原聚觀者數萬人呼聲震動如雷豫軍大懼棄城潰退我軍遂收復潼關是役也二營管帶李長勝陣亡

潼關收復後伯英意在以攻爲守率衆東出十月初五日至蜀鄉繼出函谷與敵相持靈寶間而趙倜率毅軍六營兵精器利雲湧而來十九日敵我兩軍戰於盤豆鎮我軍



多係新招之衆未習戰爭更因收復潼關後將士未得休息致多不服調遣一經接火進退自由各不相顧旋即四散狂奔退過華陰幾乎不能收隊二十一日潼關遂復陷於殺軍是役我軍死者有督隊官戴凌雲偵探隊長李芝恆

省垣既聞東路敗信張翔初親率衛隊數百人於二十二日黎明出發兼程前進是晚即到華州與伯英集合各營隊重整旗鼓二十四日復進駐華陰王榮鎮陳殿卿謝彩臣劉俊生陳樹發亦各相繼率隊至大軍雲集人心稍安二十五日翔初招集各營標會議諸人多以日前潼關之失歸咎伯英伯英慨然曰強敵當前往事得失何暇追究今大統領親來督師諸君如能用命以我現在之衆當敵軍數營可決必勝乃畫五路進攻之策分配各標營授以方略二十六日於華陰東門外集合悉將馬隊改爲步隊四面環立翔初居中誓師言吾首存亡在此一舉當同心戮力以摧強敵慨慷悲壯衆皆變色伯英並言前次失敗之由與此次所應預防之點各將士咸唯唯聽命誓畢約九鐘許各標營即整隊出發伯英督東南路翔初與劉世傑督中路分向潼關進展我軍既出趙倜派人送信至云奉內閣電北京與湖北正在議和令約兩軍暫行停戰以待後命云云翔初疑其有詐因於二十七日午後揮兵進攻各營隊異常奮勇敵軍不支敗退城內我軍爭先

登城前鋒多人爲敵大砲所中傷敵軍數百手持紅旗復由西門突出猛撲我軍一時驚退時天色已晚因卽收隊退回華陰及嶽鎮暫事休息是役也我軍分五路進兵東南原各路迂而遠未及趕到中路直而近接戰較早敵又傾全力對我故戰事劇烈死傷甚多二十九日我仍以五路攻敵預定計劃先以佔據地勢爲要翔初與劉世傑仍當中路甫至泉店東卽爲敵軍偵知先以全力來撲遇於吊橋雙方激戰互有傷亡我軍卒以力單敗退華陰賴東南原及黃河沿路軍據守畫定地點牽制敵兵未敢來追三十日敵方以一營開吊橋欲撲華陰忽聞東原號哨聲起我東南原各路一齊發動直搗關城敵以側面戰事劇烈急回軍往援詎料我軍猛不可當激戰至晚敵遂不支乃於夜半潛退我軍於翌晨入城潼關復歸我軍掌握

是役也陳樹發所率係軍政部衛隊陳殿卿所率係大統領衛隊謝彩臣所率係馬玉貴衛隊劉世傑亦帶自己之衛隊彈械既較充實官兵更多精強兼以翔初躬親督隊伯英詳察地勢首據要害各路將士不惟皆能用命且具堅苦卓絕精神各營隊均於夜間露宿兵士忍飢受凍終無怨言故能一鼓作氣克敵奏功事後聞趙調在南原遙望見我軍服裝部伍均極整齊顧謂瑞清曰你說陝軍是土匪今日觀之士匪能如是耶及敗

退後電報清庭有陝軍愈擊愈衆之語自此清庭亦不復輕視陝民軍矣

當潼關二次失守時陳柏生率衛隊百餘人井勿幕亦率新練數營並赴同州禦敵未及接戰潼關收復而西路又告急當是時山西民軍敗於娘子關清軍入太原閭都督百川退守大同溫副都督壽泉與我專使王一山來陝求援時河東道余某尙據運城爲清效忠柏生乃與勿幕議曰秦晉唇齒由來久矣晉若不守秦亦難安今晉之民軍求援不可却也乃合兵并新招嚴飛龍之衆於十一月十一日渡河東征飛龍者朝邑大俠也與民黨同志夙有聯絡勿幕諸人至同州嚴卽率其部衆來助斯時隨同陳井東渡軍容旣壯紀律又嚴甫過河卽克運城而晉省同志李岐山等亦率敗卒陸續前來相聚於運城共圖恢復焉

伯英之初出潼關也豫西同志劉鎮華等聯袂西來並招夙結各豪俠效我軍最先到者有丁同聲後又有王天縱是時潼關二次收復又突增健卒數千及各大俠之聲勢伯英復主東征因西路戰爭正在危急翔初旋卽回省並調各標營急赴西路增援東路軍務仍付伯英主持迨十月以內西路戰爭稍穩伯英遂於十一月初旬東進連戰皆捷敵軍節節後退陳井之軍又於是時攻下運城風聲所至敵乃拔營遠遁二十一日我

軍進佔觀音堂澗池等處與陳井軍隔河成犄角之勢省垣諸人以爲東方從茲可以無事矣不意清廷復派第六鎮協同毅軍共兩萬餘人三次窺陝我軍初失利於觀音堂退守硤石布置未定敵軍馬隊已繞道至我軍後方我軍退守張茅不及遂大敗陳井之軍又急切不能渡河二十八九兩日遂在茅津平陸各處與敵隔河遙擊十二月初二日陳樹發與敵戰於牛頭原李仲三與敵戰於七里店均以衆寡懸殊不支而退伯英走入南山潼關遂復失守

當清兵三次西來潼關危急時省垣大兵皆開赴西路防禦甘軍及接伯英請援之函實已無兵可出適湖北幾度來電謂上海和議頗有媾成希望各省暫宜停戰等語因卽抄錄電文覆伯英令派人與清軍交涉違約停戰伯英覆書極言敵軍情勢與和議之不可恃語殊憤激省垣得書大震其時在西安者僅吳華堂之先鋒隊不滿二百人及薛正清爲曹印侯新募之敢死軍三百餘人且皆徒手郭希仁商之黨自新爲搜發土槍若干枝促吳都督世昌率之東行初三日早起程是晚伯英敗走南山之消息卽至又聞陳樹發奔高陵收潰卒東路無一兵抵禦同人驚愕計無所出或言敵人來勢甚盛省城不可守不如速赴南山連絡鄂軍再圖恢復郭希仁彭仲翔諸人力持不可急令臨渭二華

各縣官紳督率民團沿南山及渭河岸擇要分紮多張旗幟設大鼓爲疑兵並於赤水等處開挖長塹以備防守及調西路援兵漸回乃令陳殿卿李長蘭各以所部先開張聚庭帶總務府衛隊百餘繼進初六日午後冒雪出發初九日達華州深知敵人並未西進吳都督前軍已進駐華陰各路潰卒復稍集合而黃河東西尙有陳井之軍數千伯英又由南山招來豫西之衆合之達萬餘人三面成犄角之形遂上函西安總部報告布防大要並謂只可堅守不宜輕挑釁端東路軍事遂入議和階段矣

當是時上海和議將屆告成而陝省不知張翔初既接吳華堂報告遂東出視師並刺探敵情得悉此次西來敵軍確有兩萬餘人不可輕視因與吳力主休戰議和而諸將中多有以城下之盟爲可恥者翔初乃於二十一日集衆會議陳樹發諸人咸欲一戰翔初乃曉以目前情勢暨西路戰事各情形衆始無言遂決定議和二十六八兩日派彭仲翔金和暄等五人爲代表與敵軍代表會於泉店簽定停戰條約旋屆改歲元旦張彭諸人聯袂之潼與趙倜會面連日又得清帝退位 孫總理讓袁世凱爲臨時總統各消息東路戰事遂告結束

先是滿清前陝甘總督升允以廢員居西安省垣反正時單身出奔甘肅中途接清

庭電復起爲陝甘總督兼程馳抵蘭州調集甘回各軍二十餘營立即東下使馬國仁率馬步隊千餘人爲前部進窺長武其時適因潼關二次失守我原定開赴西路守禦之五標各營惟石得勝一營於九月十三日西開其餘各營有調赴東路救援者又有在岐鳳一帶剿匪者均未能西進及潼關二次收復遂調鄧占雲苟占彪兩營赴長武增防苟營於九月二十七日先開鄧營繼之甫出省城接邠州自治會報告石軍於十月初一戰敵覆沒長武失守總部得報後兵馬大都督張雲山決定親出督師適會黨向紫山自富平率千餘人來省投效因卽選其精壯者八百人率之西行又調高陵王占雲游擊隊分道赴援西路防禦始稍有準備十二日張雲山至乾州鄧統領占雲楊統領樹棠敗甘軍於長武驅出陝境雲山遂進駐邠州時甘軍之東來者尙有崔正午一部由平涼取道汧陽以進圖我鳳翔我省垣總部以各軍分赴潼乾兩路已無隊伍可派副統領萬炳南自請出征於十月十九日率齊得功馬隊蒲坤山砲隊并衛隊十餘營大舉西發至鳳翔派兵分防隴寶遇敵數戰不利退守鳳翔汧隴遂陷於敵當我軍之攻長武也向紫山營最勇敢得力十七日遇敵於冉店橋前鋒已敗退矣向字營以數百人冒死衝鋒擊退敵人當晚又以四十餘人劫敵營寨敵人驚退數十里張雲山由是激賞之故分配前方一切供

給時向營多於鄧營又因苟營日前入乾州時有搶掠商民情事深爲不滿捕其哨官胡某及此次巡哨不力之士兵數名欲斬以徇又凡遇五標兵弁退回邠州時輒收其馬匹行李而向營教練溫志超復以奉令向五標借槍二百支未遂揚言張都督將收五標軍裝致鄧營憤激欲以兵攻向經人調停而止旋懼雲山執法甚嚴凡敗退或違令者卽斬不貸占雲遂於二十二日黎明率其衆千餘人譁變繞鳳寶入漢中我軍之留駐邠長者除向字營外僅有張南輝之巡防隊及新招之衆約三百人王占榮由高陵遣來之游擊隊約二百人彭泗海自寧州新來投效之數百人及砲馬等隊共計不滿三千槍枝不過七八百而升允復以陸洪濤等十餘營之衆兵精械利來攻忽於二十三日又接潼關二次失守之信張雲山星夜回省圖固根本以邠長軍務及行營關防委鄒子良暫代並面諭何春霖周朝武等與子良會同辦理雲山走後何等與子良互爭權柄號令不能齊一各營隊又多不服調遣廿六日與敵戰於冉店向營全營覆沒其他各營隊均潰散子良無法阻止退至乾州收隊防守敗信至省城雲山以東路方急人心惶恐未敢離城乃令四標統帶邱彥彪率部先行令其護理西路行營事務彥彪至咸陽逗留不進雲山親赴咸陽促之十一月初六日始到乾州後路各隊亦漸集時升允大隊與馬安良所部精銳

十七營陸續東來初十日彥彪率各營八千人迎擊於蒿店及監軍鎮各營隊全潰彥彪連夜遁歸省南幸雲山在乾州親督衛隊數營登陴防禦晚上於城上設燈火並不時改變號音竟夜不息敵驚疑不敢逼城下越日潰隊及各路新募之兵漸集雲山資之固守待援而邠永一帶扼要地勢悉爲敵據矣

當潼關二次收復後張翔初回省時正直萬炳南由鳳翔屢書告急卽欲出師往援未及發而監軍鎮我軍大敗乾州飛書請援乃派王榮鎮楊茹林等部及曹印侯之敢死軍援鳳翔翔初自率東路新回各軍與馬玉貴援乾州彭仲翔與胡笠僧率井勿幕之兵兩營亦隨之助戰十一月十二日出省十三日至醴泉與乾州約分三路攻敵北原各營張雲山由乾州當西路翔初當中路馬玉貴當東路五十七連戰兩日均以三路未能聯絡一氣未獲大勝然戰況亦甚劇烈馬玉貴以數百人衝入敵營後援不繼被敵堵擊幾至覆沒玉貴誓死督隊臥地不肯退兵士感激復奮勇回戰敵兵亦未敢來追也二十三日翔初到土橋聞甘軍據三水（民國成立後改枸邑縣）及張河鎮卽派胡笠僧取三水至則敵人已聞風退去二十六日集各軍攻張河與敵戰於第五村敵軍敗退我軍進追敵入鎮城防守未受大挫是時三淳一帶雪深尺餘山路崎嶇人馬難行又兼大軍



所至鄉民逃避一空雖有麥粟熟食難得兵士飢凍甚翔初乃於廿八日回醴泉又聞東路復緊急旋於臘月初二日回省留馬玉貴守醴泉初邠長之敵見我軍服裝隊伍多不整齊心頗輕之此次醴泉之役多係東路調回勁旅槍械充足臨陣奮勇兼得翔初以大軍出三淳攻敵側背敵一時莫明我軍虛實遂亦轉攻爲守不敢輕出乾州一路頓呈和緩之象甘軍將領崔正午攻鳳翔急萬炳南退駐岐山留民團守城及援軍漸集炳南復進駐鳳翔十一月二十一日分三路攻敵不克王鎮海死焉而曹印侯又率敢死軍來增援炳南復出戰二十二日大敗敵軍於柳林鋪崔軍遁歸汧陽由是不敢再窺鳳翔是役我軍之在鳳翔者王榮鎮楊茹林及萬軍之毛岐山傅定安各部快槍均多獨印侯部三千餘人咸持雜色土槍刀矛鋤刃等兵器遜各部遠甚然以印侯善於鼓勵將士臨陣皆能出死力往往徒手爭先奪取敵人槍械而歸故鳳翔賴以保全者敢死軍之力居多焉甘軍攻乾州多日以城堅守固頗有傷亡乃分兵東趨醴泉先是潼關三次失守省城空虛張雲山乃率其衛隊回省命邱彥彪督各隊守醴泉使楊仁山駐南坊鎮堵敵軍南下要路玉貴去後甘軍屢窺南坊楊仁山連函彥彪請增派援兵彥彪不應南坊遂於十二月十二日失守同時甘軍張行志部又攻陷岐山從此敵兵南下無阻新歲正月初一日

敵將陸洪濤率兵乘彥彪不備攻入醴泉彥彪倉皇退守咸陽陸洪濤率馬步兵二千餘人乘勝尾追直逼咸陽告急函日數至時東路已通和清帝已退位矣張翔初尙在華陰部署善後各事馬玉貴自省力疾赴涇陽守臨涇渡防敵東竄之路適吳世昌新自東路歸總部同人請其迅出禦敵吳以甫經回省兵士未及休息初有難色繼念咸陽距省甚近咸陽若失則省城必動搖乃慨然允行遂率先鋒隊與薛正清之敢死軍周寅斌之砲隊力疾出發初五日晚抵咸陽時敵已進紮咸陽北原初六日黎明下原來攻世昌倉卒出城禦敵飛彈中傷右腿軍士昇歸而各營隊均震搖紛退入城敵軍直撲城下聚伏北門外及西關廟宇中豫備攻城參謀劉幼賓急令人閉各城門以土壘之飛書省城請援並與王榮鎮董雨祿薛正清諸人登城布置調大砲隊上城助守適吳善卿帶朱福勝衛隊百餘人及七標自西來援改守爲攻各營隊由城外抄敵左翼城內數百人出東門助之直趨敵人所在轟焚廟屋城上守軍呼聲雷震敵軍大懼相率退出吳善卿乘勢督各營隊奮勇追擊城上軍亦下城協助敵遂大敗我軍直追至原上斬獲達數百是役也強敵撲城主帥受傷卒能以少擊衆轉敗爲勝實爲東西兩路作戰以來未有之事卽敵軍亦自認爲入陝以來第一次挫折且爲意料所不及也正月初七日劉幼賓恐敵軍再度

下原來攻諸將商定三路攻敵以吳善卿董雨祿之衆當正北路由善卿指揮之李金成周文斌邱彥彪當東北路康棣華邱彥彪指揮之吳鎮南周寅斌當西北路翟富榮指揮之自晨出發激戰至午後雖細雨濛濛而我軍士氣終不少餒自下擊上節節得利敵軍自六日大挫後中懷懼怯一遇我軍進攻卽行引退我軍追至雙兆附近歸店張驛之敵胆破心崩當晚卽退歸醴泉惜我軍不及探悉未能窮追初六日之戰吳善卿最爲奮勇殺敵幼賓以吳世昌令派爲中路指揮本日午間接董雨祿報告我軍各部不相聯屬幼賓恐因此致敗乃改派善卿爲各路總指揮不聽命者以軍法從事會天晚雨大各軍紛紛退卻善卿往來力阻至氣竭聲嘶不能止乃獨率百餘人進追數里適劉世傑到咸陽有報告善卿被敵圍者世傑急派親衛馬隊數十人令報者作導馳往救援須臾善卿歸口啞不能出聲但以手指畫敵勢與諸軍不肯用命狀並連稱可惜好機會後又索鉛筆書示衆人曰敵已胆怯我軍不追致敵子藥車數輛安然逸去可惜可惜書畢已氣結神暈如失知覺問之食不食爲備湯水飲訖卽令安臥衆復商議僉謂咸陽北原地勢重要敵軍雖退而不派兵據守恐敵復來非我有矣乃計劃乘敵新敗再出進攻初八日因復冒雨進兵吳善卿仍督北路任宏發督西路康棣華督東北路午後開至雙兆店張驛附

近聞敵已遠遁暫令各營擇地駐紮初九日各路同到雙兆店張驛時升允促馬安良圍攻乾州益急城內我軍力單不能出戰惟堅守以待援兵嗣聞省城大軍已至咸陽乃派人變服至咸陽請援適陳柏生率嚴飛龍嚴紀鵬各部已至三原來函約以初十日進攻醴泉陳樹發亦率部至咸陽乃撥田裕祥及炸彈隊令其率赴興平西北向乾屬薛祿鎮進發藉以牽制醴泉敵軍兼爲乾州聲援初十日店張各軍會議進攻吳善卿當先督戰任宏發任後路接應前隊直趨醴泉城下方欲攻城敵伏忽自澗後出彈如雨驟善卿登時陣亡後軍聞督隊官已死全軍動搖不聽指揮各自退却不得已仍回店張驛屯紮初十日以後店張驛薛祿鎮兩處我軍皆未再出惟陳柏生自阡東村連日攻醴泉嚴飛龍爭先至城下中彈陣亡同人以乾州被圍日久擬請張翔初親來督隊解圍繼思清帝退位共和業已告成各省均早停戰陝省若與甘軍再戰實覺無謂且陝甘毗連漢回雜居戰愈久則仇怨愈深將來聯合更難爲力因議請藍田牛夢周及興平張曉山衡山昆仲往勸升允罷兵息民三先生者皆關中理學者儒向爲升允敬禮者也十九日三先生偕赴醴泉十八里鋪晤升允至則乾州十八日與馬安良已有和約矣升允見牛張來亦願速和翔初亦自省至晤牛張致書升允約定二十四日會於興平至期翔初將行省城同

人聞之恐有意外使人來阻止張雲山亦自乾州來函謂不可信旋得升允覆函拒絕相見而罷嗣聞升允已於是日鷄鳴率軍北去矣西路戰事亦告結束

### 附錄敵方和議條件

一上年宣布共和懿旨至今仍未奉到本年正月十四日乾州送來告示始知去臘二十五日已改共和政體緣兩軍正在交戰不敢深信其真於十九日彼此停戰面商由西安逕電袁大總統如有其事即當遵照懿旨罷戰而符共和之政體

一停戰後道途商旅往來兩方面均應負保護之責任庶免有害治安自立約之日起既屬共和不得妄殺一人其從前激戰時互有殺傷均無庸置議

一現據甘肅官紳各界電稱甘肅已公認共和秦隴視同一家如有患難互相維持除劃一章程頒布再行籌辦外僅先立一草約二紙各簽押分執以爲憑證

一查去年宣布共和文內有合漢滿回藏蒙五族完全領土爲一大中華民國既屬一家自應相親相愛共保治安至臨時戰兵陸續退出陝界外所有守衛各隊俟京電至日再行遵辦

### 我軍提出和議條件

一貴軍應全隊退出監軍鎮以十八里鋪爲兩方中立點兼爲暫時接洽之區兩方各派兵一小排看守彼此均應確守界限所有派出馬匹人數以十名爲限不得向中立點前方動運兵力致生疑忌而傷感情

一兩方面通信及往來人數以十人爲限不得攜帶槍械彼此均以優禮相待如有傷害應由各該方面担任抵償惟均應持文以爲憑證否則概不接待

一暫時停戰期內以袁總統電至日作爲期滿另議辦法卽以袁電至日將此草約作爲無效

一能否由貴處速飭鳳翔軍隊退出戰地否則該處戰爭貴軍不得認爲背約

一貴處所擬第三條秦隴視同一家句下擬一俟和議成一句貴處所擬第四條所稱戰兵衛兵并無一定名詞漫無限制礙難承認所有守衛各隊一句擬改爲酌留少數兵隊

一兩方面現在停戰期內惟軍事仍應各守祕密不得派員私相調查

一兩方面現在停戰期內彼此均應約束兵士不得蹂躪百姓

一敵軍前派全權代表雷崐山尙無下落應由貴軍查出示知

(六) 山西辛亥革命紀略

自孫總理同盟會在日本成立後晉省留日學生首先紛紛加入並陸續回省祕密運動景梅九號稱最積極自與井勿幕遇於北京偕遊太原與內地諸同志決策隨井至西安充高等學堂教習兩年見陝西革命勢力已近成熟因與杜羲相偕離陝杜羲北上梅九重赴日本與宋教仁趙世鈺陳家鼎等商定策略因留東學界抗爭河南礦權事被推爲代表之一乘機入京與湖北白逾桓創辦國風日報暗寓提倡革命思想及辛亥八月武漢舉義更大張旗鼓爲北方革命言論之中心又密納彭家珍於社內炸死清室宗社黨要人良弼使滿清親貴大爲震駭當是時太原黨人已與新軍革命同志聯絡就緒待時而舉及聞陝西光復之訊卽力促新軍諸同志姚維藩閻錫山溫壽泉等發難正計議間忽傳陝西革命軍將渡河攻晉晉撫陸鍾琦議派新軍一部防守晉南各要隘以阻之新軍參謀姚維藩主張於奉令移防之前約期舉事遂於九月八日選勇士五百人往攻撫署陸撫自縊死又以四百五十人往攻滿城克之藩司王慶平臬司李盛鐸等悉被逮一日之間太原光復衆議堆閻錫山爲都督溫壽泉爲副都督景梅九時在北京聞訊卽遶道歸太原與同志仇亮姚太素續桐溪史可軒諸人共參督幕清廷聞變派北洋陸

軍第六鎮統制吳祿貞爲山西巡撫率部進攻山西吳本黨人至石家莊頓兵不前使人召駐石家莊之晉軍首領仇亮與議合兵共入北京推翻清庭縮短戰禍事爲袁世凱偵知使人運動吳之堂旗官馬龍標刺殺吳於石莊軍次景梅九時同在娘子關聞訊急偕同志數人馳赴吳軍議繼其志爲吳軍旅長吳鴻昌所給夜率吳部進駐正定梅九與仇亮因此來所帶之兵僅五百人未能堅守石莊因拆毀鐵路十餘里以斷敵人交通僅運回吳祿貞所截留之法國槍砲彈多箱吳鴻昌率部遁去時倉卒未及帶走者也袁世凱旋任清內閣總理復派段祺瑞率兵分三路來攻娘子關相持月餘關遂陷太原大震革命軍乃分走南北時續西峯一軍已攻克雁門關大同閻錫山北行始有退路南行一軍由黨人楊錢甫李岐山先後任行軍都督得衆萬餘梅九隨之同行遂下絳州據襄陵攻平陽至清帝退位而止袁世凱改派李盛鐸爲山西都督晉代表孔庚在京力爭謂大同河東均在黨軍掌握堅請允閻都督返太原主持軍政晉局始定

### （七）伊犁革命紀事

#### 伊犁之形勢

伊犁在新疆天山北路之極西與俄境接連清季爲控制邊防計增設伊犁將軍於



惠遠城統率新舊滿營共十六旗下設都統佐領同在城內並置軍器庫二及後添練新軍馬步標各一及山砲野砲工程各一隊分設參謀教練兩處以督率之步標駐城外東北五里馬標駐城外東南五里砲隊工程隊均在城內漢人居住者惟在大街不得與旗人雜居城外皆纏頭回族（按卽今所謂維族）東關最多北關次之

惠遠城北十五里爲伊犁府城伊犁鎮總兵伊犁知府暨綏定縣知縣在焉漢族悉住城內四關亦皆纏回所居

自惠遠城南渡伊犁河爲錫伯族八旗屯耕地又南爲特斯克川爲額魯特蒙古十六旗牧地再南則陟冰達阪卽天山南路矣

惠遠城西北行九十里上果子溝又西北曰博爾塔拉爲察哈爾二十四旗牧地

惠遠城西四十餘里有霍爾果斯河由北而南人伊犁河河以東爲索倫族八旗屯耕地河以西膏腴千里清光緒年間伊犁劃界時悉入於俄

漢人與纏回之農耕者均散處各鄉間哈薩克族則游牧爲生遷徙無定漢族之經商者以天津人爲多服官入伍游幕者以兩湖人爲多農耕者以陝甘人爲多伊犁新軍初由湖北奏調步兵一營砲工輜共四隊馬隊一標則由甘肅招募而來此伊犁當日之

## 大略情形也

### 革命時之情況

伊犁新軍中兩湖人士既多步標一營又自湖北奏調而往革命份子如馮特民郝可權李輔黃黃立中諸人均在軍中步標標統楊繼緒亦同情於革命而陝西李嘯風張愚生甘肅鄧寶珊等又均負運動革命工作西出玉門張在綏定小學教書李鄧同在新軍服務惟馬隊招自甘肅其中軍官亦有陝人而鄧寶珊亦在馬隊標統姜春巖幕內以同鄉之誼密與聯絡臨時呼應亦可不生問題顧伊犁遠處西陲內地各省起義消息隔絕罕通惟於伊犁將軍署內有人傳出武昌起義之訊嗣又聞知湖南江西等省先後響應九月初六日湖南某君與李嘯風言曰此次革命成功陝西應列五等國民矣嘯風問何故某曰各省起義獨陝西無聞寧非落後耶嘯風曰道路遙遠消息隔絕安知此時不義旗高張耶是日午刻河北莊子厚忽來告嘯風謂陝西已於九月初一日舉義先是伊犁新軍中既聞武昌起義之訊嘯風即與馮郝諸人密謀響應第以同志過少躊躇未定至是既聞西安光復其意遂決同時又聞陝甘新任總督升允電商新疆巡撫伊犁將軍及阿爾泰塔城各參贊大臣聯絡籌備欲以新疆爲清室退據地而伊犁將軍未銳到

任後復亟謀裁汰新軍中之漢人官佐代以滿族默察事機不容再緩因於十五日夜諸人共集李輔黃寓商討進行方略十八日晚又在馮特民寓集議馮因連日游說標統楊繼緒尙無結果數夕不眠目赤如火謂吾輩均書生不嫻軍旅平時在軍中又無聲望深以臨時指揮無人爲慮嘯風曰吾觀楊某非無心革命者不過恐舉事無成而被累耳此時不必再言吾輩且自行之事發後彼若與吾輩一致卽奉之爲總司令否則一彈可了耳馮又以伊犁新軍平日訓練均係空槍演習而無子彈軍器庫又在旗營內爲慮嘯風曰新軍器之管庫者爲黃立中與余頗契余願往與商之彼若允則事必可成彼若不允或告密則余一人當之不累他人也馮猶以黃係官場中人疑之嘯風謂無可慮堅請行是夕大雪天明未已嘯風乃步往訪黃密與言曰吾輩欲有所爲君贊成否黃答曰贊成嘯風復謂兩手空空雖贊成猶未也黃謂非子彈乎君等來劫庫可也嘯風曰先劫庫而後進行恐吾輩未攻入將軍都統各衙署已屍橫道左矣黃曰吾已於每次晒藥時搬出不少藏在余夾室內惟守庫者尙有旗兵君宜設法運出耳嘯風大喜因與約託言寄存箱篋兩次取回雖皆有旗員當場亦未之覺惟一次遇卸任將軍錫綸之子孝虞臣問箱中何物答以書籍時適風雪交作遂未再問不然孝固平時喜看書籍者聞書則必取閱

矣嗣以再三搬運易啓人疑至第三次乃浼河南黃正中往取並前兩次所得悉存其家因黃平時有佳公子之名卽敗漏亦無人疑及故也子彈旣得遂邀張愚生至正中寓草擬文告密令如下

一告漢回纏頭各族人民起事宗旨

一招諭旗營反正投誠

一安撫蒙古索倫哈薩克各旗聲明一體保護決不擾害

一照會俄領使館說明革命立場請其諒解

一令山砲隊進攻將軍署

一令野砲隊進佔軍器庫旣佔後分隊開放東門

一令回兵進攻舊滿營

一令馬步標兵於夜十一時齊集東門入城分攻將軍都統衙署暨新滿營

一令工程隊同步兵一隊進佔舊軍器庫

部署旣定後以伊犁府城尙有總兵恐來救援且府城爲商業精華萃集之地不肖之徒乘機擾亂不能不爲之防囂風卽冒風雪馳往府署見知府賀家棟之中表鄭養瞻

請其轉告賀設法阻止總兵勿來救援藉以鎮定府城鄭問事在何日嘯風曰此不必問至時自知鄭謂賀若洩露奈何嘯風曰賀公明達必不洩露聞曾有人密請向將軍告密者默然不應其志亦可知矣鄭謂亦須早告好作準備嘯風謂亦不必此間相距僅十五里又無高山隔阻但見火光冲天砲聲震地臨時動作亦可及也因與約定而返時天已薄暮城門將閉途遇湖北汪占元急謂嘯風曰事已敗露奈何嘯風曰不敗露則我殺人敗露則人殺我此何可懼耶其實汪卽向協統陳家福告密者嘯風固已疑之故直以此語合之陳家福既得密告卽往見志銳請速按名捕拿時有錢某在座謂前次已有數度謠傳皆無實跡新軍力單又無彈藥仍請將軍以鎮靜處之爲宜志銳雖納其言然仍一面手諭馬步標統速安軍心謂三日內卽爲發餉一面調協標士兵防護軍署一面令新舊滿營速加戒備及嘯風返黃寓天已昏黑聞此諸項消息知事機已迫肩踵遂草手令令馬步標兵速集東門毋庸再候前定時刻使士兵二人縋城而出促使卽發一面令兩砲隊卽行發動義師遂於倉卒之間起矣

九月十九日晚九時各隊已得緊急命令首由南門野砲隊發槍數響山砲隊聞槍聲當卽以砲向軍署連發數響以爲響應郝可權率十三人卽由花園牆缺攻入李嘯風

遂率全隊炮兵馳至門首則協隊已迎面而來相距不過百餘步喝令停止前進不聽發令開炮協隊懼乃退集市中心鐘樓下嘯風遂率七八人馳往軍署接應可權至則署內已逃走一空嘯風因恐軍士掠物而散急舉火焚之而出可權已開東門放各將士入城矣馮大樹率隊攻副都統署佔領之步隊隊官李得勝由北大街往佔舊軍器庫而北城樓已爲滿兵佔據李得勝衝上城樓連砍滿兵數人旋即陣亡排長方孝慈復率隊衝入數次此時東南隅新軍器庫已入我手但大砲彈尙存舊軍器庫猶未佔得當十九日以前每夕黑霧籠罩全城燈燭不能照見三步外此時則風雪已止月明如晝滿營附近兩邊均有樹木溝渠冬令水涸滿人子弟曾受陸軍訓練三年已有相當軍事知識或伏渠內或伏牆頭暗處視明尤易瞄準我軍及回人助戰者數度衝入頗有傷亡嘯風急登警局屋上俯視始見其有布置不易攻入此時步標統領楊續緒馬標標統姜春巖暨中軍參將馬振廷均率隊集合於市中心嘯風又令人縱火焚燒都統署擬由各巷口外火攻而入諸人以爲苟如此則城內將變爲一片焦土得不償失因決定一面進攻一面招降又着人馳往府城迎接賀家棟嘯風即以擬就之文件交馬振廷展轉送至旗營各協領傳諭新舊旗營一律回家此時北城樓已爲我所得城牆一帶均有布置我軍亦有自正

街市屋上攻入者滿兵死傷遂衆正在危急之際得此招諭如逢大赦相呼棄械而歸而天已拂曉矣事後某協領對我軍諸人泣曰君等招諭文件來太遲若早知爲政治改革無種族歧視者余之子弟亦不死砲火下矣二十日辰初始將志銳捕獲槍斃賀家棟旅自府城至先是賀由惠遠歸鄭養瞻卽以嘯風之言告之賀答以臨時再說未幾聞炮聲卽率其幕僚胥役馳赴市中心傳諭居民毋得驚擾而伊犁鎮總兵周某已率隊將出南門賀急往見周言曰伊方與內地隔絕萬餘里革命黨之在此地者本無幾人將軍之力足以了之此城爲軍門汎地若有失某不足惜軍門之責重矣周遂止

是日下午起義諸人集於商會臨時分配職務救治傷殘掩埋死者曉諭纏回哈薩索倫錫伯各族暨額魯特察哈爾諸部落並與俄國領事接洽懋時三日略告就緒惟推舉首統頗費籌思衆人初以此次舉義大策發動李嘯風之力居多宜爲都督嘯風曰此地民族複雜與內地風氣隔閡比聞滿蒙各族心懷疑慮連日遣人來城探聽消息余與彼等言語不通聲望未孚彼輩平日只知有將軍都統不知其他今以素未洽孚之人驟臨其上恐不足以安慰其心萬一因疑生變是吾輩雖有光復之名反破統一之局非至計也經衆再四籌議乃以前將軍廣福蒙古人素稱長厚爲各族愛戴舉爲都督藉繫衆

望當即擬文宣布越日而各旗營各族暨游牧之哈薩克各部落皆相率來城投誠矣

臨時政府以廣福爲都督楊纘緒爲總司令姜春巖爲副司令李輔黃爲前敵總指揮賀家棟掌民政馮特民掌外交黃立中黃正中掌財政李嘯風郝可權掌軍政皆名曰司各司之下分科任事又有參謀處軍法處暨立法監察各機關其首長姓名多佚不備載

革命軍內部既定復將原有馬步各標營隊擴編爲營團師旅旬日後卽命李輔輜統率步兵一旅馬兵一團野炮山炮工程兵各一營出師東征進佔精河新疆巡撫袁大化率師抵抗其兵較我爲多遇於精河附近西湖一帶血戰三四次互有勝負惟袁軍專取守勢我軍不得進相持逾年至壬子四月北京中華民國政府始電令新疆伊犁雙方停戰議和

伊犁革命首事出力者如李嘯風馮特民郝可權李輔黃楊纘緒姜春巖馮大樹馬步雲馬騰霄徐建國周浩如黃立中鄧寶珊等十餘人除現存及不知其略歷者外餘均有小傳附載本編之末

(八)甘肅秦州獨立紀事



民元前二年湖北黨人黃鉞等以東南革命運動進展甚速獨西陲風氣錮塞革命思想無人灌輸殊爲非計遂決定從事於西鉞本記名道員以府州候用者與陝甘總督長庚有舊因往投之及抵甘同志周昆盧士璜黎兆枚等均在焉因與鼓吹新知號召同志並與蜀人順爻密組大同會逾年黨人陳貞瑞江鄭等均至甘由是祕密運動益力黃鉞旋被委充軍事參謀總理兵備及武昌西安先後起義黎兆枚羅瑞麟諸人遂運動新軍謀響應但因新軍中同志極少黃鉞任事甫兩月威信未孚故未能動是時法司彭樊甲藩司劉谷孫巡警道趙維熙勸業道張炳華同任營務處總理協理等職數人皆係頑固份子而彭尤甚九月初六日長庚復將新軍兵備處所轄之軍械局改隸營務處管理由是彭之氣焰益張力主召募兵隊以抗陝師且言新軍必變勸繳其械更改營制黃鉞則勸長庚保境自守靜待大局演變長庚以爲然按兵不動既而升允至甘奉清廷命復任陝甘總督又得彭英甲之助決計出師於陝鉞亦不安其位出守秦州及聞升允大軍馬安良陸洪濤等與陝民軍戰於乾州醴泉間潼關又爲毅軍所陷陝局甚危乃與同志謀有謀宜先取漢中者以漢中總兵江朝宗此時猶爲清守而新軍標統李光輝首鼠兩端將終爲陝軍患也又有謂宜取道陳倉直趨長安者因陝軍東西受敵勢必難以久

存心傳聞宗社黨有主張保據潼關以西作小朝廷以求活者倘使百二河關淪於民賊據爲偏安曷若聯合駐徽縣之羅平安一軍疾趨東進取陝軍而代之以維大局鉞以江李均自守之輩取漢中固無益於陝直趨長安益增陝民軍西顧之憂不若暫駐秦獨立撫綏回族聯絡羅軍俾弗東漸雖曰保境息民實不啻爲陝守若陝果不支則義旗一舉先圖平涼以截甘軍後路馬陸勢必反顧則陝危不救自解矣衆皆贊成反正之議遂定

先是黃鉞既到秦州卽派遣陸軍學生李仁斌李志南安國柱李望英及同志寇獻琛黃達等先後赴陝聯絡或以去而未能卽歸或因中途阻滯日久不得其要領直至十二月二十三日第九次派去之胡文炯自乾州回始得張雲山覆書允助反正約年內派隊至秦定期夾攻以爲聲援並粘附旗式以示一致由是秦陝密信始通時聞川軍援陝北伐司令李樹勛已抵廣元乃遣張雲華往達意旨並函蜀軍政府請其撥隊援助然而陝軍事使久不至又聞臘月二十以後乾州戰事甚烈恐其自救不暇計或中變因復遣胡文炯偕魏國英赴陝覘之又遣畢文碩赴鳳翔游說張行志張不納畢返途又運動駐隴州之驍勇營營帶崔鳴鏡崔崧等背張向秦謀洩二崔幾被害正月初五日省報陸洪

濟一軍已於除夕陷醴泉進攻咸陽是日復遣寇獻琛張桓赴漢中陽與川軍聯絡初七日又添派彭慶堂南下使助寇等相機行事初十日陝軍統領萬炳南自鳳翔使人函告赴秦師期十七日劉文厚偕受慶龍由省至秦出示兩湖同鄉公函促黃舉義並謂彼曾在省與鄂人劉佐寶粵人方芷亭運動軍隊圖反正炮隊管帶梁國璋已爲所動卒以外援無力未能得手始憤而來秦十八日陳貞瑞復至謀遂決

秦州防軍僅爲一營已經黎兆枚周昆諸人運動成熟鉞又聯絡伏羌軍學各界不下二千餘人三月二十二日晚由鉞傳諭各哨官長分布地點前哨謝漢秋湯礪山率八十人至籌防局幫帶翟炳燮率六十人至州署黃際亨胡芳亭副之右哨楊展鵬率四十人至義倉守軍械火藥庫前哨副哨長酃聯率三十人守西門西關右副哨戴芳泰率三十人守東門東關兼護天主堂左副哨劉德鰲率二十人守南門左哨嚴少春後哨王章金共率八十人守泰山廟營並護北門福音堂後哨譚祝萱及巡查秦志芳率六十人至游擊署鉞自領親兵四十人及差弁余振東成起鳳嚴鎮寰張佐勝等逕赴道署黎瑞芬潘雨炎甘霽霖等隨之三月十一日同入城市民安堵鉞等相繼抵兵備道署集紳商百餘人宣布約章聲明反正衆推鉞爲正都督向榮爲副都督秦州由是獨立

當是時升允左路陸洪濤軍猶在醴泉咸陽之間與陝民軍相持血戰而清帝退位詔書雖已傳至軍中升允猶未置信此時陝民軍東路已與毅軍趙倜停戰譏和張伯英諸人迴軍固守咸陽升軍攻之不克遂撤兵西去而中華民國共和政府早已成立秦隴一隅郵電阻隔消息猶未靈通得訊較遲故獨立稍後然於陝局亦不無關係云

## 二次革命紀事

和議告成清帝退位改建中華民國五族共和政體全國統一國人之意方謂兵革可不復用從此雍容樽俎百度更新於是擴大國民黨組織籌備國會選舉組織責任內閣方汲汲焉以求民主政體之實現且既推翻滿清政權所志已遂革命元勛如井勿幕郭希仁曹印侯茹卓亭常銘卿胡笠僧諸人均首先紛請解兵辭職或出國留學或歸隱田畝其餘黨人亦皆自散團體量能就業栖身教育界者尤多惟期培植後進充實國本漸以弼成三民主義之實現此外固不作他想也詎意袁世凱陽布新政陰忌黨人期年未逾而宋教仁被刺慘案發生又未幾而大借外債不由國會通過我革命黨人經此打擊始憬然覺悟舊式官僚軍閥與我黨所操宗旨同床異夢蓄意叵測各地同志始復轉變思想注意將來或獨居書空或倡言論議僉以必得罪首限制獨裁指日當塗風發泉湧及黃克強先生發動二次革命西北黨人異常激昂如鄒子良馬開臣皆主張反對最烈者吳希真等遂於邠乾一帶作實力之運動欲謀響應顧當時各省軍權漸歸集中陝西當局溺於苟安毫無遠圖假維持地方秩序爲名施其高壓手段又與北洋實力派

聯合一氣領銜通電聲討孫黃仰承袁氏意旨殺鄒馬兩人以警其餘於是黨人奪氣匿影銷聲莫敢先發及湖口一役黨軍敗退袁軍絡繹四出雄藩大鎮悉被解除兵柄次第芟夷國民黨既被取銷又復緹騎四出稍涉嫌疑卽加逮捕希真亦因械餉無源同輩星散不得不追蹤總理再渡東瀛西北革命事業遂成曇花泡影要之西北革命精神不欲甘落人後亦可於此見之也

## 討袁護國之役紀事

自二次革命失敗後陝西當道取媚袁氏種種設施漸與革命主旨相背馳顧世凱猶忌之且以關中爲西北重鎮關係大局必布置其腹心爪牙而後已民國二年河南豪帥白朗舉兵叛袁由盧氏竄入商維世凱乃遣其私人陸建章以追剿流寇爲名率領大軍來陝會白朗西趨隴州建章遂至西安世凱頒令取消各省都督名號改爲將軍並召張鳳翔入京覲見而以建章代其位既而白朗兵敗天水所部潰散建章遂大汰陝西軍以前所編之師旅悉予裁遣惟陳樹藩之第四混成旅以堵剿白朗有功得暫保留仍令汰舊募新嚴格訓練世凱又以呂調元爲陝西巡按使悉改民元以來一切行政組織引用舊式官僚位置要津西北人士稍有黨籍嫌疑者概行斥退革命勢力幾無存餘顧陝西自辛亥以還新舊革命份子散佈各地潛伏滋長抑鬱勃發有增無已及帝制發生各地黨人或由海外歸來或在各縣潛伏祕密聯合勢力復振四年冬雲南護國軍興長安王紹文謀殺如馬青苑袁清軒藍田李資初方厚藩二華李秋軒史績臣武志文長玉山乾縣吳希真胡德明涇陽薛西軒渭南白雨亭郭中林湯雨軒李儒青臨潼焦林咸陽郭

英夫王祥生與平張深如杜友梅南南軒李桂森盤屋熊子輝淳化吳鯤化等暨諸後起各黨人亟謀響應分頭密組討袁軍推康毅如爲臨時總司令李養初爲東路總司令吳希真爲西路總司令李秋軒爲南路總司令曹俊夫高峯五爲北路總司令各就所在地糾徒聚械待時發難旋因謀洩王紹文等十餘人被捕同日在西安就義其他各地黨人被逮被殺者尤多康毅如等出奔各路未敢遽動山西黨人景梅九久居西安袁令陸建章執送京師李養初馬青苑等跟踪東行密函東路各同志白雨亭李秋軒等謀於隘路劫奪以監護甚嚴未果先是山西黨人李岐山因事被押北京陸建章愛其才脫之延致幕下李因隨陸入陝與陝西諸黨人祕密聯絡陰使郭堅諸人率領渭北健兒數千人由韓鄜一帶趨陝北欲聯合晉北黨人直搗京師且欲誘建章所統之北洋軍深入北山分其兵力使東南西各路得以乘虛舉事又約鄧寶珊董振五赤亞武湯瑞軒李雲龍郭秉誠林必祿等數十人起兵櫟陽在蒲富各地爲游兵岐山又說建章以招致渭北黨人自任至富平收巡警局槍械謀獨立不成遂走北京建章知黨人根本盡在渭北嘗派大軍分駐各縣以鎮懾之且任陳樹藩爲渭北剿匪總司令派隊進剿郭堅堅部至北山因晉軍防河甚嚴未能東渡復折而南下由耀縣東至富平之美原建章乃使其子承武率精



銳一團巡行渭北至富平時陳樹藩之游擊營營長胡景翼駐富平佯爲歡迎入城夜半伏兵突起擊之激戰一日夜盡殲其衆承武被俘景翼以報樹藩樹藩亦遂樹護國軍幟移軍部至三原景翼使別部董振五等下醴泉進圍咸陽自率部進至臨潼以窺西安建章氣沮乃乞和電請以樹藩代己爲陝西督軍兼省長贖承武歸旋去陝陝局乃定是時袁世凱猶在總統任黨人續桐溪馮欽哉姚丹峯李養初馬青苑武志文張幼楠岳維岐等數十人由夏陽渡河號召舊部謀北伐首入榮河猗氏顧晉黨人各圖事業一時未能召集遂復退出武志文岳維岐死焉旣而袁世凱亦取消帝制未幾發病死共和遂得以不覆國會及各省議會皆復開

# 靖國軍革命紀事

## (一) 概述

陝西靖國軍爲西北及北方同志從事中國國民革命之集團其精神史實實綜貫辛亥革命陝西光復始事以迄於今日其間經袁世凱帝制之變陝民軍起而討伐逐逆督陸建章走之護國之業中被纂亂民黨同志先後遭難者無數且諸同志皆志節嶙然有學問有抱負有摯情爲人磊落英多至可念者也及護法事起在陝同志已前仆後繼思所以遠應我護法政府者迨後境地愈艱形勢挫變而崎嶇再起繼之以忠貞他日陝軍開關東出陳師牧野發雉幽燕戰中原戰長城戰沙漠週迴數萬里而復戰於長安城下五原授旗長安解圍西北革命陣地終爲本黨所擁有再東出兵以與我國民政府國民革命軍北伐之師曾同志之與軍民之心由其念念不忘所自知自己爲有主義有領導有歷史有前途之集團故能不離行陣始終戰鬪且北方革命之業尤有對殘餘封建勢力致革命攻心之用抑以北方爲農民生活之廣原經濟意識自必從革命方向傾忱於平均地權而資本主義我掩護於革命機會之無限封殖因資本主義之平行政綱自然

引起北方革命意識中特別對於資本主義泛濫之防止。是此革命意識與力量之傾注於軍事政治經濟文化諸方面乃至革命同志之修養與事功者實非常巨大非常重要。吾人當研溯過去之歷史而使之不泯滅其事跡不喪失其精神正我國今日之需要也。再則陝西靖國軍之長期戰爭當時兵力之單薄生活之困苦殆無能濟除有一革命信心之外編制不齊裝備缺陋訓練爲戰鬥所替代知識爲血肉所模糊時間爲飢饉危險所佔領人生爲杯酒刀光所盪漾而萬陣無聲萬情自奮天地四方望盡援絕初不問存我亡我恩我罪我如是者經數年之久在敵人環繞之間爲封鎖中之奮鬥其間亦有外來之誘惑有內在之矛盾有可以苟安之機有可以苟完之地有可以不死之人然皆一切決於大義萬難之中奮鬥而已大義所在犧牲以求無愧而已充此至誠可爲國於天地

民國六年于右任先生撰辛亥以來陝西死難諸烈士紀念碑辭云大野傷麟朝陽落鳳目極神州憂來復慟哀哀三秦前後百戰垂老還鄉陵谷幾變憑高弔古惟念國殤但爲君故泣下數行雨雪北門天道寧論山南山北何處招魂英雄萬骨塞潼關道咸陽原上膏血野草萬劫週迴萬靈環繞萬朵黃花香連嶺表豐碑參天人倫此愛嶽色河聲

並峙千載誠鑄國魂血化時代西北人豪精神如在此碑辭所示西北革命志士之一貫與以陝西爲北方革命同志匯萃工作之中心而使之成爲北方革命策源地者累累國殤其事具在每役必預其願彌堅今將紀陝西靖國軍本末故當自方事之先言之也

民國三年袁世凱遣陸建章督理陝西軍務建章故長北京軍政執法處日殘殺黨人世所稱屠伯者也入陝後愈煽威虐官吏盡鷹犬偵伺者四佈道路無敢聲既盡力附和帝制益婪殺自固民黨王紹文南風薰章雨蒼杜守信李桂森方象堃張淵諸君先後遇害後使其子承武率所號中堅團者巡渭北民黨胡景翼劉守中馮毓東武鈞姜宏模諸君發難富平擒承武破其軍遂圍長安應者四起而甘肅山西黨人之在陝西者如鄧寶珊景定成李鳴鳳胡德甫續西峯諸君早奔走謀起兵建章震懼失措願獻城贖其子旋竄出陝時陝軍旅長陳樹藩悉部由大荔馳至三原號陝西護國軍旋入長安總省政乞命北庭散迫民軍幾盡時袁世凱亦死矣陝政苛厲日甚北庭諸軍渠相爲結託負恃盜亂其政樹藩伺旨趣人心盡不堪時民黨多走渭北三原涇陽高陵富平蒲城各縣橫一水與長安相隔臨潼渭南壤地之在渭北者人情號難治俗武健輕鬪然擊人都市不中去去益爲殺人報仇蒲城富平俠少年爭以此相高一嘯呼可數百人立集既革

命起義以來此益爲黨人聲氣地三原舊爲文事及貿遷要區南距渭河東西通潼關以外及甘肅無不便與長安戰爭則三原自甚雄長故樹藩居長安爲政日欲事驅除編漢武軍分遣東西路駐以壓迫渭北腹心而省置警備軍使耿直統領之時省長爲李根源君關中道尹爲井勿幕君皆民黨同志而樹藩羈牽之使不能治事耿君直憤樹藩所爲且惡其爲革命梗也七年十月舉義省城戰不利退蒲城殉命於城下歲將盡胡景翼君所部營長張義安君起兵三原覆樹藩勁旅進薄長安圍之胡君景翼遂於其時建陝西靖國軍自任總司令曹世英君亦自陝北率所部民軍至殊不相下民黨同志多在曹軍中革命意氣張甚內蒙古騎兵數千由盧占魁張九才二君率之入陝與三原兵會先是高峻君起白水稱護法軍爲樹藩所敗旋與郭堅樊鐘秀兩君並起兵討樹藩至是進圍長安戰於城四周會樹藩佯請和義安奉令退兵中道遇伏殞於鄠縣鄧寶珊董振五諸君以所部退渭北由是北庭命劉鎮華率鎮嵩軍由河南入陝益爲民軍敵閹錫山亦遣山西兵渡河西擾關中戰亂彌苦胡軍初慮他部兵紀律疏弛將重爲民害故意度常踟躕思剪除諸恣睢者乃致力於敵鄧寶珊恐失衆且誤革命機宜數勸胡君勇決於事旋諸將協謀推于右任先生爲陝西靖國軍總司令使王玉堂張慶豫兩君迎于先生於上

海于先生以中國革命大業北方極關重要將先經略西北爲黨集力與南方護法之師相應且爲他日北方革命力量之儲備因問道走山西入陝涉險犯難崎嶇陝北山野間時民國七年六月抵三原受任誓師統一革命軍政張鈞君爲副司令劉廷森君爲參謀長李秉璋爲衛戍司令設總司令部於三原並延李元鼎茹欲立諸先生共參革命軍事其後井勿幕彭世安張贊元張宗福諸君來三原推井君爲總指揮編郭堅樊鍾秀曹世英胡景翼高峻盧占魁各部爲六路軍暨惠又光君一獨立部隊分使徇陝東西路靖國軍勢大振並派王玉堂張警吾成柏仁張慶豫紀時若諸君謁報廣州軍府及留上海通各方情實于先生統率軍政之初胡景翼君赴渭南故市被給陷敵樹藩錮之長安軍氣頓挫因令岳維峻君爲司令代領第四路軍時滇川黔鄂靖國軍分十道來援葉荃顏德基但懋辛呂超石青陽石星川王安瀾諸軍長約共出關中葉荃君率滇軍經甘肅境入陝先至鳳翔王安瀾則由鄂西北遣兵盡拔南鄭安康各地呂超君所部亦出川北向陝南旌旂雲合檄書霆迅聲勢復盛七年十一月于先生命總指揮井勿幕君馳勞諸援軍且共計事歸至興平南仁村爲賊部李東材所戕諸軍失聯繫頓蹙不前葉荃君孤軍走耀縣其餘援兵各觀望不前陝靖國軍受兵彌烈益竭力支撐於西北

民國八年一月副司令張鈞君所部在轆屋被圍其先東略潼關戰商縣棄田欲通零口道以會渭北軍至是戰轆屋圍亟第四路支隊長董振五君本隨總指揮井勿幕君司令岳維峻君戰於西路井君遇害岳君還三原董君攻戰興平武功鳳翔間者兩月間省城南路戰事急會鄧寶珊君馮統東君兩支隊及第三路支隊長楊懋君部協援武功戰事以救轆屋與奉軍許蘭洲部遇於武功大王村大創敵董君亦陣亡西師遂無功戰事稍沮陰正月樹藩訓知靖國軍虛實荒歲儲胥匱竭民命懸續間飢兵分農民數升麥謂此可一日活耳輒相向涕泣罷去軍中危苦甚創夷木蘇乃磨精銳逾萬橫渭河各渡口來攻益以奉軍許蘭洲及直軍張錫元部東西路壓境各萬騎戰事劇厲砲火動原野三原總部日夜發號令勵軍心諸將嚴陣壘巡徼不少問數子彈而射戒不得尺寸動動必殺不殺人亦賤視之以此竟却敵不得逞敵亦疲既持久有隔陣以鄉里語相呼問詢者矣時岳維峻君所部當臨潼渭南正面高峻君所部拒蒲城大荔東面之敵且以兵力固河防山西兵之窺犯也西路鳳翔乾縣並被圍樹藩部張金印日以地雷爆城王珏郭英夫兩君死守乾縣後編爲第七路軍甘肅陸洪濤以鎮守使所統兵會皖軍管金聚部悉來攻鳳翔城郭無完堞人民忍死隨戰爭而已如是者亘半年乾縣守兵食盡穴

城腹蕘藉而守城圯於地雷多次卒血戰得保完後以命令全師退戍高陵時三原高陵岌岌幾陷軍中有惶恐失志及疏於防檢者公然往返敵方訛言盛起會連歲大校軍民交困敵又斷糧道絕水陸運輸呼籲長濟均無音聞藩復續相誣謂靖國軍爲亂匪蔽中外不相顧坐苦槁絕而已後南北停戰將開和議於上海陝西軍應劃界守專員張瑞璣本民黨也黨人信任無異辭乃違信不公祖樹藩謂無違令攻擊靖國軍事又對於乾縣守者直指爲匪電文且隱連靖國軍全部謂自有土匪以來未有如陝西土匪之榮自有陝西以來未有如今日土匪害人之慘者予先生致函南北代表謂北庭宣言實行停戰而在北殺人在南欺人有如是乎張瑞璣出關長安古物字畫一時騰貴則其所爲摧陷靖國軍者可知毒螫之遭無能自斷樹藩則乘機急攻遂被佔十餘縣地軍亦大燬卒以黨人在東南者持于先生電信力爭和議代表至罷議以待乃劃界休戰未幾軍政府解體總理以南中局面日非遂引去從事革命組織與紀律之加強益爲主義著述

時民國九年陝靖國軍之力足以自守人民生息略定于先生念革命教育與革命政治施設之不可緩當草創之際匹夫制廷一呼而應弟革命終爲需要科學方法與法治精神之事排除障礙宣傳主義實施制度事無絕不可易次第絕不可渝西北革命諸



役領導者僅少數黨人意氣誠甚盛而對於革命洪流之匯接學術之極深研幾理論訓導與行動指揮各項幹部之培養以軍務倥偬日不暇給未嘗及是而爲主義戰者必使之明於主義無論成功失敗當使革命之精神不墜繼起有人于先生苦心焦思力竭此義於羣疑衆難之際其始於總部日集參佐講學輪漑新知汎討各家而尊壹於三民主義於總部置教育處廣興學校又自設民治學校以爲倡率向者軍隊多佔駐校舍至是各將領皆爭設學校於軍次或力興鄉里教育以不事此者爲深恥各地方絃誦聲高軍隊之愛護學校也唯恐不至迄於今日雖鼓輦聲歇諸將士多先後爲國家盡其精忠以去而過靖國軍故壘者每見春柳晨旗學生綴隊猶傍當年講舍之遺然亦有森森作壁門者矣同時文化事業之策進益開西北研究學術之風氣社會科學經濟科學及哲學諸論著浩瀚輸布各事檢覽報紙日載諸大思想家傳記學說以爲介紹並特注重於教育學說及革命運動史事以啓導時代新知又選送學生多人赴廣東習軍事及學於國內各大學三原哲人朱先照先生曳杖講巡使治學者以獻身革命爲力行一時革命思想受學術之鼓勵益充實而有光輝求知之心人人同奮是用克濟於艱難且使一般青年志既不卑齷作個人生活觀矣雖後來隨革命巨潮犧牲者衆而視墜落作貴家兒者

猶動機純潔惟歧路之中又有歧焉社會損厄爲足悲耳第西北革命精神教育實堅凝於此時無論軍人文人皆以忠於主義爲道德視喪失革命志節者爲不足齒數其影響逮於國民軍之北京起義以迄諸青年軍人之獻身北伐與今茲之抗日戰爭焉至政治措施則對地方自治開始實行之人才訓練率先爲之靖國軍區域中諸苛稅悉罷調劑糧食使倉廩有儲軍糈可給雖軍旅因糧兼徵芻秣而部隊亦自視愍然不爲暴厲並撤銷鹽禁使人民自爲營運禁農村重利剝削軍事區域內迄不發行軍用券以穩定金融免流爲地方之累戰爭數年間凶荒封鎖而經濟狀況不稍波動雖此有限之地區而政治修秩不使從資本主義而靡其効亦可觀矣茲時尤有二事陝靖國軍所悉力以赴者一爲發動中外人士之力以救災一爲綜合古今水工學說計劃以興導水利自民國七年以後綿亘數年之北方旱災陝西爲尤甚災情則壅於外聞救濟則格於戰爭于先生與在東南及北方諸旅居人士共盡慘迫之文辭哀痛之聲音貫之亦不可知之希望非至有所全活不止卒獲中外人士所組義賑會之救濟周餘黎民乃有子遺陝西引涇灌溉工程遠溯鄭白渠工近據開鑿吊兒嘴之計劃軍中曾作長時間之專門研究水利工程專家李儀祉先生及教會西人莫安仁先生曾作測勘所計皆在輾轉求得之更加

檢討初欲以工代振開始疏鑿惟苦技術機械未具然人人心中有此事政府社會重此責任其後涇惠渠成陝水工興作未已溝洫縱橫農畝穰穰則自靖國軍始也

民國十年直軍閻相文馮玉祥各部入陝陳樹藩敗退長安靖國軍扼之於西路遂退漢中其先一年胡景翼君得釋歸任靖國軍全軍總指揮軍事諸如舊狀無所進展于先生殊以爲歉退處耀縣山周馥品滇軍去後之將士墓場詠歌彌苦尋諸將環山而請乃復蒞三原軍中然事愈不易爲矣至是靖國軍新收編之李紀才部任西路之戰第七路兵亦西馳略地樹藩之退也靖國軍稍獲輜重俘虜諸路爭之於咸陽興平醴泉間勢且交鬭醴泉駐新撫之白鴻儀部故樹藩將復叛去由是軍心各趨自爲郭堅第一路軍於奉軍未去之先早以力蹙當時許蘭洲樊鍾秀第二路軍則出關跋涉至廣東歸命於孫大元帥卽他日之建國豫軍也副司令張鈞亦迫於三原勞泯之情勢飄然去陝盧占魁第六路軍隨滇軍入蜀兵潰去閻相文卽入陝督軍政未久忽自殺馮玉祥則殺郭堅於長安因其所部積爲殘暴陝民哀之亦快之也由是陝軍多惴惴皇然思有所附胡景翼謀假途直軍中有所爲主和甚力開國民大會於三原第四路軍暫受編制第三路石象儀協勝兩支隊及甄士仁馬獻章所部則皆主戰主戰主和游移未決者則有第

五路高峻部第七路王珏郭英夫部而于先生則至淳化方里鎮駐焉

民國十一年春于總司令駐淳化之方里鎮于營長鳳岡以其兵隨是時楊麟緒武功扶風城郭既完又於武功西原築城砦高瞰漆水川以控守東原于先生任李奪爲第一路司令駐鳳翔麻振武爲支隊長駐岐山楊麟爲第三路司令與第一路兵均南阻黑水河屏終南爲固于先生既決西巡計於武功置行營便前敵指揮而設總司令部於鳳翔于鳴岡營隨護西進楊麟使孫維棟及騎兵一團迎於醴泉于先生遂卽西路復建陝西靖國軍於時輿人意見有兩大分野一則主張革命不問成敗須使事迹炳然成則實行主義敗亦存留志節一則謂革命須以成功爲目的若僅硜硜小諒於事無補矣然當時不顧顛險從于先生於西路者實多總司令部移駐西路後茹欲立李元鼎兩先生及李百齡王玉堂周伯敏余欽烈李秋軒王大鶴魏任袁紫宵趙任卿王嗣昌李豐功寧建邦田種玉蔡屏藩張宗福諸君皆先後問道至軍中于先生共茹李諸先生決制大計參佐宵旰勤奮計備戰守有使命麻鞋重繭出入敵防地無所顧畏孤城四望環以十倍之敵然莫不慷慨摩厲益以暇整行政既秩且規畫爲西路地方興教育而先之以設師範學校訓景翼初在三原曾渙人告于先生曰今事不獲已請達于先生計無復出俱焚

無益然翼終爲革命奮鬪決不負于先生也三月直軍遣兵駐興平之馬嵬及桑鎮西嚮  
窺靖國軍以武功東扶風大王村爲東防第一線於時得甘肅同志張禹僧密報知有軍  
械西運由甘肅軍護行楊彪遣兵襲之於乾縣鉄佛寺盡獲軍輜以歸時直奉軍戰事起  
馮玉祥爲陝督將出兵而東直軍嚴具待發于先生西視鳳翔師命楊彪進擊直軍分命  
李奪麻振武皆以兵循黑水河東進攻桑鎮敵與彪攻馬嵬之師會彪拔馬嵬待攻桑鎮  
兵無耗後續部隊未至敵炮發積稽中軍大至不得已退回原防于先生數電詰振武兵  
何以不前而振武實已率兵由岐山行則大疑知必別道趨利不欲成彪功也急使兵追  
之至黑水河敵彈雨集退遇敗兵知振武果從其參謀計陽諾出兵應彪而潛趨終南山  
下欲乘敵兵東撤掠其軍實而黑夜兵自殘轉爲敵乘創更幾盡振武收集殘部歸岐山  
而時機已失直軍知靖國軍之必躡其後因留不行悉衆大舉來攻陝軍郭金榜白鴻儀  
甘肅軍張兆鉀等皆助戰直軍圍治堂師當正面吳新田師由陝南出大散關逼寶鷄鳳  
縣道場塹僅有衆一旅戰於武功東原屢敗敵敵憤集精銳來攻日夜炮火不絕聲于先  
生則自鳳翔率炮兵東來督戰炮兵加入陣線敵不得逞自開戰至是歷半月矣麻振武  
援兵輕敵又狃於小利士兵得敵械輒離壕塹各攜歸陣線屢動又軍中忽流言將俟楊

蹇敗收其械意洶洶率不利楊軍軍中覺勢危幸方勝猶可從容退四月初湯蹇下令撤防武功之戰至是告結矣楊蹇退岐山之桃園于先生更慰勵之蹇矢戰不屈且曰他人既皆走成功之路我當一試失敗之情況爲何如其後走陝北依井岳秀於榆林集舊部訓練之他日仍爲關係陝西革命之巨力焉于先生既失楊部一勁旅遂復由岐山而西居鳳翔念總理遭陳炯明抗命方困頓於嶺南自維付託之未效忠憤填膺楊蹇既北去麻振武卽已通款於直軍時劉鎮華繼馮玉祥爲陝督命人招李奪使降李棧觸無所歸願從受編部下眈眈欲得于先生槍馬勢頗險惡斯時甘肅涇川駐軍統領謝有勝因軍械前被截奪使人謁于先生謂歸其軍實決不相犯于先生鑒其誠許償以金使者欣諾去而城中事已至此遂散諸同志俾冒險由高崖假道行高崖爲汧陽縣境謝有勝軍駐兵處也六月間值舊端午節于先生既遣去總部諸從者予兵械於李奪入夜集同人於一室爲軍中最後會議王玉堂王家曾楊瑞亭李秋軒余欽烈李豐功諸君與王陸一皆在時黎元洪復任總統於北京欲延于先生往京劉鎮華亦遣車來迎且言未敢以非義請第願先生之東得謹迎送長安城外何如玉堂秋軒均言寧涉險從西路行五年革命爭此一結也于先生慨然曰寧涉險而東耳復之書曰戰爭事已山水方

茲苟任我行則東西南北何之不可我今行矣次日黎明命玉堂家曾陸一潛出城疾馳謝有勝軍中假道倉卒中亂兵塞途于先生走山谷中與從者相失山頭亂兵搶攘意皆在于先生也方危急間李奪部支隊長衛定一夙敬服于先生得訊率騎驅亂者去玉堂家曾等假道得許急返報謝君高崖之兵亦至嶺下迎護送就道甚謹于先生由此離陝入甘肅玉堂家曾陸一皆從經崇信靈台華亭清水天水踰秦嶺至徽縣遂泛白水江入嘉陵山川艱險風雨兼之以十一年七月至重慶時川中一二軍戰事起重慶遂爲戰地于先生未欲久留旋赴上海時總理亦以陳炯明叛離廣東至上海于先生因報告陝西革命經過旋參畫中國國民黨改組事又設上海大學聚諸學者同志教育全國革命青年其後領導革命運動革命戰士雲起其間至今未泯于先生嘗謂革命之途甚多不可以一時地人事自限也雖陝西靖國軍事至此遂已而在西北諸同志與各將領回憶數年間沈痛之歷史教訓乃覺天地有異惟當奮勉於前途其後國民二軍之舉義北京與長安之嬰城久守以迄于先生由俄蒙歸陝解圍此一貫之革命精神志業西北諸同志與全體將領軍民固皆有所受之也陝西靖國軍對於西北革命大業與中國國民革命之關係具如所已論述者今更舉國民軍之興起衰落與夫長安城守及解圍後國民革

## 命會師中原事以明此歷史之延續

民國十三年中國國民黨改組開第一次全國代表大會於廣東制定總章發表宣言以對內對外政策宣示中外于先生兩度赴廣東襄承黨命其年冬馮玉祥胡景翼孫岳李仲三劉允臣諸君密計革命舉兵北京建立國民軍分統一二三軍拘禁賄選總統曹錕逐廢帝溥儀以段祺瑞爲臨時執政革命勢力漸展於北方于先生由上海至北京十四年 總理北上命成立本黨北京政治委員會于先生實贊畫機務時胡景翼督辦河南軍務奉黨命唯謹軍政事皆就于先生決進止時劉鎮華惡王琨率鎮嵩軍據河南西部景翼將用兵恐奉軍入關乘其後于先生以政治委員會之使命去奉大晤張作霖張宗昌作霖宗昌問曰軍事十日可了否于先生曰七日足矣未七日景翼督戰黑石關大破鎮嵩軍下洛陽悉定瀋澗間諸逆部王琨死鎮華遁去捷聞國民革命軍亦肅清陳炯明諸叛逆底定兩廣三月十二日 總理逝世率士哀痛諸革命國家尤深震悼未幾胡景翼君亦以臂瘍不治歿於河南岳維峻繼爲軍務督辦孫岳督直隸鄧寶珊副之李雲龍督陝西皆國民二三軍將領與一軍共控北方形勢兵力及政治境地甚盛會奉軍入山海關與國民軍衝突戰爭遂起



十五年三月國民二軍與奉軍戰敗於山東河南奉軍遂圍北京國民一軍棄京守長城南口迤邐退去于先生尙在北京殊險迫以奉軍中有舊部張奎元者倉卒趨送天津居月餘計畫援陝蓋當時國民二軍之在直隸山東境者皆挫敗在陝西之國民三軍以聯繫盡失勢尤危殆直軍乘時與奉軍合皆力攻國民軍岳維峻棄汴鄭至陝州先是豫西戰後劉鎮華以殘卒竄伏盧氏諸山中至是聞二軍西退因率部阻塞崤陵險阨二軍將士皆棄械走維峻渡河走山西被繫劉鎮華收拾燼餘復起寇陝圍長安數重益招羣盜以山西彈械軍資之助肆攻極烈城中守者爲楊虎城李雲龍衛定一諸將領兵不盈萬又當一二三軍盡敗後天下氣沮乃能決心共守鎮華攻城不得逞乃築高壘日夜轟擊塹壕裂平野斷城外四週道然軍民殊堅忍糧盡彈絕曾不稍撓亦垂垂數月矣于先生念陝西處大包圍中由河南山西四川甘肅湖北諸路皆不能通乃決取道俄蒙南下以達陝境長城外二軍餘部尙衆逐風沙無所之自可收集以赴西北戰場於是南下至上海由海道出國時國民革命軍總司令 蔣中正先生中央執行委員會主席張人傑先生以電訊約于先生赴廣東于先生因陝西事急覆電告行謂當前驅西北且冀他日會師中原中央方將出師北伐因畀于先生指導西北革命之權責既泛海經朝鮮

灣作長歌敬悼三韓志士祝其國家民族終獲獨立自由抵海參威入蘇俄境過上烏金斯克適布利亞特共和國舉立國五年祝典人民布燎火騎吹歌舞於大森林中于先生爲作紀念之歌過貝加爾湖憑弔蘇武遺跡追念我民族不屈不撓之賢豪是時國民軍總司令馮玉祥先生先在莫斯科于先生因至俄京與共商定方略且訪問蘇俄要人參覽其革命後之國家建設既與馮先生約定先歸國則止上烏金斯克復以電信促請謂且行且集舊部當待公於綏遠包頭間也抵庫倫因戒程稍留遂至土謝圖汗部蘇珠克圖地方訪二百廿古墓作記而還覆藏千百年之大漠史蹟乃隨革命行程而光於世矣旋在庫倫與李烈鈞先生遇知國民革命軍已退出長城外則張北不可復往遂決赴包頭沙漠中約略方向而行入內蒙遇險於黑教堂蓋亂兵劫行旅其魁率則識于先生賴御者義勇疾馳突圍免於難後與馮先生相遇以十五年九月十七日成立國民軍聯軍全軍入黨誓師於五原于先生代表中央授旗由此取道寧夏固原馳援陝軍其時長安被圍已久軍民困頓城中以油渣延命吃藥物飲酒或醬圖已片刻飢然亦盡矣犬馬無可殺飛鴉不敢入故巢薪火斷古木亦灰餓死無數衣冠委蛻街巷軍士抱槍槁死城堞間者比比然也人民慘惻無聲目盼援兵之至然援兵何自何人來援殊茫茫耳楊虎城

復殺款敵者敵使來則命城者簇射之無敢前者念留此西北孤城以維繫西北之人心遂應北伐之師自於革命全局有補益忍死無言矣于先生歸程中息息念此事十月間國民一軍先東進于先生至渭北三原適受兵于先生以國民軍二三聯軍蕩掃之敵礦竄因設臨時總司令部於三原萬難中集軍食餽餉援軍一軍及甘肅軍馬鴻逵部始與團長安兵激戰於城西敗之復繞終南山躡敵後至瀾陵岸出不意大破之城中出兵夾擊劉鎮華急率殘部窮日夜遁出潼關長安圍解自是年三月初合圍至十一月二十八日蓋八月餘矣人民出死生夢寐中惻惻復見自由之天日子先生踐履所宣言解國民軍二三聯軍總司令職退居耀縣王山中旋以黨議及軍民之推戴馮先生復堅要于先生主持陝西軍事政治於是立軍府建制度以總司令部兼綜省政府職權開始軍政時間之治而具以聞於中央執行委員會及國民政府撫輯軍民籌畫出兵馮先生既至長安國民軍奉建制爲國民革命軍第二集團軍尋出兵潼關更東進至鄭州開封與第一集團軍北伐之師會初于先生念爲革命而死之軍民不可無永久之崇念因於十六年三月 總理逝世紀念日舉行革命大祭建革命公園於長安葬陣亡殉難軍民骸骨數萬具峙東西爲巨塚與馮總司令躬奉軍民數萬負土成墳豎豐碑爲辭其殉難人民

碑辭曰長安之民爲革命守長安之城爲革命以犧牲而求解放兮將脫人羣於鎖梏世方同此飢疲兮鬱長圍之既久矧白日兮青天慰幽靈兮不朽陣亡將士碑辭曰民族之戰士戰於是守於是葬汝骨於是世界不平決然掃蕩民生困窮孰爲此狀以主義爲垣墉以精誠爲甲仗碧血人間繁華兮塚上革命成功兮歌永壯是年五月武漢國民政府主席團視師鄭州且開會議于先生旋與主席團南至武漢焉

## （二）戰守紀要

陳樹藩之督陝也非由衆意實由陸建章以富平喪師愛子被擒氣沮力窮乞和陝人樹藩利用機會以保護建章之私人身命財產自任爲取得陝督之交換條件建章遂電袁氏力薦樹藩代己任陝西督軍兼省長藉得從容離陝未幾袁世凱死樹藩發電推崇謂袁爲中華民國不祧之祖其戴之尊陝人由是大憤樹藩既以諸黨人之發難取得軍政兩權後復對各黨人之握兵者嚴加限制除編郭堅所部爲警備軍七營外胡景翼則僅予以步兵團長編高峻所部爲一團而又以李天佐爲團長使高任中校團附嗣因高與李積不相能復使高爲騎兵團長率馬隊四連駐白水實陽予而陰奪之曹世英部則僅編爲騎兵營其餘各部悉令遣散既而黎元洪被舉爲正式總統以軍民分治號召

國人任雲南李根源爲陝西省長樹藩意雖不欲而無辭拒絕李既至警備軍以例直屬郭堅既見李尤傾心服從樹藩惡之適復辟事起段祺瑞誓師馬廠以討張勳爲名數日而定樹藩聞馬廠之師初起也欲藉以除郭堅乃組織討逆軍兩路使張鈞駐兵潼關爲觀望獨令郭堅率一軍由禹門渡河假道山西聲討張勳陽許以王飛虎胡景翼等團爲後應而陰囑王胡布兵河上不令郭堅一卒復西及聞復辟消滅段祺瑞復執國政乃急電晉督閻錫山謂郭堅以警備軍叛請嚴兵禦防堅遂潰敗隨軍參謀黨人宋元凱樊毓秀等均死焉堅輕騎走免由韓城渡河西行依其舊部營長張鐸於鳳翔由是恨樹藩刺骨樹藩亦免堅警備統領職而以副統領耿直代之既而段祺瑞因參加歐戰事與國會齟齬喉附已各省分組織督軍團脅散國會樹藩與焉遂以武力倡取李根源省長印信置兵守其門關中道尹井勿慕憤而辭職於是在陝諸黨人益憤咸欲起而討陳矣

當是時 孫總理在廣州召集非常國會風靡全國舊國會議員焦子靜乘機返陝匿居白水高峻所焦素知兵辛亥丙辰諸役均有戰功其後舊部散處陝軍中高其一也欲因之以討樹藩樹藩亦甚注意焦之行跡聞其歸也召之相見不應促之去亦不應日爲高畫計謀發難各地黨人又從而促之高遂於六年舊曆十月十九日以陝西護法軍

名義在白水宣布獨立傳檄渭河南北慙敷陳罪聲頗震陳聞怒甚隨命李大佐胡景翼王飛虎諸團自蒲富大荔分道進攻三日後各路兵即開至城下圍紮東西南三面開始攻擊樹藩又悉開步騎砲機關槍各營至戰地槍砲射擊均極猛烈時高之兵尙有分駐澄城間在白僅三連雙方攻守三日夜高漸不支因與部下計曰我軍起事每槍分配子彈不過百五十粒株守一地消耗易盡何若舍白趨澄合趙子健之兵東西突擊使敵軍憊於堵截姑爲牽制之兵以待他部響應遂於二十五日夜放棄白水縣城翌晨樹藩軍始知之遂入城而警備軍統領耿直卽於是日在省垣發難矣

劉錫慶者白水人也少與高峻郭堅諸人友善以精於射擊聞名陝右後以殺人避事依樹藩及樹藩督陝使充騎兵連長隸其庶弟樹滋部下甚寵遇之當郭堅由晉敗歸高峻與李天佐水火時卽與耿直謀發難而貌爲恭順使之不疑與耿各舉所親爲陳衛兵高峻在白水宣布獨立之第二日劉卽輕裝由防地入省謁樹藩白事畢卽與耿直密計事直曰事急矣峯五一部胡可以當全陝之兵倫吾儕不乘時響應萬一峯五失敗使陳得移兵而西不但方剛可慮陝事大勢亦從此去矣雖欲繼起不復可追峯五者高峻字方剛郭堅字也錫慶曰我部健者皆在渭南必歸而召之來悉令雜陳衛兵中然後我

攻於外兄應於內撲而殺之反掌間事耳渭南距省往返兩日若今去明來樹滋庸奴或不能解但陳氏必因而生疑甚非萬全之道請假我以旬日或更借他事來省方可峯五有傑材所部皆家鄉子弟樂爲之用決不至一戰潰沒必能綴陳於一隅以待我等之舉事也直稱善錫慶卽返渭南原防翌日卽遣其排長廉某外號瘋子者持信來省謁樹藩先見耿直告以錫慶命已藉投函圖陳之謀並請其帶已入見耿許之因見於督署劉函篇幅甚長皆假造爲黨人軍隊間勾結情形可信可疑意在以此動陳聽然後出不忌刺之詎樹藩久歷行間時有戒心當閱函時以目旁睨見廉方舉手向衣袋卽以有失軍人禮節叱之出耿直見事不成移時亦出廉旣負所託無以覆劉命遂潛匿耿所

當白水獨立前數週卽風傳有新疆購運之軍械從陝經過欲截而有之者不一其人俟之亦非一日乃忽於廉某之去省翌日馬槍一千支子彈八十萬粒到渭南劉喜曰此天授我不可失也明日槍彈西去劉卽命本連兵擊收其團長陳樹滋衛兵槍縛樹滋斗室中或曰陳五陳督弟也不如殺之劉曰渠弟兄皆遇我厚今免其死以報且樹滋庸夫殺之無益於事乃舍之隨以舊部騎兵風馳而西追至臨潼護送兵約一連方就食劉使兵圍之盡收其槍彈臨潼駐防王某歸降劉以騎兵不滿百人一日之中得槍近二

千支子彈百餘萬遂使飛騎報耿說明速發原因促耿卽發已則於臨潼募兵半月得千餘人率之西進

耿直見廉圖刺不成劉又無來期方焦急間飛騎遞劉函至時舊曆十月二十六日也急將廉某召至授以計付手槍兩支縛之作囚狀派健卒三十餘人聲言拿獲匪人解送軍署囑曰不死陳也無相見陳副官官汪某覺來人意非善不爲傳報方爭執間廉卽發槍擊汪倒地餘人遂皆開槍時樹藩方會前關中道尹陳某于客室聞槍聲愕眙聞一彈穿窗入坐客應槍死有人呼曰陳大人死矣解兵以爲樹藩已死不知其鹿代羊亡也而樹藩卽於是時奔署後踰垣逃出至其親信楊某營隨調憲兵營及軍警稽查隊與常駐西門外之模範營火速佈置耿直於軍署槍聲起時一方以陝西靖國軍總司令名義徧布文告一方卽以兵分佔東西兩城與省垣中心地之鐘樓樹藩所召兵旋至耿陳兩軍遂於城內開戰翌日劉錫慶新募之兵亦由東南兩門入城助戰而西安空前之巷戰遂起

當是時也黨人劉允丞王誠齋鄧寶珊吳希真李春堂陳謙仲等均集中三原三原距省不過百里前阻涇渭後負同耀非但爲商業匯萃之區亦爲兵家必爭之地向爲胡



景翼軍防地胡部軍官多學生出身識大義明事理平時與諸黨人均以師友相切磋其關係最深而可與祕謀者尤莫如劉允丞王誠齋二人蓋劉與景翼岳維峻鄧寶珊楊瑞軒董振五張義安諸多居里交莫逆而王則爲董之師張又以董故而師事王也於是以劉王等人之運籌慫恿胡部舉義時胡駐蒲城興市鎮允丞親至軍中密謀發動胡曰余非不知誤國禍陝者之罪在必誅但舉事後必與行同土匪者結合恐因伐賊而又引起大亂將來不易收拾豈非因救國而誤國因救陝而禍陝乎鄧寶珊曰人方疑君君乃慮及於此設陳果加君以通耿之罪名君亦俯首認咎耶與其他日受通匪之罪名何若仗義執言與師討賊且得美名胡雖爲之動容而終躊躇欲有所待其第二營駐富平之美原鎮營長陳世鈺昵於樹藩胡令開至興市擬先集中兵力開會議劉恐謀洩乃密函楊瑞軒使繳收陳之槍械蓋瑞軒爲陳之第一連連長力足以制陳也詎送函人誤投世鈺世鈺密之卽命楊連先開俟其去遠方同餘連開拔甫出城忽令急步南奔夜行九十里黎明自渭橋渡河疾趨歸省自北門入報樹藩稱奉胡命援省者時省垣戰事已三日夜兩軍均憊甚耿軍之守鐘樓者飲水斷絕兵士至潑濾尿汁潤喉吻忽聞有兵來自北面槍聲甚厲樹藩軍又揚言胡軍全部來援耿劉知不敵因相率由南門退出郭堅自鳳翔

率部來援至咸陽之三橋鎮聞敗耗亦引還耿劉諸部既退出長安經鄠縣過鰲屋繞太白而西據岐山縣城掘壕溝修戰備將前所截得之子彈分輸鳳翔鳳翔爲西路第一堅城郭堅自山西敗歸卽駐此爲根據耿劉西來亦以此也樹藩既遭踰垣之險恨耿刺骨及其西去頗欲以全力對付之除令王飛虎李天佐牽制高峻外餘如劉世瓏曾繼賢兩旅長帶同嚴錫龍張金印張鴻遠各步團姜宏模曹位康各騎團俱令分道西進是時胡景翼亦回省其所部原屬劉世瓏旅因卽命爲前鋒先是興平鰲屋俱有耿部少數駐紮樹藩軍先後圍而攻之耿知數處兵力單薄陸續調回岐山樹藩軍開至岐城下卽在東南北三面包圍關西路者恐郭堅之出其後也耿既佈置城守完密卽出兵城外與樹藩軍連日接戰互有傷亡城東有鳳凰村地甚高得之可以下瞰城內樹藩軍多營來攻耿軍守將簡大猷勇敢士也與其部下皆善射擊槍不虛發樹藩軍不能取勝至日暮樹藩軍將收隊大猷率其徒數十人急攻之得槍彈無算至第六日大猷忽中流彈死耿軍氣稍衰樹藩益令劉世瓏合兵圍之內外交通幾斷是時張鴻遠嚴錫龍等以與樹藩私人關係頗用命胡景翼則欲利用時機以達其實力擴張之目的遂與耿劉密函往來令其讓出岐山東與高峻結合俾已軍得以先入功冀升編爲旅多得槍械子彈然後響應以

爲交換條件約既定耿劉卽率衆由北門出胡果以首先克復岐山告捷於樹藩八日夜之血戰暫告終結耿劉自岐山退出後循北山東行至富平之美原鎮樹藩復使胡景翼團跟追之攻守五日夜耿以岐山之約責胡胡請耿再退耿復棄美原而東與高峻合兵攻佔白水越數日南下襲攻蒲城耿爲前鋒死於城下而張義安遂發難三原

三原戰事之醞釀原因有三（一）岐山戰後胡景翼以先入故對樹藩懷極大希望顧樹藩微聞胡耿通函狀疑之故對胡之希望略無表示且戰後照例之槍彈補充亦靳而不與因之謠言蜚騰釁端漸開（二）胡部營連長中學生最多如張義安董振五馮毓東楊瑞軒等逐陸之役皆與有力耿劉戰起時皆踴躍欲動而胡則以欲達其實力擴張之目的抑制之及樹藩不信任之事實表露鄧寶珊等又日夜催促劉允丞諸人復左右之張董等遂不俟胡之同意而發難（三）岐山戰後耿郭先後東來胡軍以追擊爲名亦東開至蒲城富平三原等處三原爲陝省商業中心地距省僅涇渭之隔樹藩甚不願胡部屯留因令其旅長曾繼賢帶同團長嚴錫龍來原駐防而假胡以剿匪司令名義令盡率所部東擊高耿時胡軍之在三原者爲張義安之備補營兵不滿三百曾嚴甚輕之迫令開拔臘月十三日夜大雨雪曾嚴軍均圍爐不設備張義安先使董振五等僞

爲查城者分繳各城門曾嚴衛兵槍又於各要隘港口派兵布置斷絕曾嚴各部交通乃向曾之旅部嚴之團部四面攻擊戰事竟一日兩夜悉解繳其軍裝曾嚴縋城遁去至十五日平明始定而曹世英率部至自耀縣胡景翼亦自富平相繼至乃共樹陝西靖國軍旗而各統所部爲左右兩翼軍張義安卽率一支隊由原出發西自興平渡河直趨省城

高峻當岐山戰爭前後率部往來白蒲富原耀同一帶時與王飛虎李天佐部小有戰事及耿劉東來郭堅亦舍鳳翔至白水四人舊好甚篤遂結合爲一其時白水爲王飛虎部營長王永鎮駐守高與郭耿等部合攻之三日王不敵潰圍走白水再爲高峻所有顧白水小縣也高耿郭劉四部居之供不應求之事時有所聞因議襲蒲城爲根據地十二月十四日夜卽三原戰事第二晚曾嚴敗走時也耿直親率所部進襲蒲城黎明至城下奪門入城時胡部第三營岳維峻在蒲三原之事不知也維峻與天佐皆蒲城人且厚交恐桑梓殘破因助李巷戰而耿衆復不守紀律時有爭取財物者耿使人嚴令禁之緊急之際命令不易傳知他部接應者又失時旭日東升耿見事不諧退出西門忽中流彈死當耿襲蒲計定差武功人李慰亭送信於耀縣曹世英時曹已接胡景翼自富平函方

爲三原派援卽令李持覆報耿力主蒲不可襲謂三原旣勝蒲爲疥癬之疾無關要害且李雖助陳可以戰勝之威改變其態度化仇爲助蒲距耀百里十五日下午李方抵蒲而耿是日清晨已戰歿故耿直至死不知張董輩之應已也

陝諸將中與陳樹藩最惡者莫如曹世英而諸黨人又多在曹所及曹與胡組織靖國軍爭爲雄長意見不一其後雖經調解分其軍爲左右翼各稱總司令然內幕之齟齬時所不免樹藩知之間使一日數至許遷胡軍第三營營長岳維峻爲團長令其圖曹岳以告胡胡以告曹曹遂拍電樹藩責數其罪樹藩接電知離間不行卽命劉世瓏曾繼賢率兵由涇陽進攻三原胡曹各由西南兩門應戰自晨至暮勝負未決時郭堅高峻劉錫麀各部均開至高陵一帶沿河屯紮預備攻省城某君者機智士也揚言劉錫麀率千餘騎由東南來助戰胡部聞之恐劉收戰功遂選精卒徐元凱介天青等直撲敵陣大敗之靖國軍遂獲全勝奪獲大炮一尊機關槍兩架馬步槍無算而徐介等亦陣亡

臘月二十四日左翼軍王祥生等攻涇陽當是時右翼軍張義安已由興平渡河過盩厔等縣進攻長安連獲勝利近逼省城捷報至三原羣議宜舍涇圍省爲根本上之解決世英遂於二十六日到高陵會同郭堅高峻等軍渡渭河駐新築鎮二十八過灞水與

樹藩軍戰於灞橋十里鋪光臺廟水腰草灘各處由東南而西北戰線達五十餘里自晨至日暮樹藩軍不支急將駐涇陽之樊鍾秀部調回分防省西胡部田玉潔遂進佔涇陽是日左翼軍之在省東者已進至韓森塚旋以食盡戰地又無堅城可據且悉陳增兵慮其來襲遂仍退回新築鎮

張義安渡河後連戰皆捷二十九日進佔省垣西關外之大營盤樹藩悉其精銳來攻集中機關槍大砲各營連作猛烈之射擊張見敵軍來勢知東路曹軍已退卽持冷靜態度非敵軍攻至最近目標最顯時嚴令軍中不許還射一彈然時一發槍樹藩軍卽死傷滿地戰至晦日樹藩軍不能尺寸進張與諸將計曰敵軍如此攻我者知我軍子彈不充欲以火力取勝也連日以來敵已耗彈不少死傷亦多其氣餒矣直薄而進縱不破敵勝算可必卽率衆越壁直撲敵壘樹藩軍雖欲延戰而兵士已紛紛退卻急欲全軍入城七年陰正月初一日張軍遂進駐省西關陸軍學校及其左右民商房內翌日樹藩軍登城俯射槍彈時從窗隙入且中人張覺其地不可久持整軍退出仍前駐大營盤及甲種農業學校大小雁塔等處圖與左翼軍攜手

左翼軍退至新築鎮耿家集等處時聞省城方面砲聲隆隆或疑樹藩軍內變或疑

張軍進城後由三原傳來消息始知右翼軍已攻入西關復退出各情形羣情譁然頗有歸咎左翼無故退卻不能分敵兵力者曹世英復聯合郭堅高峻各部圖再舉適王飛虎之第一營營長楊彪第二營營長王永鎮相繼由朝邑同州來屬曹擊當前鋒而省城南門守者劉某亦來函約爲內應於是東路各軍遂再過灞水駐紮光臺廟水腰草灘各處樹藩軍甫接戰卽敗去左翼軍長驅大進前綫一部有入省北關者樹藩急由西路防綫抽出精銳連夜轉開東路曹郭諸軍戰一晝夜疲甚又見敵軍新增恐不能勝相持至傍晚復退回新築鎮翌日拂曉樹藩軍突過灞水來攻各部命令不能一致未及商榷應敵爭先潰退渡河而歸

東路諸軍二次攻省既退樹藩又移其精銳專力西路於是有小雁塔之戰時已近燈節矣樹藩與其將劉世瓏等議曰我不意耿直之後復有一張義安今耿直已死而張且如猛虎長蛇盤據城外不出奇以挫之其鋒不可當也聞小雁塔兵不滿連張義安當不在此今宜先牽制其大部然後進圍該處濟以極大之火此部摧滅餘必氣餒自可迎刃而解矣計既定卽出戰而張軍之在小雁塔者適爲董振五樹藩軍張鴻遠陳世珏等以步兵五營合圍之砲兵機關槍連又相繼至彈射之密如飛蝗蔽空轟轟如烈風震

韞塔外土牆強半摧毀成平地董一方督戰一方命軍士於牆下掘戰溝爲掩護悍然不顧之氣與敵軍攻勢俱增至夜分樹藩軍終不能進一步而攻益烈董軍時有傷亡衆懼董慰之曰我以數十人守彼以全副精銳無慮百倍來攻戰一晝夜不能如我何敵之伎倆可見矣諸君何懼爲况義安在外豈能袖手乎萬一不幸敵益增兵我援不至絕不令諸君獨死董某獨生也衆感動守益力至拂曉張義安果以兵來援樹藩軍退圍始解而綏遠盧占魁亦於是時率所部南來靖國軍之兵勢益威

盧占魁者察哈爾人擁有騎兵數千嘗據河套數年曾受北政府編爲旅長旋叛去至是標名西北靖國軍率所部自甘邊慶陽府欲西攻甘肅聞胡曹郭高等與樹藩戰連月不休使藍田人某以書至三原願以所部助戰胡曹等初不以爲然繼聞其前部已抵耀縣乃推劉允丞鄭思成爲代表赴耀縣歡迎觀其是否可用盧到耀後即派隊分紮渭河沿岸與高曹等議進兵並言其騎兵堪戰願當前鋒於是協同左翼軍復渡河攻省曹令步兵楊應士永鎮劉一敬黃占彪石象坤等作主兵而以騎兵王祥生程星五劉錫騫等協同盧部任游擊突騎高峻郭堅亦各率全部由東繼進自草灘至臨潼戰線延長八十餘里曹軍甫過灞水即與樹藩軍劉世瓏遇楊王等攻其前盧部以騎兵迅出其後劉



腹背受敵帶衆向東南集載原逃去所攜之八生七砲多尊幾爲曹部所奪樹藩軍之在斜口者呼應遂中斷程星五以百騎襲灞橋下之灞橋無險可守惟兩堤能粗爲掩護樹藩聞灞橋失守甚驚以其關係斜口臨潼新豐諸軍交通也隨以重兵由橋西來攻其部分布橋東者又以歸道所在亦由東面來攻星五軍星五兩面拒戰自晨至西傷亡甚衆而應戰益堅無何盧占魁親督精騎出橋東樹藩軍側樹藩軍大潰退是日郭高兩部遂進佔臨潼新豐盧部亦進駐斜口

靖國軍攻省不下非兵不强將不勇勢力不敵也分子複雜號令不一左右翼消息復不通必由三原轉遞往返稽延軍機是誤此進彼退步伐不能一致實爲諸因之總因然左翼軍第三次進攻獲勝後樹藩軍亦疲於東西應戰防線曲疊殆及百里及用避實擊虛之法知曹軍本不耐戰而盧部無紀律因出其精銳數營猛攻河口盧部軍甫經新勝又以邊塞騎兵素無斥候戒備一遇敵攻未及呼援倉卒先退東西諸軍聞之因與俱退過河於是曹軍駐渭橋盧軍駐雨金郭高兩軍駐交口渭河自此爲南北天然之防界矣計斯役王永鎮部死傷獨多

省西有蒲陽村者距城五里許右翼軍張義安以營餘兵攻之樹藩軍十餘營合力

來戰未幾卽向東南敗去張追至一大隧中樹藩軍復回四面圍攻之張知中伏子彈且盡而地勢又極惡衆情憂懼張命人持舊日備補營旗高懸曰此數尺布可以援我否樹藩軍見之知張在圍中相顧莫敢先進但遙以火力壓迫而已日將沒圍如故張猛悟曰兵志不云聲東擊西乎隨由從兵中收集子彈十餘排分給二卒令其潛至隧東南口以排槍向敵射擊囑曰彈盡卽返樹藩軍果疑張欲乘暮潰圍走盡移各方兵向隧口堵截張見敵軍移動知計已行卽率部潛出隧西北口包圍蒲陽村地下掘壕牆上穿孔不數分鐘諸事完備張躍身當先以手搏膺大呼曰我張義安也繳槍者免死村內樹藩軍多數出戰殘留二百餘人皆衛輜重守傷病者突聞張至相顧駭愕莫敢枝梧悉請降遂盡有其軍實及樹藩大部覺而靖國軍旗已高樹於城上矣

樊鍾秀有衆千餘時隸樹藩軍爲團長三原戰後樊隨曾繼賢駐涇陽嘗約靖國軍曹部攻涇願爲內應旋中變不果及靖國軍兩路攻省省城空虛樹藩急撤回涇陽樊軍使以所部四營駐省西魚化木塔尹家甘家四寨爲屏蔽張義安自進佔蒲陽村後卽使李雲龍馮毓東各營分攻魚化尹家兩寨均尙未下陰正月十九日大雪至夜雪深尺餘義安忽令兵士各用麻繩繫縛鞋襪疾馳二十餘里繞魚化寨之南至甘家寨俄頃登城

城中守軍尙不覺也其營長王泰來遂以衆降因馳書與樊勸其舍逆效順樊見實力大虧又畏張神威覆書謂願往當田整頓隊伍請調退兵之路義安允之卽令各營罷攻翌晨樊遂率衆東行張軍皆於壁東歡呼送之樊全省東三兆鎮卽改建靖國軍旗由舊田越秦嶺入商雒暫爲屯兵休養計次日胡部蔣世傑王俊生靳伯綸康振邦等均自三原分率步騎來會軍威益振乃分道進攻省城義安自率隊進駐南郭外距城四里之吉祥村

梅藩既屢敗於張義安軍兼以兩路敵勢力日促乃約豫西劉鎮華入關相助以省長一席爲餌鎮華當辛亥時嘗隸東路招討都督張鈞部下民國告成率部歸河南嵩縣編其部爲鎮嵩軍約一旅之衆樹藩與有舊且以其近而易至也因正當靖國軍兩路攻省時故劉許之而未敢動及左翼軍既退劉遂乘機率所部至西安時已正月杪劉入潼關先以書抵三原告胡曹諸人謂伊此來欲作調人且請先退兵胡惡其先以禮來也拒之不情又以義安孤軍久頓堅城下非善計因連函催張回軍作他圖張忿然曰初不料同志諸人不可恃如此夫陝事成敗在此一舉若一旦舍去兵連禍結胡所底止三秦糜爛萬姓慘劫茫茫前路嗟咎誰我男兒也不能爲國除賊徒使八百萬同胞淪於浩

劫不復言實無所計立入地間隨以函覆胡曰我自決志起兵卽置生死於度外今我戰而勝賊可逐志可遂不勝以一死謝全秦父老勝驥顏人世不尤多耶然我必死於陝省二十里內此外無死所矣終不返兵胡不得已乃許其不撤兵而促其單人暫回三原決大計張因稍退兵至鄠縣輕騎歸原面胡計事畢翌晨卽復往前防而樹藩軍與鎮嵩軍已攻鄠矣張行過涇陽晤田玉潔由電機竊聽知之卽西進渡河至鄠隨行僅十餘騎破圍而入城中見張至如增勁旅千萬出城與戰大敗樹藩軍張因督衆猛追竟下流彈死凶聞至三原胡旋命董振五代將回軍三原自此右翼軍以涇河爲防線咸陽以西乾醴興武勢鄠岐郿等數十縣悉入樹藩軍範圍

七年三月靖國軍東西路旣退渭北樹藩軍旅長劉世瓏率一旅之衆自渭南渡河至蒲城富平間之施家鎮致書胡部岳維峻約相見議事蓋劉初爲陳樹藩辦軍官圍時岳維峻胡景翼田玉潔均爲學員與劉有師生誼張義安旣戰死欲藉此以收東胡部也維峻得書行衆咸勸其宜帶兵爲備乃以一連自隨及近所約地點劉忽以衆猛撲維峻倉猝抵禦幾被包圍適曹世英部騎兵連長程星五來援合力反攻敵大潰退奔十餘里而還靖國軍東北屏蔽遂得無恙

郭堅所部既棄臨潼乃轉圖東路欲取同州爲根據地同州北連韓鄒東通絳潞南瞰二華潼關可以塞樹藩軍東方交通同州駐軍爲樹藩團長王飛虎堅先使其副官長楊介往說之使反攻樹藩飛虎猶疑莫決堅遂於二月二十一日黎明襲攻同州登城者已數百人以後隊愆期未下乃圍焉是時樹藩因省圍既解又得劉鎮華鎮嵩軍爲助而新購大批槍彈又運至遂有大包圍之計劃時郭堅已移駐羌白距同州二十里高峻亦離交口駐關山爲郭後援樹藩計曰靖國軍攻省不下內隙起矣胡景翼駐涇原可以和誘由高陵以東曹高郭輩非以兵相見無二道也遂使其將劉世瓏白弋人等西出乾醴直貫三淳遙爲聲援不急東進樹藩親帶張鴻遠陳世鈺曹位康及鎮嵩軍之大半自渭南渡河合故市姜宏模同州王飛虎蒲城李天佐等衆圖郭高其意以爲胡不東援郭必西退然後合圍涇原一戰成功陝事可大定也故其致鎮嵩軍團長柴春霖書略曰匪多騎兵善邀襲宜特防羌白關山諸匪多用火力壓迫總以形格勢禁四字爲要圖能與匪戰於涇原附近則一隅窮促胡景翼言和他匪瓦解矣云云此樹藩親筆關山戰後爲靖國軍所得者也

姜宏模者本爲胡景翼前所帶之第二團團附兼騎兵營營長與胡爲兄弟交最親

善岐山之戰獻計於胡欲藉軍事會議召樹藩諸將劉世瓏曾繼賢張金印等聚而殲之反兵討陳胡不用及胡部東開姜卽以所部騎兵分駐渭南之固市下邽等處張義安發難三原事前未通知姜姜復銜之故於靖國軍之攻省不爲左右袒及樹藩軍渡河姜附陳時出兵斷羌白關山間之交通高峻等患之遂決計與姜一戰兩軍相見於下邽城下時高以步兵當中路盧占魁指揮官弓富魁以騎兵張左右翼高與約曰姜宏模年少而心機最多宜以法亂之號令進則以兵退號令退則兵速進姜可擒也旣而高部王仕雲與戰姜悉衆來攻未數刻鐘高命發衝鋒號王射擊頓緩盧衆亦在原地盤桓若無聞者然姜大疑無何高改發收隊號王率部猛進盧衆亦風掃電馳出姜後姜初以爲靖國軍後方有變故收隊方欲尾擊而四面已被包圍腹背受敵因大潰高盧各部乘勢橫擊盡繳奪姜軍械姜爲盧衆所獲給言兵也棄槍逸去

關山距下邽西卅里宋范文正公仲淹築城屯兵以防西夏者也當樹藩渡渭時曹世英卽踵高峻開駐其地城東北有村曰界坊再北清寺楊應王祥生等分防之胡部岳維峻董振五鄧寶珊李雲龍康振邦等亦同時至關山西南砲張查理相橋各處駐紮蓋預知樹藩之必來攻也樹藩自分兵攻羌白一方卽至關山附近張家店駐紮佈其軍於

官底傅馬村趙村冉家南北宋大小石田市等處與靖國軍各成子午線相對峙相距無過二十里者而界坊爲攻關山必經之地樹藩所駐張家店與界坊相距最近楊彪在曹部號爲能戰故當此衝樹藩軍開始攻擊卽取威嚇主義火力甚盛鎮嵩軍初到陝不明真相以爲易與張鴻遠助之進攻尤力戰二日矣樹藩軍砲彈突碎去楊所居之屋頂楊衆甚駭楊曰此偶然耳亦作戰應有之事何駭爲至第三日夜衆憊甚適胡部李雲龍鄧寶珊董振五等來援樹藩軍見終不能取勝而鎮嵩軍死傷尤多遂漸引去同時樹藩軍在清寺亦爲同一之攻勢清寺毗連界坊得清寺卽能繞出界坊之側至關山之後也曹部王祥生李養初守之清寺西宋堡石象坤守之清寺城小而薄王知不可恃舍而逆於城外樹藩軍以火力制勝砲彈之密在陝戰中不多見王軍子彈本不充而所部馬青苑甄士仁等皆陸軍學生頗有戰事經驗均能竭力守防至第三日子彈告罄有一槍僅餘數排者有數槍不存一顆者土與諸將終不退未幾胡部鄧寶珊帶人來助弓富魁初解羌白圍亦由東來出陳後胡部馮毓東亦自富平至張橋距傅馬北十餘里樹藩腹背受敵遂盡撤前線之兵向下邽固市等處退却而胡軍駐相橋之蔣世傑部亦於關山開戰後第二夜會同李雲龍部襲破田市樹藩軍擒其營長劉登科

當關山戰事正激之際樹藩將劉世瓏由醴泉方面渡涇河聲言欲取涇原胡部田玉潔與劉有師生誼避舍讓之劉軍直進至涇西不及城者十里許劉初給其部下言田與已善許獻涇陽及至城下田嬰城閉門不爲動胡景翼復親身由原至涇欲與戰劉遂不敢攻而退樹藩大包圍之計劃至是遂敗而靖國軍渭北之局勢於焉以定

渭河口者渭水入渭之口也樹藩軍自關山退却胡部董振五卽進駐其地距樹藩所駐之故市僅十里許樹藩惡其逼也於某夜派兵來攻時三月將盡又值陰雨董曰天雨地泥澤禾稼且爲害命軍士盡裸只喊殺而不鳴槍向敵猛進急電驟雨之下董身先士卒橫貫敵陣敵軍驚潰董始命以排槍追擊之且十里日出始還

鄧寶珊在靖國軍中與張董相善且有能名樹藩惡之甚欲得而甘心焉鄧時以少數兵駐上漲渡之某村樹藩軍偵之悉以數營乘夜來襲鄧適於午間他去代以馮毓東部將霍龍光亦戰將特以初至地理不明倉卒應戰竟死於亂軍中部衆殆無免者董振五聞槍聲急率兵來救樹藩軍方戰勝正在搜羅民間財物忽聞董至皆爭先潰走董尾追之盡奪其所獲遂仍以一連兵駐守其地此皆關山戰事之餘波也

羌白在同州東爲渭北巨鎮閭閻繁盛商旅輻輳北可以攻蒲城東可以扼大荔南



渡渭河堪阻二華交通郭堅據之分布其軍於大荔四週村落以攻王飛虎樹藩初渡河至渭南之孝義鎮卽從間道召飛虎及李天佐議破堅軍三月十五日飛虎由東面進天佐由北面進樹藩親率鎮嵩軍全部由西南兩面進堅使李奪東拒飛虎兵於銅堤村王仕雲王孝生王鎮西孫步武等北禦天佐兵於龍陽鎮而親率劉福田麻振武等戰樹藩飛虎招韓城硬肚子三百名使爲前驅硬肚子者拳匪之餘孽也設爲吞符誦咒能避槍彈諸說誘惑鄉人一般鄉民不堪兵匪之蹂躪求起而抗之之術以爲惟此最工而韓城爲其發源地飛虎遂招之爲助硬肚子皆鄉民無制服無槍械持刀矛作戰是日潛至銅堤村之洛河浮橋堅軍所設以通往來者也橋幾盡奪乃覺急使其連長徐太祥以勁卒數十人擊之河干硬肚子死亡殆盡飛虎營長高步雲充前敵司令猶督兵臨陣兵士見素所信仰之硬肚子且死魄盡落皆返奔太祥乘勝猛攻生擒其連長蘇靈等三十人獨步雲逃免同日攻龍陽之天佐部亦爲王仕雲等所敗惟樹藩兵至羌白城下堅親禦之三日士卒皆死戰盧軍弓富魁自敗姜宏模於下邽偵知羌白有戰事亦移兵來援樹藩軍乃退去堅復引兵圍大荔此關山戰前之役也

樹藩自關山退却後恥其師出無功思欲就靖國軍中摧滅一部以償其代價因留

其少部於西牽制胡曹各軍而以重兵東圍羌白而郭堅自初次羌白戰後圍攻同州愈急數以書辱王飛虎至云爾爲渭北飛虎而不飛爲陳家走狗而不走王終不敢開城延戰及樹藩軍再至堅乃盡撤圍同之軍集中羌白以待之樹藩軍攻數日莫能下郭且乘夜出襲之迭獲勝樹藩親臨督戰並合張鴻遠等實行包圍以絕內外交通高峻先自關山來援弓富魁繼之樹藩分兵迎戰相持四十餘日時已四月杪城內糧草俱盡曹部楊彪及郭部張鐸亦來援均未得勝利乃引兵西擊天佐兵於興市鎮夜襲下之郭堅乘夜雨自羌白突圍出走興市樹藩軍遂佔羌白時已六月下旬矣

郭堅既由羌白退出其前所派攻郃陽之馬騰蛟又爲守城之硬肚子所敗亦引兵來會郭之圖同計劃至此完全失敗乃與曹部楊彪等改而圖西原因如下（一）胡曹高盧皆有固定地盤而興市一鎮殊不足屯大兵顧而之他遂生關地鳳翔之心（二）陳樹藩於春間命西路各縣廣種雅片此時正屆烟捐收納之期靖國軍佔地既少餉項常缺郭且新出圍城因思與陳爭收此項進款（三）雲南葉荃輩援陝消息傳至靖國軍滬上駐員又來函言廣東軍政府接濟陝軍槍械託由援軍轉交鳳寶爲南軍必經之路皆欲早日接頭優先取領合此諸因陝西戰事遂由省東一變而移至省西

先是諸黨人鑒於各軍號令不一作戰困難乃推王子元張立卿赴滬商請于右任問道由陝北歸三原各部代表在原開會公推右任爲陝西靖國軍總司令時張鈞亦問道來原衆以鈞知兵推爲副司令並改編郭樊曹胡高盧爲六路其次序由各代表抽籤定之陝西靖國軍至是始歸統一

郭楊等自興市定議後即先後出發楊由耀縣經淳化之通神溝阻於當地硬肚子者多日郭部經耀縣之南繞醴泉至乾縣城下樹藩守兵棄城走堅遂佔領乾縣命王珏郭英夫黨玉崐守之分遣張申李生新進取扶風武功張鐸進取岐山堅親率百餘騎至興平樹藩軍連長賈福堂胡綬卿等殺其營長王振藩迎郭入興平旣而扶風武功岐山皆告捷復遣李奪收復郿縣郭之第一路至是乃大發展遂編其所部爲十支隊又以賈福堂爲營務處長使參謀蕭榮綬爲之副蓋因賈出身行伍行動多不法性復反側故使蕭助之即所以監之也賈果未幾而與蕭齟齬乘郭略地扶風乃復叛囚榮綬送樹藩以自贖興平遂不復屬靖國軍

樊鍾秀自至商維欲進取南陽阻於豫軍者累月因用惠又光言復由渭南出山東襲潼關克之得砲多尊槍彈無算樹藩聞之派兵來攻其前駐潼關之一部於潼關失守

時東走至河南之閿底鎮至是亦由東來攻樊腹背受敵盡棄前所得西走退入藍田山中及聞郭堅在西路勢復振乃率衆出臨潼之馬額攻零口欲通渭北軍不勝沿山繞長安南境西攻鄠縣亦未下乃駐軍盩厔終南鎮與郭部遙爲聲援

盧部弓富魁二次援羌白蹄卽分屯臨屬雨金原屬大程富屬覓子淳屬方里等鎮及見郭部由西來者多攜鴉片皆躍躍欲染指富魁遂率之而西分駐興平扶岐等縣

自郭堅棄羌白同時高峻卽回白水及受第五路司令關防又聞郭等皆西去亦欲擴大地盤韓城人強健郃陽人王得標等向受焦子靜意欲以韓郃歸靖國軍醞釀已久秋節日高由澄縣猝以兵東至郃陽城下城內守軍無多與知事賈某皆逃走高遂佔有郃陽高之下多刀客無紀律旣得新地暴橫時聞賈某乘之憇鄉團與抗所謂鄉團者皆硬肚團也一日聚衆且萬人鳴鑼鼙鼓挑戰城下高初戒其部下曰彼輩受人愚弄我不忍以敵待之自來聽其自去耳自晨至申硬團氣不少衰且圖登城高部某營長曰事急矣我不忍人人將忍我遂派數連出城擊之斃硬團三百餘人衆乃譁潰同時第三路第二支隊楊彪亦收復韓城

自關山卻敵後胡部岳維峻李雲龍馮毓東鄧寶珊董振五等均節節前進先後攻

克大小舍權家各堡寨與樹藩軍劉世瓏部戰於上漲渡大破之會屆收麥乃暫令停止進攻至八月聞樊軍復自商山出攻零口岳維峻等卽奪渡濟渭與樹藩軍中流交綏悉破南岸敵壘進攻馬駒寨馬駒寨者通零口之要衝也小堡密布地形如箕樹藩軍張鴻遠等駐守之我軍仰攻側擊悉覆其巢及聞樊軍西去乃復退歸

是時靖國軍副司令張鈞自終南樊軍繞道至三原與總司令于右任議攻守方略樹藩軍駐防下邳之曹位康與鈞同鄉而有舊約以地應靖國軍秋節前三日遂與胡景翼有東路之行至關山曹復遲疑不決適于總司令丁內艱召鈞歸原代其職務胡景翼南至故市附近以書召姜宏模姜佯應之約胡入城計事胡以舊交甚篤從數人入城姜留之以告樹藩樹藩卽至渭南陳兵故市附近使韓慶綬入城促姜獻胡時李天佐亦自蒲城至故市李韓等遂挾胡至渭南見樹藩相將入省囚之胡部岳維峻董振五馮毓東等初聞胡被留卽以全部圍故市曹世英率王祥生等亦至胡致岳董等書與決曰景翼判處死刑之日卽陝西靖國軍絕續存亡之時余雖不如古人然常以關岳自期寧賜賊而死不爲降將軍也願諸兄弟努力前進無忘張義安於地下則景翼雖死之日猶生之年也岳董等得書圍益急李天佐與岳皆蒲人情素洽出見於野言已與宏模久欲響應

靖國軍特以陳樹藩不易除耳今欲借胡誘陳俟其至則殺之然後改樹靖國軍幟因請退兵一面以待陳來岳信之即撤南面圍李韓遂得挾胡以去及覺已無及矣胡去之二日李再出至岳所計事胡部營長楊瑞軒等恨其賣胡率數人突入室擊殺之中七彈死而于總司令旋以岳維峻繼胡爲第四路司令

鳳翔於漢爲扶風郡西控隴東南通巴蜀爲軍事上必爭之地第一路司令郭堅西來之目的在焉九月十六日郭令麻振武李奪各支隊進至鳳翔東郊分駐附近各村落而自引輕騎西進收復涇陽隴縣駐軍李東材郭之舊部前充警備軍二營營長者也因命仍守其地復率騎南行至寶雞寶雞守軍北洋陸軍十五旅聞風先遁郭分兵守之復還鳳翔是役也往返四日計程五百餘里云

自六年冬西南靖國軍聯帥唐繼堯即聲言遣兵援陝適陝代表王建極等復請援於唐七年秋七月唐遂命葉荃率所部雲南第八軍由四川經甘邊至隴縣李東材以城降葉遂委爲前驅至鳳翔鳳翔守兵魏進先呂金堂梁文炳等前迫於葉軍後阻於郭部張副司令鈞亦由三原西來以魏梁諸人均爲其昔年舊部使其參議劉承烈致書約降鳳翔乃下陰曆十月初三日張副司令鈞入鳳翔郭司令堅繼之葉荃又繼之張旅派兵

助樊鍾秀克盩厔於是西路各縣除鄠縣興平外悉復歸靖國軍範圍

靖國軍既得葉軍增援西路各縣次第收復且欲作進一步之計劃陳樹藩懼一面向北庭乞援一面商請井勿幕彭仲翔以調人名義至三原欲使收束胡部以抵制葉荃顧井爲民黨鉅子久爲樹藩軟禁省垣此時乘機至三原卽被推爲靖國軍總指揮彭授軍務處處長井旋率岳維峻董振五等西至鳳翔晤葉商陝事是時賈福堂復叛靖國軍多爲殘暴行自咸陽以西時人謂之黑暗地獄井自鳳翔還卽集合第四第六兩路兵環攻興平數日未下時井駐後方十一月十九日忽得郭堅書邀至距城十五里之南仁村計事及往郭固未在則見李東材迎之入室方寒暄間忽有人報郭司令至矣井出往迎甫至門外東材遽自後發槍擊井及從者皆死東材取井首馳省報樹藩樹藩遷東材爲漢武軍統領郭書李之僞作也李降葉隨至鳳翔郭以其舊部請葉歸諸已不知李固別具肺腸初起草澤甚忠郭及爲警備軍營長致富至百萬郭敗更任樹藩團長駐防隴縣細於勢降葉至是復通樹藩以殺井或曰井之死實郭堅使東材殺之郭與井書亦真而非僞且所欲殺者又非僅井一人並欲致岳西峯董振五鄧寶珊諸人於死蓋諸人皆同時被邀者也且使既殺之後卽持諸人之首投陳得便殺陳然後彼方得以橫行無忌詎

岳董諸人久在行間且知郭不可信未肯往遂免於難耳或又曰郭堅本不欲殺井由其參謀長馬某設爲方略使東材殺之華君孝康井案紀實載其證據甚確此兩說也姑並存之

井勿幕既死靖國軍之攻興平者軍氣爲之頓挫卽各罷歸是時樹藩以西路各縣俱爲靖國軍所佔軍餉無來源乃使北京非法國會議員高某向日本所經營之銀行借債四百萬元以陝西紡紗廠優先權爲抵押靖國軍聞之益大憤各路代表會於乾縣協議會攻省城而奉軍忽入關先是奉軍師長許蘭洲率部駐鄭州年餘早有入陝代陳之心樹藩屢電北庭謂其力足以制靖國軍拒許使不西來及聞葉荃至陝而南軍王安瀾石青陽等後至者尙多因請派援許遂以援陝總司令名義副以北洋軍第四旅旅長張錫元先後入關樹藩亦三路出兵使張鴻遠出興武爲中路白弋人出醴泉爲北路鎮嵩軍出鄠縣爲南路以與靖國軍抗張鴻遠至興平誅賈福堂盡有其槍械財物隨至武功備戰而葉軍自抵鳳後頗思與樹藩軍一戰以驗其虛實又因胡盧各部攻興平未下井勿幕又死益憤因東至扶風武功間之杏林鎮以郭盧兩部爲左右翼進與張鴻遠軍戰鴻遠素號能軍初交頗洶猛葉軍死傷甚多但越境出師又且第一次出戰未肯示弱於



人故踐屍而進愈見奮勵至午分敵軍節節後退尾追十餘里已近武功城下矣方冀兩翼兵乘勝逐北乃後方槍聲忽大作郭盧兩部互相衝突張聞之復回戰葉軍氣餒幾致敗蓋以盧部兩卒負傷倒地郭部某利其自來得槍遽致兩卒於死攜槍去盧部覺乘郭某部不意擊殺十餘人而奪其槍遂舍敵互訐葉詢悉恨甚而無可如何各軍遂扼守杏林周圍各村塢郭堅旋由華家塢渡大壑進據興平縣城東北之岡兒村復派騎出東大道經大小韓店至馬嵬獲敵轉運糧秣之參謀薛驊殺之

奉軍入關後使張錫元駐渭南許蘭洲自引所部自咸陽西進興平西路靖國軍郭盧各部相形見弱葉軍亦以後援未至未敢輕戰而副司令張鈞行營駐整屋與樊軍又同被圍因函商于總司令第四路董振五馮毓東李雲龍及第三路楊應王祥生等西行助戰董至武功北不及照會葉軍即與許軍交綏連獲勝利許軍某地駐兵約兩連董見可襲即於日中整隊直至其處許部見來軍持有已軍旗不疑衛兵且照常致敬禮董遂不費一彈盡奪其械所持許軍旗實得之陣上者也許聞報駭然曰吾未入關即聞董振五驍武絕倫今日相遇真名下無虛也馮李與董同來許欺其少圍之三面勢頗危董聞報急率衆出許軍側圖解馮圍甫至一田間小房後方布置間忽一彈飛來中腦部仆

地氣絕其地名大王村時陰曆十二月二十日也鄧寶珊旋代統其衆未幾與馮楊等東歸葉亦棄杏林防地西歸鳳翔許軍遂長驅至岐山是時靖國軍益不競而北政府又命晉軍以一旅自禹門渡河以甘言誘高峻部曹樹勳樹勳退屯澄城晉軍遂佔駐韓城甘肅隴東鎮守使陸洪濤亦率萬餘人分駐邠長隴縣及鳳翔之北部北洋軍十五旅晉金聚亦於是時襲佔寶鷄八年陰正月奉軍北洋軍鎮嵩軍及樹藩軍東西分八路向靖國軍作總攻擊茲先表列主客各軍情形如左

陝西主客各軍防地人數表

首領	地	盤	人	數
----	---	---	---	---

(一) 靖國軍

曹世英	高陵		二千餘	
岳維峻	三原涇陽富平		四千餘	
高峻	白水澄縣		三十餘	
盧占魁	耀縣同官		三千	
葉荃	耀縣		三千	

(二) 陳樹藩及北洋軍

陳樹藩

省垣附近及榆林道屬與蒲同興安舊屬

三萬餘

劉鎮華

懿鄆郡及長臨境內消河南岸

八千

許蘭洲

興平以西至鳳翔

一萬五千

張錫元

渭南以東至潼關

五千

管金聚

寶雞鳳縣

五千

晉軍

韓城郃陽

三千

甘軍

三水邠隴及鳳翔北部

一萬餘

劉存厚

漢中道屬

二萬五千餘

其在西路攻擊者一爲盩厔三爲岐山三爲乾縣

盩厔自樊鍾秀佔據後鎮嵩軍即以兵圍之當葉郭各軍與樹藩軍相持扶武間終南左右時有小戰爭奉軍攻岐鎮嵩軍圍盩益急城外有村落十餘處初爲樊軍所佔後漸棄之欽軍入城鎮嵩軍遂偪城下屢以極大火力攻城樊不爲動至八年陰正月望圍久守憊鎮嵩軍乘夜登城樊軍西走鳳翔第一路第五支隊亦棄郿縣歸鳳翔自此靖國

軍遂絕跡於渭河以南

自董振五死扶武間南北防線全撤郭堅歸鳳留兵千餘人守岐正月十五日奉軍直薄城下由東南北三面攻擊郭部初禦之甚力至二月八日奉軍火力極盛城內漸不支未幾即棄城西走岐山遂爲奉軍所佔

乾縣守軍爲郭部王珏郭英夫衆不滿千樹藩初命白戈人攻之無所取利及葉郭等撤杏林防奉軍向岐山西進樹藩部張鴻遠遂率全部而北助白攻乾故乾縣較岐山盤屋戰時最長戰情亦最烈也

同時東路北洋軍第四族張錫元攻交口相橋樹藩軍姜宏模攻關山劉世瓏及李天佐遺部郭秉誠綏章保攻施家坡興市鎮皆於八年陰正月開始

交口守軍爲第三路曹世英部王祥生衆只三百所部程星五馬青苑甄士仁等皆能戰當聞敵軍司令部已駐田市鎮時即在石川河西岸掘壕溝且十里與相橋防線相接敵軍至河東以河水淺隘欲涉王軍阻之夾水攻擊三日後攻愈烈砲聲不分晝夜相持逾燈節敵軍不能越進尺寸方休戰且致王書曰我來陝剿匪不知交口所駐即執事之騎兵團也願從此休兵敦好永不相犯

相橋守軍爲第四路駐紮維嶺部將世傑史鑄兩營胡景翼以前第二團老隊伍也董振五駐相一年城垣壕溝設備極完張軍自渡河一方攻交卽一方分兵攻相當未戰之先獲敵密探令循戰壘而視縱之歸盡以狀告及來犯時蔣軍陣地已改易敵不知也冒昧深入遂敗退其後張錫元至西安於樹藩座上晤胡景翼談其此次來陝不期在相橋遇勁敵胡詢何人答云蔣某胡微哂曰此吾軍最驚下材也張默然有愧色

關山初爲第五路高峻所駐守高歸白水第四路胡部李雲龍移駐焉李固驍將能戰而姜部自下邳敗後實力大虧自正杪攻起雖進佔界坊終未逼近關山三月中旬並舍界坊東去同時樹藩軍一部欲由高陵迤西之紅崖渡過河襲擾高陵後方亦爲曹部營長黃銘擊卻之

施家坡蒲富間之小鎮也第四路馮毓東自富平移軍駐防鄧寶珊率董振五舊部助之樹藩將劉世瓏由同州西來先據蒲城荆姚鎮直逼施家坡日以大砲向城轟擊馮部除分兵守城外時出奇兵襲劉軍連破之劉戒其部下曰張董馮鄧齊名關右此不可以力鬥也令分紮者集合一地使兵士掘隧道至城下置火藥於櫬以納之以火線燃發壞東城十餘丈馮鄧軍驚倉卒西退十餘里時交口相橋已停戰程星五蔣朗亭皆來援

劉終不敢西進越數日退去

興市鎮爲第四路康振邦靳伯綸等合守樹藩軍初至卽於四面包圍隔絕內外交通康等於城四週築矮牆牆下掘溝縱橫交錯軍士或伏牆內或出溝中防禦甚便郭緱等部雖迭攻無效及施家坡爲地道火藥所轟乃效其法康覺亦由內向外穿隧截之卒不得逞圍月餘城內食物漸告缺乏燃料幾盡一日發見某商家藏羊油萬斤防夜賴之二月望日高峻派其營長王茂軒由白水來援楊彪及盧部亦先後至美原分騎兵撓蒲以步兵直攻郭緱圍乃解

當是時北京非法國會舉徐世昌爲總統倡言議和南北各派代表十人至滬首約停戰而北政府聽陳樹藩一面之詞謂陝西爲匪區欲劃出例外時錢能訓爲北政府內閣總理于總司令致電駁斥有日照潼關遂送出亡清不死之名臣民國非法之總理陝人固待爾不薄也等語蓋辛亥西安起義時錢適以藩司護巡撫印民軍獲之優遇焉事定送之東歸故于電文及之于復電滬和會力爭雙方代表至停議以待乃派張瑞璣爲陝西劃界專員及至則盤屋岐山施家坡已相繼陷乾縣興市鎮尙日日在戰爭中是時樊郭兩軍已與奉軍西部議和受編爲第一第二兩支隊葉荃率部東行至耀縣與盧軍

錯處張瑞璣至三原復堅指乾縣守軍爲匪語多糾紛四月杪灃上和議停頓樹藩復向乾縣增兵王珏郭英夫等守乾已五閱月恐獨力將不支因棄乾城走三原奉編爲第七路從此涇河以西遂無靖國軍

九年北洋軍閥直皖兩系分裂奉軍許蘭洲亦離陝東歸夏六月直皖戰作皖敗段祺瑞辭國務總理職陳樹藩以夙附皖系自危乃釋胡景翼欲藉以聯絡陝人圖自治景翼既歸復繼井勿幕爲靖國軍總指揮是年陝西大旱民食屢空軍糈更無所出因無復軍事之進展而惟汲汲於興水利設學校培養軍事政治人材休養訓聚以待將來

十年夏北政府免陳樹藩職而以直部師長閻相文督陝率三師一混成旅入關樹藩敗退漢中其部下歸附靖國軍者甚衆當是時葉荃已率滇軍返川第六路盧占魁部隨之西行至廣元衆潰散葉二路樊鍾秀復循商維至南陽靖國軍副司令張鈞亦隨樊軍東去胡景翼以攻戰連年名將凋落兵民交困思假途直軍另謀出路而曹世英高峻亦皆願受編景翼請於于總司令不得因以兵解散總部于總司令先期遷居東里半耕園曹部支隊長石象儀據高陵反抗世英其駐交口之馬青苑甄士仁等亦逐其支隊長王祥生而獨立皆擁護靖國軍胡景翼助世英以兵入高陵執象儀歸三原曹部支隊長

楊應時駐武功扶風間力請于總司令西巡警終始靖國軍無貳心第七路司令王珏亦持正義不屈先是郭堅入省爲馮玉祥所殺其部下李奪麻振武等無所屬至是皆請復歸靖國軍于總司令遂更任李奪爲第一路司令楊應爲第三路司令麻振武爲支隊長十一年春楊應使孫維棟迎于總司令曹部營長于鳴岡率部扈送西進茹卓亭李子逸諸人皆隨之而西于總司令遂復於西路建靖國軍設總司令部於鳳翔並於武功置行營以便前敵指麾

閻相文督陝未幾忽自殺馮玉祥繼爲陝督而直奉軍戰事又起馮奉直系命令率部東出胡景翼曹世英部皆隨之東行是時楊應適於乾縣鉄佛寺截獲甘肅軍械于總司令乃命應及李奪麻振武合攻直軍之在西路者且親率砲隊助戰應進攻馬嵬而李麻各趨利竟不至應遂敗李麻亦敗應旋率部北至榆林依井岳秀李麻等勢益孤時劉鎮華繼馮爲陝督使人招之遂轉隸鎮嵩軍于總司令自此經隴入川至重慶沿江東行以達上海其間顛危曲折艱苦萬狀具詳編首概述中而此最後西路一戰遂爲陝西靖國軍之總殿焉

### (三) 軍政軍制紀要



(甲) 西安發難後之陝西靖國軍組織編制表

陝西靖國軍總司令	郭堅
副司令	耿直
參謀	蕭榮綬
秘書	郭澐
書記	黨灃
副官處長	秦培烜
軍需處長	陳漢峯
軍法處長	辛子秀
軍械處長	楊季石
第一支隊司令	劉精三
第二支隊司令	耿莊
第三支隊司令	李奪
第三支隊司令	麻振武

(乙)三原發難後之陝西靖國軍組織編制表

陝西靖國軍右翼 總 司 令 胡景翼

顧問 曹毓生

范卓甫

參 謀 長 李秉璋

參 謀 同文成

祕 書 范卓甫

書 記 長 張維直

副 官 長 靳經國

第四支隊司令 馬騰蛟

第五支隊司令 王仕雲

第六支隊司令 劉福田

第七支隊司令 王 珏

第八支隊司令 郭英夫

軍需處長	朱思聰
軍法處長	劉墨臣
軍械處長	高又明
總指揮	鄧寶珊
第一游擊司令	田玉潔
第二游擊司令	張義安
第三游擊司令	岳維峻
步兵第一團團長	馮毓東
步兵第二團團長	李雲龍
步兵第三團團長	康振邦
步兵獨立營營長	董威
騎兵營營長	張維和
砲兵連連長	劉佩蓉
騎兵連連長	胡彥海

陝西靖國軍左翼

機關槍連連長	楊德玖
偵探兼遞步哨隊長	柴松亭
總司令	曹世英
顧問	韋虞
參謀長	王烈
參謀	員繩先
祕書	張夢賓
書記長	盧文模
副官長	楊仁天
軍需處長	吳子齊
軍法處長	張瑞卿
軍械處長	梁都堂
第一游擊支隊司令	趙子健
第二游擊支隊司令	石象儀

第三游擊支隊司令 劉錫麟

第四游擊支隊司令 石強齋

第五游擊支隊司令 楊 彪

第六游擊支隊司令 張玉山

第七游擊支隊司令 王起才

第八游擊支隊司令 李秋軒

騎兵團團長 王祥生

(丙)于右任歸陝後之陝西靖國軍組織編制表

陝西靖國軍總司令 于右任

副司令 張 鈞

總參謀 茹卓亭

參謀長 劉月溪

參 謀 余欽烈

祕書長 劉紹文

副官長 劉子茂

軍務處長 彭仲翔

軍法處長 李琴舫

軍需處長 蔡江澄

軍械處長 高又明

外交處長 王子元

財政處長 柏堃

副處長 郭子興

教育處長 蔡祥符

書記長 李瑞峯

衛戍司令 李秉章

衛隊營營長 李勵生

糧台總辦 同文成

幫辦 劉魯堂

辦 幫 唐新齋

陝西靖國軍第一路司 令 郭 堅

參 謀 長 馬凌甫

參 謀 郭 滋

祕 書 長 党 澤

書 記 長 田華堂

副 官 長 楊季石

軍 需 處 長 辛子秀

軍 法 處 長 蕭榮綬

軍 械 處 長 蔚定侯

軍官戰術研究所所長 雷赤城

學生教導連連長 安石城

先 遣 司 令 劉錫麟

第一支隊司令 張 鐸

陝西靖國軍第二路

司 令 樊鍾秀

副 司 令 閻錫民

第二支隊 司令 王 珏

第三支隊 司令 郭英夫

第四支隊 司令 王仕雲

第五支隊 司令 耿 莊

第六支隊 司令 劉福田

第七支隊 司令 賈福堂

第八支隊 司令 党玉崑

第九支隊 司令 李 奪

第十支隊 司令 麻振武

衛隊騎兵團團長兼

衛隊步兵第三營營長 党海樓

衛隊步兵第一營營長 馬騰蛟

衛隊步兵第二營營長 李生新



參謀長 吉少峯

祕書長 陳霞廷

副官長 王新更

書記長 何樹三

軍需處長 閻秀峯

軍法處長 王文軒

第一支隊 李三林

第二支隊 趙德一

陝西靖國軍第三路司令 曹世英

參謀長 王烈

祕書長 張夢賓

副官長 王繼臣

軍需長 田衍九

軍醫處 郭仁甫

陝西靖國軍第四路

軍法處	包國翹
軍械處	吳子齊
書記長	柯偉玉
第一支隊	楊 麟
第二支隊	王祥生
第三支隊	石象儀
第一團團長	劉文伯
第二團團長	石象坤
騎兵團團長	王成章
簡練隊隊長	楊仁天
司令	胡景翼
參謀長	李文卿
祕書長	柏 堃
軍法處	劉銘齋

軍需處	朱思聰
副官處長	郭叔蕃
軍械處長	高又明
軍醫處長	楊介石
第一支隊司令	田玉潔
第二支隊司令	董振五
第三支隊司令	岳維峻
第四支隊司令	李雲龍
第五支隊司令	康振邦
第六支隊司令	馮毓東
第七支隊司令	崔式卿
第八支隊司令	姚林翼
騎兵第一營營長	張維和
騎兵第二營營長	靳經國

陝西靖國軍第五路

砲兵營營長 劉佩蓉

機關槍連連長 溫懷強

工兵連連長 崔寶航

司令 高峻

副司令 王雄生

顧問 焦子靜

王自榮

參謀長 曹濟卿

秘書長 李裕本

軍法處長 田霽霖

軍需處長 楊渡

軍械處長 石生光

軍醫處長 伊莘農

副官處長 田明卿

第一支隊司令 趙樹勳

第二支隊司令 張全貴

第三支隊司令 謝丕績

第四支隊司令 李秀山

機槍連連長 趙樂山

騎兵連連長 閻振奎

陝西靖國軍第六路 司令 盧占魁

參謀長 張晉三

秘書長 黃庸伯

副官長 張少丞

軍需處長 盧占海

軍法處長 李明軒

軍械處長 鄭雨庭

總指揮官 弓富魁

陝西靖國軍第七路

第一支隊	張威
第二支隊	武耀威
騎兵團團長	張九才
輜重營營長	馬少泉
工兵營營長	楊文秀
機關槍營營長	劉芳亭
司令	王珏
副司令	郭英夫
參謀長	史績丞
祕書長	吳傑生
副官長	魏抱仁
軍法處長	田雨亭
軍械處長	王英誠
第一支隊	田華堂

係九年停戰後續編

第二支隊 蘇子厚

第三支隊 王伯龍

衛隊營營長 王 綽

陝西靖國軍總指揮署編制表民國九年成立

陝西靖國軍總指揮 胡景翼

顧問 劉允丞

曹航生

參議 郭伯龍

參謀長 李秉璋

參謀 同文臣

彭時齋

祕書長 張翌初 范克立繼

軍需長 朱思聰

主任需軍 杜蔭亭

軍法處長	史仲書
軍械處長	高又明
軍醫處長	李蔚亭
副官處長	郭叔藩
主任副官	牟文卿
十分隊總隊長	楊瑞軒
第一分隊長	張星南
第二分隊長	韓子雲
第三分隊長	賈坤山
第四分隊長	井壽章
第五分隊長	趙璧軒
第六分隊長	馬正中
第七分隊長	郭振才
第八分隊長	武忠堂



第九分隊、長 李勝武

第十分隊 長 王序緒

陝靖國軍初興諸軍各自爲政極不統一數月以來殊無軍政之可言及于右任就任總司令始努力於軍政之設施一時文告書檄及命令頒布頗多可紀顧自總部解散以後檔卷失存而私家間有抄存者刻正在徵集中茲先錄其最著者數篇於左

(一) 于總司令請卹烈士呈文

(上略) 陝西民軍奄有一隅之地獨當七省之兵苦戰經年夷傷接踵猿鶴沙蟲競沐玄黃之血旗常鐘鼎應銘將帥之勳查前靖國軍總指揮井勿幕名家龍虎關中鳳鸞奔走南北者十數年經營蜀秦者百餘戰慨虎口之久居已烏頭之早白淮陰入漢旋登上將之壇士會渡河胥慰吾人之望詎意武侯之指揮未定君叔之身志俱殲七年十一月被刺於興平之南仁村莫歸光軫之元空洒平陵之淚擬請照陸軍中將陣亡例給恤前警備隊司令步兵上校耿直心憤逆亂首建義旗市廛鑿兵街衢喋血雖以援隊失期傷全功之盡墮然猶壯志再厲誓陝亂之必清整師岐鳳轉戰蒲同七年一月陣殞於蒲城城下誰納衛懿之肝莫收王琳之首擬請照陸軍中將陣亡例給恤前靖國軍第四

路先鋒司令張義安起義涇原會師盤鄠困逆賊於長安壺漿載道驚將軍自天下草木皆兵乃以羣帥異謀全師退守潛犯賊星竟傾大樹七年二月一日陣殞於鄠縣城北堡南門外乘盾未歸輿尸有痛嗟嗟昔則流離萬戶爭迎少保之軍今則痛哭十村私設武陽之祭立功於世遺愛在人其烈乎斯爲至矣擬請照陸軍中將陣亡例給恤前靖國軍第四路支隊長董振五扶風豪士馮翊將才敦禮說詩卻殺是真儒將衝鋒陷陣李廣善用偏師亦武亦文能戰能守傷同志之先死痛哭關張慨魯難之未平誓去慶父孰謂出師未捷竟壞長城陝難方殷復折大將九年一月陣殞武功之大王村九京難起乎國殤百贖何裨於逝者擬請照陸軍少將例給恤嗚呼青山憔悴誰償精衛之魂碧草淒涼莫辨萋宏之血况夫丁年冠劍軍中猶苦憶來岑遍地豺狼父老爭追思韓范不有殊榮懋典奚以安死慰生爲此哀懇祈予追卹所有以上四員詳細事蹟當再另案彙呈無任禱祈待命之至于右任張鈞叩省

(二) 于總司令致南北代表書

少川桂莘兩總代表鈞鑒和議頻危國人失望瞻念前途曷勝浩歎閱京報(三月二日)載北京二月二十七日覆朱總代表電如下「陝事自元日將五條辦法電令飭

遵至中央未嘗詰難也」等語據以實事其何能認查省西乾鳳省東蒲富臨渭前方各北軍一電之發頃刻可達豈待五日何得借當日北南停戰之事以爲之證耶卽五日未能週知試問元日去江日二十餘日矣其宜週知固也何以尙須江日之停戰命令則二十餘日之仍未停戰不言可知今日爲三月十日其去江日又七日矣而乾鳳圍急興市被攻紅崖渡今午又向我攻擊頃得省中確實消息陳氏六七日已電飭前敵軍隊查照中央江日停戰命令遵卽停戰並已通電各省而六日午後又電飭張金印激勵將士趕掘地道以期轟克乾城七日又派機器局熟於爆炸術之劉某攜帶地雷黃色炸藥並磨電機等前往乾縣助攻則陳氏迄無停戰誠意可知且不僅陳氏已也北京又發給陳氏七九六五槍彈各三十萬粒五生七七生五及七生六砲彈各一千五百枚已運至觀音堂云云由以上各節觀之北京與陳氏對於陝西實有所不甘心之處必千方百計拖延掩飾以殺盡此六七萬義軍然後快非必北京之令出不行亦非陳氏之抗命不遵也今北方代表全體辭職既經籠統慰留矣南方代表要求限時答覆又已不得要領和議前途如何尙不可知如和會而存也務望雙方代表速電北京嚴詞阻止觀音堂之大批軍火運入陝境如果和議決裂戰禍重開孰爲戎首責有攸歸則陝西靖國軍雖覆亡之日

猶存在之年也此肅卽頌議安弟于右仁啓三月十一月

（三）于總司令九年三月十五日通電

各報館轉南北各代表及各團體諸先生鈞鑒陝亂蒙念涕泣以謝頃閱上海某西報竟有謂本部出兵省城者試問處四面重兵包圍之中從何處出兵攻人又有謂一隅戰爭不必牽動和議者試思陝爲腹地六七百里間居民日在槍林彈雨之中卽論人道已應拯救況北京宣言實行停戰而在北殺人在南欺人誠意謀和有如是乎至近日戰事謹據實情報告如次右任倘誣辭欺世希圖妨害和平他日組織法庭戮謝國人可也

（一）東戰場之情形除張錫元一旅正式函知奉令停戰外（彼担任交口相橋方面）陳部劉世瓏包圍興市已久日用大砲轟擊姜某攻擊關山近復增兵（二）西戰場之情形乾縣被圍月餘陳氏因地面戰爭不能得手遂變而爲地下戰爭拉居民掘鑿隧道以備轟城致死於黃泉者無算並將附近數百里間民家麻袋全行搜去裝土作壘以便射擊又強拉民夫數千驅使填戰壕致死者不計其數岐山本月十號已爲奉軍攻下鬍子隊姦淫擄掠慘難言狀停戰之賜有如是者鳳翔被劉管甘奉各軍圍攻我軍屢函告急恐變動卽在此數日間聞葉荃已脫圍北走未知現在何處

附錄唐總代表復朱總代表函

敬復者接三月十五日函開王安瀾於停戰期內進犯平利三月十六日函開郭堅樊鍾秀葉荃等在鳳翔城內意見決裂互闕擾民又一函開王安瀾於雙方停戰時率衆橫竄勒索商民各等由均悉查此間距陝道遠電阻究竟有無上述等情尙難懸揣惟來函一則曰停戰期內一則曰雙方停戰據中外報紙所傳陳樹藩實未遵令停戰皆可覆按不獨于總司令一面之詞爲然興平醴泉武功扶風寶雞汧陽隴縣豎屋郿縣等縣本爲陝靖國軍所有於去年十一月十六日北京第一次下令後相繼失去岐山鳳翔乾縣在包圍中交口相橋興市關山修石頭紅崖渡等處戰爭尙極激烈施家坡已於本月十二日爲陳軍劉世瓏所陷此皆事實彰彰可考者也至於疊函所開各情自應從速電詢以證虛實乃此間屢次與于總司令去電均未接覆且據電局通知去電均爲陳樹藩之陸軍檢查員扣阻茲欲通電詢辨從何着手尙祈有以教之特函彙復此致朱總代表唐紹儀三月十七日

靖國軍初起三原軍事各當局預知戰事之必將延長軍事人材之必須培養各就所在成立軍事教育機關如三原胡部之軍官教導團高陵曹部之簡練隊及經武學校

鳳翔郭部之軍官研究所白水高部之教導營其他支隊亦皆附設學兵連爲戰術上訓練于總司令統一軍政後時已作戰半年宿將凋謝益知軍事人材之不可不積極培植與軍事教育之關係革命前途甚鉅通令各路挑選下級幹部人員分別保送四川講武堂及廣東韶關講武堂者二百餘人民十以後先後畢業歸伍致力於革命由靖國軍而國民軍國民聯軍以及國民政府北伐肅清北洋軍閥勢力乃至剿赤迄於今日之抗戰其人或死或生莫不始終革命主義奮關到底要皆自靖國軍時植其基也茲詳列其組織姓名如下

陝西靖國軍軍官教導團民七設立

團長	胡景翼
團副	樊鍾麟
教育副官	趙進之
總務副官	牟文卿
第一隊長	王省三
第二隊長	石掄元

陝西靖國軍左翼軍簡練隊 民七設立

總隊長

楊仁天

教育隊長

羅策甫

陝西靖國軍第三路經武學校校長

曹世英

教育長

程煥奎

陝西靖國軍第一路軍官研究所 民七設立

所長

郭堅

副所長

雷煒

教導連長

安石城

陝西靖國軍保送四川講武堂學員姓名

翁剛 長安

朱龍訓 渭南

程憲章 渭南

梁漢傑 興平

劉志剛 長安

趙維義 扶風

王玉章 高陵

田俊傑 渭南

劉子英 三原

劉儒英 白水

劉儒珍 涇陽

李啓瑞 長安

王建蒸 涇陽

張冀良 藍田

王靖洲 藍田

周郁文 興平

張奉璠	渭南	袁懷章	扶風	睢生春	臨潼	張成厚	三原
李培之	城固	賈鼎	寶雞	張籌	乾縣	張藩	臨潼
楊樹森	扶風	張大明	褒城	薛波如	長安	鄭樹棠	城固
景文	白水	李培中	蒲城	程元鼎	乾縣	趙捷生	扶風
高雄飛	渭南	王佑卿	新安	徐孝祺	乾縣	胥懋健	鳳翔
張鶴齡	三原	馬兆瑞	寶雞	王哲	長安	王恆星	臨潼
李中喬	興平	李梓楠	城固	馬象賢	長安	韋文西	臨潼
仵雲漢	臨潼	王鈺	秋道	賈盛義	興平	孫元英	長安
張鈞	臨潼	李建學	乾縣	孫繼武	臨潼	王景璽	咸陽
尹鉉章	渭南	侯飛鵬	鳳翔	嚴樹源	鳳翔	黃譜	定西
楊唐軒	寶雞	趙自謙	渭南	劉映斗	白水	劉宗邦	涇陽
党武	大荔	張雄柱	褒城	張鵬	港南	侯樹勳	褒城
李樹烈	臨潼	白琨玉	長安	劉曉雲	富平	趙正生	興平
王彥英	渭南	王邦瑞	渭南	高居謙	興平	周廷華	渭南



李興唐 麟遊

李景文 蒲城

雷白發 潼關

胡雄藩 扶風

王偉 渭南

王崇禮 盧氏

巾俊 靈縣

周松長 鳳翔

閻志道 興平

張勇謀 臨潼

李兆瀛 褒城

劉振基 富平

田雄飛 渭南

王頂 咸陽

許玉書 興平

尙武 靖邊

郭育民 三原

潘宏賓 藍田

王建初 南鄭

史景鰲 華縣

王兆吉 高陵

劉熙載 富平

周俊武 洵陽

樊丕明 三原

任雯 耀縣

高宗國 涇陽

岳生甫 興平

張玉樹 武功

王允中 富平

劉海澄 沔縣

胡景耀 長安

孫文連 涇陽

陳策 長安

姚丹峯 興平

黃志忠 渭南

程冠軍 渭南

景在山 山西

張超 西鄉

劉東生 長安

陳月天 商縣

趙志傑 涇陽

孫炳寰 長安

馮漢超 米脂

史守仁 扶風

趙廷華 白水

高炳麟 長安

陰映雪 耀縣

史志法 扶風

王樹貞 蒲城

白鼎新 白水

靳經邦 盧氏

胡宏信 藍田

魏士憲 寶雞

馬繼援 洛陽

王子銳 鳳翔

崔得勝 南鄭

李寶銛	興平	吳志道	渭南	周國棟	岐山	張國權	沔縣
趙雄飛	藍田	魏良相	長安	葛家珍	扶風	李含英	渭南
雷希明	渭南	田國璽	渭南	李定五	臨潼	吳孝友	咸陽
徐鳳儀	興平	張廷璞	涇陽	斐文炳	猗氏	簡伯豪	蒲城
梁益之	永壽	田荆山	富平	趙子勁	興平	劉炳國	涇陽
劉繼漢	興平	李鈞甫	長安	孫兆麟	醴泉	辛炳庚	扶風
馬致遠	涇陽	傅英	臨潼	李篤生	蒲城	徐冀斌	興平
管樂道	涇陽	張玉珊	臨潼	郭續城	西鄉	謝鍾琪	咸陽
楊其祥	興平	趙光祖	臨潼	王允真	盧氏	袁葆初	登封
呂丹初	孟津	黃玷	褒城	宋寶琨	乾縣	史良輔	興平
楊恆義	涇陽	黃太運	富平	馮超	耀縣	張炳國	武功
張秀林	臨潼	王勤書	高陵	武英佐	大荔	李宗壽	三原
劉祖漢	乾縣	陶佐卿	三原	鐵子剛	大荔	高智凱	富平
侯英	汾陽	薛蔚宣	長安	薛循	長安	常又銘	三原

周 範 三原

蓋紀志 三原

孟紹祖 三原

田發枝 興平

王 建 渭南

趙子謙 渭南

黃子中 渭南

姚治江 富平

李永蒼 蒲城

王振業 高陵

王子厚 渭南

董宏昌 富平

劉鈞福 高陵

張經昌 武功

李 愷 鳳翔

趙培堪 鳳翔

程慎行

張翼之 藍田

賀學仕 商縣

楊卜五 靖邊

李雲岫 興安

白生玉 中部

黃 浩 太原

馬秀峯 登封

黃炳烈 登封

陝西靖國軍保送韶關講武堂學員姓名

王嵩齡 三原

范 濤 郃陽

安家迪 朝邑

賀文祥 白水

孫貴賢 涇陽

張鵬志 臨潼

陳紹武 臨潼

胡嘉瑞 臨潼

黃龍舜 三原

許廣彬 臨潼

李經馨 富平

伊世昌 三原

趙繩先 興平

王錦山 臨潼

李心源 長安

閻文博 三原

侯建業 咸陽

戴 鼎 鳳翔

羅伯章 高陵

劉廷璽 三原

尙道源 鳳翔

魏祥麟 富平

沙瑞雲 渭南

楊必名 涇陽

張潤璧	渭南	李法原	三原	任鐘	興平	周景勃	臨潼
張瑞友	臨潼	張依仁	耀縣	楊鵬飛	藍田	雷鳴和	高陵
楊世儒	三原	封尙義	鳳縣	王秀文	涇陽	趙國華	長安
趙繼釗	三原	王樸	咸陽	李承基	三原	張克讓	三原
王孔毅	三原	徐炳璽	乾縣	聶雨甸	三原	王作藩	富平
楊德春	臨潼	范文道	臨潼	張培成	耀縣	林森	耀縣
谷寶光	臨潼	劉虞	蒲城	屈克勝	洛川	成敬新	耀縣
宋瑩	耀縣	馬建堂	耀縣	董呈祥	渭南	張啓明	渭南
高鳳梧	岐山	張鈞	蒲城	程翹	渭南	何庭玉	乾縣
張秀岐	扶風	傅建安	臨潼	李育林	臨潼	宋培法	耀縣
孫炳儒	臨潼	沈鴻綽	長安	左登第	耀縣	周元璠	富平
翟文奎	三原	劉新定	白水	劉均福	高陵	姚武傑	臨潼
周維新	臨潼	劉耀唐	鄠縣	車欽	蒲城	劉昌盈	三原
賀煒	渭南	閻健綱	麟遊	秦學麟	渭南	王居敬	蒲城

楊 震 華縣

周維楨 渭南

王 巍 新城

張 儼 醴泉

劉 驥 白水

杜 鑫 蒲城

李懷道 涇陽

任祖伊 臨潼

閻迺謨 鄠縣

閻秉智 藍田

楊天定 華縣

趙頤齡 鄠縣

田建綱 麟遊

朱登瀛 定邊

郭景儀 耀縣

樊世楷 扶風

劉 潛 渭南

劉天相 新城

陳鼎甲 長安

鄭仰成 長安

趙子恭 三原

黃雲章 三原

李來煥 白水

王普英 新城

王德馨 藍田

孫仲道 長安

范成華 涇陽

劉新銘 涇陽

強思義 富平

王洪基 蒲城

高鎮藩 臨潼

劉肇基 臨潼

趙寶珍 長安

馬永祥 長安

劉肇沛 臨潼

朱洪疇 靈縣

王福祥 臨潼

朱鵬冀 三原

張浩如 渭南

賈白溫 韓城

劉仰曾 鳳翔

張光威 華陰

吳炎昌 臨潼

劉佐秦 富平

杜寶田 商縣

傅子民 臨潼

程博泉 鳳翔

黃 銳 三原

萬振藩 定邊

張俊英 富平

張可讀 臨潼

姚迺熙 大荔

王觀先 鄠縣

張登志 耀縣

楊 潔 朝邑

孫尙志 富平

伍景常 富平

黃彥英 武功

孫赤五 三原

王定乾 乾縣

喬士林 富平

党錫樹 富平

張廷柱 耀縣

韓子雲 涇陽

#### (四) 政治建設紀要

自民國六年冬陝靖國軍成立以來各軍長期均在戰爭劇烈之中對於政治僅能維持其原來之機構使之不至紊亂而已至八年劃界以後戰爭停息總部始極力謀政治上之設施就其已推行者約分救災水利財政教育及民意機關社會公益諸大端茲爲分述如左

民國九年陝西自春徂夏天雨愆期二麥歉收秋禾未種旱象已成人民惶恐異常至夏秋之交赤地千里哀鴻遍地時當靖國軍起義之第三年胡景翼自省歸任各路總指揮秉承于總司令意旨邀請中外友好暨教會同人籌商救濟方法依照北平華洋義賑總會組織章程合三原天主教基督兩教會與地方士紳共同組織陝西華洋義賑分會推舉范卓甫程搏九李可亭希主教賢戴神甫功臣義國人祝神甫仲文文武牧師德遜慕牧師潤身均英國人孫牧師香浦等九人爲理事推希主教爲理事長並舉司庫中外各一人假三原善堂爲會址分函被災各縣區各設一支會又函推周愚夫吳希真二君爲

駐滬募款委員並推周伯敏代表赴平參加五省救災委員會西安方面亦派王錫侯赴平參加從此函電交馳向國內外慈善團體呼求振濟因得各方振款源源而來計共收到四十餘萬元渭北災區二十餘縣先後分發振款共十一次全活災黎甚衆又北方五省救災會籌集賑款數百萬元以五十萬元劃撥陝省救濟時嚴敬齋在上海代陝呼籲並堅執災在渭北遂得決定以二十五萬元撥給靖國軍案定後嚴即輾轉電告于總司令派王子元赴滬領回轉交三原分會支配分發

十年夏二麥大熟義賑會結束所有賑款除已分發各縣實施救濟外尙餘洋七萬餘元照例應繳回總會存儲但查總會章程載有預防旱災之規定因復召集大會議決呈請留此餘款用以開鑿吊兒嘴水利得覆准如所請辦理是年秋三原官紳各界集議於善堂成立渭北水利委員會公推李仲三爲會長李儀祉爲總工程師儀祉者留學德國八九年得有專門水利學識者也任事後即派測量員五六人開始測量涇河上游吊兒嘴工程自涇陽西北仲山之麓岳家坡起迤東經醴泉涇陽三原高陵又東至臨潼河北之櫟陽兩金交口三鎮歷二年之久測量始告竣事凡山脈之形勢水流之方向繪成詳圖加以說明並估計其工程需款不下一百五十萬元即以所成圖本呈送北平華洋

義賑總會核閱兼請撥款襄助總會閱圖極爲贊佩旋派洋員三人來陝親至吊兒嘴視察一週回平報告總會卽撥助洋五十萬元其時劉鎮華爲陝西督軍兼省長李儀祉赴省數次晉謁請其更撥本省款項劉不得已亦允籌撥五十萬元合前款纔足三分之二儀祉歸原報告經過並提議所短之五十萬元擬由醴泉涇陽三原高陵臨潼五縣預計灌田之多寡派定出款之數目經衆通過又議定五縣各設水分局一所於西安設總局以統轄之均由官紳合辦蓋以開鑿渠道愚民無知或生阻撓非藉官力不爲功然若祇憑官辦則地方官吏一旦更調工程亦時受影響也時當民十四年議定後擬卽於冬季開工而豫西胡憨戰事發生劉鎮華東出援憨未得回陝上項計劃遂生頓挫後此涇惠渠之成功實基於是焉

靖國軍初起西安日在戰爭之中及三原響應後曹胡各部始有根據地對於財政漸爲方法上之設施初設籌餉局稍勸商富捐輸以濟急需顧當時僅有涇原富耀高陵數縣田賦及捐款均不足以供戰爭之所需於是規定各軍均不發餉年中每員日發銅錢四百文兵一名發銅錢二百五十文數月以後各軍先後佔有地盤各就地方原有收入自收自用軍費賴以維持于總司令統一軍政後卽將籌餉局撤銷統計各縣田賦雜



稅及百貨厘金局各進款派員監督取給軍用而仍前維持四百二百五十之例自總司令以下行之數年始終遵守未予變更迨戰事停頓涇原各商貨如藥材皮毛菸茶棉花均爲運銷及輸出大宗因戰事影響道路不通運輸停滯總部乃設工商轉運局通令各軍一體保護於正稅之外不得另收分文又因各商貨銷路須經過潼關敵防乃由各地紳商及軍政當局與敵方屢次交涉得以各半征收藉補軍用其後同官淳化及臨渭之河北蒲城之興市均次第歸入靖國軍範圍而西路之乾縣鳳翔岐山汧隴郿寶戰守年餘得而復失東路白澄兩縣無多出產田賦稅收僅供駐軍給養不能有所增益至九年以後總部所統轄者亦只前列數縣而已於是另設財政清理處鈎稽舊欠整頓新增迄於靖國各軍解散而止顧六年之間不預收田賦不加派民糧不增加商民負擔不發行公債雖各軍間有私向人民征糧補助軍用之事然亦但求臨時自給不爲苛擾且皆出於各軍當局與地方人民情誼關係總部亦未予核准以故作戰數年而靖國軍各縣財政金融始終維持歷來舊案不致紊亂亦一特殊事實也其轉運局組織如下表

陝西靖國軍工商轉運總局局長牟文卿

涇陽分局局長申懷胥

臨潼交口分局局長張渭川

臨潼雨金分局局長羊壽芝

高陵分局局長劉子讓

鳳翔分局局長戴銘九

富平分局局長宋紫軒

自民國六年冬靖國軍起義以來戰事始由省城而西路轉至渭北敵我雙方無日不在激戰之中臨渭涇原白富耀同淳高陵乾醴扶岐各縣商旅裹足學校停輟人民日怵於砲火兵燹之不停息固已無暇於他事矣三數月後戰禍延長軍事各當局念教育爲國家社會命脈之所寄託不可因戰爭而廢也乃令各軍事首領各就所駐地區努力維持秩序恢復舊有各學校一律開學苟戰事一日不及卽絃誦一日不輟務使軍事教育並行不悖半年以後于右任先生歸總戎政首先注重文化事業於總部設教育處專司其事並創設渭北中學民治小學以爲先導九年以後戰事暫停益復修明教育注意於人材之培養科學之提倡一時學校建設播爲風氣軍人興學視爲天職駐軍所在地舊有之學校固已早日恢復新興之學校尤多及時創建茲就靖國軍範圍以內各縣

所增設之學校名稱地點列表如左

名	稱	所在地	創建時期	倡建人
(一) 渭北中學		三原	民國七年	于右任
(二) 右輔中學		鳳翔縣城	民國八年	郭堅
(三) 女子小學		三原	民國七年	胡景翼
(四) 民治小學	後並設中學	同前	民國七年	于右任
(五) 模範小學		同前	民國八年	同前
(六) 樹人小學		三原東里堡	民國九年	馬青苑
(七) 立誠小學	後改中學	富平莊裏鎮	同前	胡景翼
(八) 通川小學		富平流曲鎮	同前	張如翼
(九) 明道小學		富平覓子鎮	同前	馮子明
(十) 東璧小學		富平留古鎮	同前	馮子明
(十一) 淳化小學		淳化縣城	同前	石象儀

(十二) 方里鎮小學

淳化方里鎮

同

前

于鶴九

(十三) 興市鎮小學

蒲城興市鎮

同

前

康指定

(十四) 櫟陽小學

臨潼櫟陽鎮

同

前

楊虎城

民國九年戰事初停各縣人士集於三原者日多而省參議會因連年戰爭停頓已久靖國軍各縣區議員又皆離省他去劉鎮華利用時機盜竊民意改選省會議員指名派充種種非法尤為各縣人士所不滿乃聯名建議總部仿廣東非常國會辦法另組省議會於三原旋經于總司令核准由旅原各縣人士公開會議投票選舉選出議員二十餘人定名為陝西省臨時議會所有議員姓名如下

### 陝西省臨時議會

議長

王誠齋

扶風

副議長

周伯敏

涇陽

議員

白秋咳

長安

趙任卿

澄城

王允伯

郃陽

楊子廉

澄城

王會文

邵陽

李性夫

淳化

孟紹祖

三原

程搏九

三原

田溫如

三原

魏抱仁

長安

郭自興

臨潼

張夢賓

高陵

寇襄陽

同官

張用章

岐山

汶潔甫

郿縣

曹雨生

渭南

楊怡和

澄城

劉鳳五

臨潼

蔡祥符

鳳翔

張瑞卿

蒲城

高幹丞

耀縣

紀子文

富平

馬子壯

鳳翔

陳祥生

岐山

史彬夫

岐山

三原東里堡舊有劉氏牛耕園爲其先世讀書宴遊之所園大六十畝許相傳爲千餘年遺蹟唐詩人張籍曾譙集其中明季始歸劉氏園中花木多數百年前物亭臺樓閣布置天然名人留題石刻尤夥民元以後劉氏中落園遂荒廢靖國軍興當局以地方名蹟不可任其墮廢適劉氏有負債萬餘金莫能償先後請於胡于兩總司令代爲籌還所負而以園歸諸公改名渭北公園由涇原富耀高陵臨潼同官淳化八縣籌款修葺並組委員會保管之秦中名勝因得保存亦戎馬倥傯中興廢舉墜之一事也

靖國軍時言論極端自由新聞事業應時發生如楊億塵所主辦之靖國軍日報王佩卿田華堂所主辦之捷音日報皆以傳通戰事消息宣傳革命言論激發人民意志矯正社會觀念爲宗旨而于鶴九所主辦之正義報尤能批評時事得失無所隱諱鳳翔亦有口口日報之刊行各報且皆設法郵寄上海爲對外之宣傳惟當時以印刷機器缺乏皆用石印發刊不爲一般人所注意及靖國軍解散以後遂皆停刊矣

# 首都革命紀事

## (一) 祕密運動情形

民國十一年胡景翼率部出關參加鄭州戰役後又令岳維峻率部助靳雲鶚剿豫南悍匪老洋人等股平之軍等聲威由此大著旋被改編爲陸軍第二十四師駐防京漢路北段順德彰德正定一帶是時直系軍閥勢燄高張吳佩孚以兩湖巡閱使兼直魯豫副巡閱使名義坐鎮洛陽虎視中原胡部雖有鄭州之功願以景翼本人出身民黨終爲所忌既斬其服裝槍械更薄其餉糈所部萬餘人在飢寒困苦之中猶復蜚語時聞危疑萬狀卽直軍他部亦多有爲之不平者而景翼均漠然不與爲較量惟日汲汲於官兵之訓練躬自督率昕夕罔間又設軍事學校於邯鄲廣收英俊子弟內有朝鮮志士數十人多嗤之景翼笑曰他日打日本時此皆嚮導也

當是時馮玉祥亦以非直系嫡派軍人爲吳佩孚所嫉視故當時奉直戰後初以鄭州之功被任爲河南督軍未幾卽被調任爲陸軍檢閱使使率所部中央陸軍第十一師移駐南苑陽崇其名而陰奪其實權



胡馮兩軍當時處境既相類似而胡與馮個人之間及其平時主張既有在陝之默契於前復有鄭州戰役之合作於後遂由精神上與事實上之協調而爲更進一步之結合在此期中則有總統黎元洪爲直系軍人所逼倉皇出狩及鄭房劫車奪印元首無人僉王攝閣以至曹錕賄選總統種種污辱國家政體之事實相繼出現於是胡馮兩者之間漸由李仲三李培贊及馮之參議張樹聲冉寅谷劉治洲諸人祕密往來作初步之接洽後更由胡馮本人及岳維峻鄧寶珊劉守中諸人作事實及步驟上之協定矣

大名鎮守使孫岳老革命黨人也當袁世凱謀帝制時嘗亡命入秦匿居華山之麓與西北各省黨人郭希仁鄧寶珊續桐溪胡景翼等交甚歡後雖久在直軍之中而革命之志始終不渝曹錕賄選總統全國譁然孫甚惡之而力不足以有爲時續桐溪避事居孫處知其意因說使聯馮玉祥孫從之十三年九月十日親往南苑晤馮因參觀馮部官兵所新建之昭忠祠密談於草亭之內兼以聯合胡景翼岳維峻說馮由張壁往來傳達意旨於是胡馮孫三者之間協議一致共圖大舉決計除曹吳以謝國人而首都革命之師遂興

## (二) 發動情形

十三年曹錕賄選總統既成皖系浙江督軍盧永祥首先通電反對聯合奉天督軍張作霖及粵方成立三角同盟聲討曹吳曹錕懼急召吳佩孚入京與議吳謂浙事有蘇皖軍事當局足以應付可一意對奉請下討伐令佩孚自任討逆軍總司令率兵十餘萬進攻山海關爲第一路令胡景翼率所部出喜峯口爲第二路馮玉祥率所部出承德爲第三路舊曆中秋夕吳自洛陽下令動員各軍依次俱進胡景翼留李雲龍一旅於通州馮玉祥軍至古北口一帶晝進夜退使人不疑佩孚自往榆關督師與奉軍戰甚烈屢使人來催景翼進兵景翼乃自通州節節布置自率少數步隊出喜峯口前鋒至平泉與奉軍一部遭遇佯與戰卻之以捷報吳而熱河都統米振標係陝西人景翼與之接洽使守中立當是時鄧寶珊在馮軍中隨時傳通胡馮兩軍消息協同動作九月十九日馮軍自灤平祕密回師二十二日抵北苑會合各部隊出發於夜十二時抵北京安定門孫岳時爲北京警備副司令開門延入前部鹿鍾麟首將總統府包圍解除衛隊槍械城內猶無知者二十三日天明始見全城通衢要道偏布袖圍白章上書誓死救國真愛民不擾民十字之軍隊直系各要人方知有變紛紛逃匿地方秩序安堵如常景翼於馮軍回師時卽得密電亦卽旋師入北京二十四日至南苑與馮孫諸人會議共組國民軍推馮玉祥

爲總司令兼國民一軍軍長景翼與孫岳同爲副司令景翼兼國民二軍軍長孫岳兼國民三軍軍長聯名通電全國發表聲討軍閥倡導和平之主張電文如次

民國創造十有三年兵戎迭興迄無寧日軍閥強藩棋居鼎峙分據國疆擅作威福意見參差干戈卽起逞其武力期快己私以多數之國民徇一人之私意美其名曰討逆文其過曰義師是皆涯毗之爭全與國家無涉旱潦頻仍而忿兵迭起度支困竭而黷武不休以致九有瘡痍四方困瘁哀鴻遍野羣盜滿山工商窒礙農畝荒蕪萬衆倒懸羣倫塗炭不特共和之真諦未獲實現反致國際之地位日益墮落某等覩此顛危憂心如搗恐稍瞻徇必致淪胥內受良心之驅迫毅然爲和平之主張使國人知武力之不足恃開根本改造之新機其意義全在救國其辦法純取公開爲全國統一之先導定邦國永久之大計期以此次改革完成歷來改革未竟之事業解決歷年糾紛之根本永絕將來隱伏之禍胎確立健全民治之基礎某等以爲此後一切政治善後問題國家建設計畫非一二人所能集中亦非一二黨派所能把持必須全國賢豪同集京師速開和平統一會議將一切未決問題悉數提出共同討論以多數人之主張爲指歸以最公平之辦法爲究竟期得最良結果實力奉行以免內爭以安邦本云云

又發表建國大綱五條樹立政治改革之最高原則（一）打破僱傭式體制建設極清廉政府（二）用人以賢能爲主取天下之公才治天下公務（三）對內實行新民政治凡百設施務求民隱（四）對外講信修睦以人道正義爲根基掃除一切攘奪欺詐行爲（五）信賞必罰財政公開同時聯名電請孫公中山北上主持全國和平並派馬灼援爲代表持函赴粵請迎是時曹錕被囚直系閣員星散胡馮諸人在旃壇寺會議因黃郛爲舊內閣教育總長令其暫行攝政以爲過渡並邀張耀曾王正廷李烈鈞王永江等爲閣員代舊閣中直系諸人自十九日自喜峯口旋師至二十三日首都反正數日之間士兵星夜兼程疾趨共行六七百里兵不血刃而革命告成皆依照事前預定計畫及步驟而進行之者蓋自景翼在陝取消靖國軍四年以來困心衡慮受人譏評至此心跡乃得大白而西北革命勢力遂復爲國人所重視

### （三）戰事紀要

國民軍既佔領北京因曹錕消息傳至前方吳佩孚急自前線回天津令其旅長潘鴻鈞等率兵數旅扼楊村以圖反攻京師景翼命岳維峻率部趨唐山攻敵側背令李紀才李雲龍各率所部爲兩翼與國民一軍司令張之江等攻敵於楊村落堡間李紀才夜

襲敵陣生擒潘鴻鈞餘軍大潰其在山海關者亦爲奉軍猛攻潰散岳維峻又引兵擊之悉繳其械吳佩孚見大勢已去倉皇浮海南遁京畿戰事告平馮玉祥赴天津擬與奉浙皖各系首領議收拾時局辦法景翼亦隨後至津觀察大勢時陳樹藩寄居天津罕與外人通往來景翼曰吾舊長官也安可不一見因偵悉其所在直往見之樹藩問其來意答以將開會樹藩曰若殊魯莽明日奉張來安知不殺若耶景翼悟卽退出乘夜搭車返北京不及徧召從者越兩日忽有馮爲奉張監視之風傳馮部將領羣至景翼處問方略景翼曰繕吾軍旅整嚴以待總司令設有萬分一吾與張翁一決耳衆皆曰如命越數日張作霖在津與馮盧等會商共推段祺瑞爲臨時執政而段亦表示願與孫總理合作商討全國和平於是臨時執政政府遂成立焉

吳佩孚南遁至滬轉乘江輪至武漢悉發動在豫各軍暨由前線潰歸之殘餘部隊共六七千人使其將李焯章率領扼守漳河拒國民軍南下河南土匪乘機竄起中原陷入混亂狀態之中執政府以豫事非景翼莫屬乃任命景翼督辦河南軍務善後事宜又以孫岳爲河南省長使率國民三軍一部助之十一月二十四日景翼自順德進兵使李紀才李雲龍劉錫麟等爲前驅與敵戰於彰德道口清化間大破之而夙駐豫西附吳佩

孚之鎮嵩軍師長愁玉琨等同時亦向吳倒戈收吳洛陽留守者槍械玉琨更進佔鄭州以兵扼守黃河鉄橋南端欲乘機先入開封以抵制國民軍景翼所部留守陝西後方者涇原爲田玉潔富平爲馮毓東漳河戰事正亟之時全部奉胡令東開馮毓東首率先頭部隊由二華渡河直趨潼關陝督劉鎮華恐毓東塞潼關則斷關內與豫西各軍之聯絡不利於己急電愁玉琨同兵潼關阻毓東軍使不得東進已則陽稱和平調解派人星夜赴三原說田玉潔緩涇原後援之師且對陝諸耆紳揚言欲交軍政權於陝人自率所部出關助清中原而陰使人殺馮毓東所派講和專使前靖國軍軍務處長彭仲翔於華縣拘田玉潔之使者郭錦屏於西安令其駐渭南之部隊與愁玉琨夾攻馮毓東軍於華陰毓東遂敗退渭北及愁玉琨再至洛陽而國民三軍旅長何遂已自黃河下游渡河入開封景翼亦於十二月十一日至鄭州宣佈就河南軍務督辦職翌日遂至開封派兵進佔信陽吳部田維勤陳文釗土爲蔚等及豫東鎮守使馬燦林皆以所部來降豫局大定惟愁玉琨據豫西仍時有異圖

十四年春孫公中山既應國民軍之電請旋即自粵啓節北上於啓行之前卽宣言主張召開國民大會與北方各友軍共定國是和平統一既至天津而病越月餘移駐北

京北京飯店病中猶日計劃國民大會召集方法段祺瑞則以善後會議抵制之景翼逆知北方軍閥之心理與孫公之革命主張根本不相符合顧以初至豫省經緯萬端不便有所表示召致反感乃先輟編所部及新收之衆爲步騎十三師六混成旅獨立步兵一旅五團砲兵三團及憲兵工兵各一營茲列其軍隊編制及總部之組織如下

國民軍第二軍 總 司 令 胡景翼

參 謀 長 林開甲

軍 務 處 長 孫燕貽

軍 需 處 長 杜蔭庭

軍 械 處 長 張恢元

軍 法 處 長 張子元

軍 醫 處 長 員止殺

外 交 處 長 林季良

交 際 處 長 耿壽伯

警 務 處 長 張岳軍

第六師師長	第五師師長	第四師師長	第三師師長	第二師師長	第一師師長	製造局局長	運輸副司令	運輸司令	總兵站站長	製藥局局長	兵工局局長	副官長	祕書長
樊鍾秀	王爲蔚	陳文釗	田玉潔	岳維峻	胡景翼兼	師子敬	牟文卿	王承齋	史漢岑	賈筱侯	高又明	王承齋	李百川



第七師師長	鄧寶珊
第八師師長	馮毓東
第九師師長	李紀才
第十師師長	李雲龍
第十一師師長	蔣世傑
騎兵第一師師長	弓富魁
騎兵第二師師長	馬乾三
騎兵混成旅旅長	鄭思成
混成第一旅旅長	楊瑞軒
混成第二旅旅長	康指定
混成第三旅旅長	田生春
混成第四旅旅長	衛定一
混成第五旅旅長	李養泉
獨立步兵第一旅旅長	崔式卿

砲兵第一團團長 熊占標

砲兵第二團團長 羅鶴齡

砲兵第三團團長 劉玉泉

獨立步兵第一團團長 劉錫麟

獨立步兵第二團團長 胡景琰

獨立步兵第三團團長 魏尙友

獨立步兵第四團團長 高桂滋

衛隊步兵團團長 張藩如

憲兵營營長 劉梧桐

工兵營營長 耿景惠

胡景翼初入開封發表治豫主張首先劃撥教育專款使其獨立以期教育之發展其次如辦清鄉肅吏治恢復自治制度修築全省公路振興各種實業提倡民衆文化派遣黨務人員分赴各縣宣講三民主義選賢任能財政公開每月發給薪餉以教育機關爲先次及警察再次及各行政機關與軍隊又因孫岳尙未來汴任事省政無人主持暫

派前國會議員山西王用賓爲省政府祕書長使就上項設施縝密計劃次第實行又以新編團長王祥生因在豫南剿匪與禹縣民團衝突殺傷多人立即派人拿回正法民衆聞風各縣紛舉代表來省請願及以民間疾苦來告者絡繹不絕

先是首都革命時張繼劉守中皆在北京預其謀至是偕同來汴景翼乃更延致南北黨國各先進如于右任李根源柏文蔚鈕永建張翹初諸先生至開封隆以厚禮又與胡展堂李協和梁任公諸先生信使往來虛衷請益而各省軍政當局亦均分遣代表來豫接洽歐美人士之旅中國者亦時有人特來參觀賓從既衆乃紛設招待處數所以處之第一招待處招待外賓及黨國要人第二招待處招待各省代表第三招待處招待軍政兩界名流第四招待處招待各縣民衆代表先是孫公中山北上時景翼即派寇勝浮爲代表至天津候迎進謁時即見孫公偶爾以手撫胸微作蹙眉狀寇致問勞後孫公曰爲我語胡君余稍憩數日所事妥帖尙欲一至開封與胡君面談也語訖即退他代表皆辭謝至三月十二日孫公竟以疾革逝世景翼派人照料喪事並爲發喪舉哀三日因念革命前途渺茫後死者責無旁貸益復發奮欲有所爲而豫西之戰事忽起

愍玉琨者初爲劉鎮華之鎮嵩軍第三路統領十一年後奉吳佩孚調令駐豫西陝

靈一帶剿匪因改編爲中央陸軍第三十五師國民軍革命首都吳佩孚兵敗南遁之際  
愍卽向吳倒戈進佔洛陽欲乘機攫取河南地盤率部進據鄭州派兵守黃河鉄橋阻國  
民軍南下及聞胡景翼督豫之命又以胡部馮統東自關內東開至華陰以劉鎮華電召  
回師潼關擊敗統東軍復歸洛陽而景翼已入開封則大憤乃據豫西揚言伊對國民軍  
有功欲劃豫西與景翼分疆而治景翼派人與劉鎮華議使調愍軍回陝而已則盡調渭  
北各部出關交換防地使豫人治陝陝人治豫化除地域自私之習藉收互相砥礪之功  
蓋以陝豫兩省毗隣山川風土軍事地理以及社會經濟各種條件均應密切關聯不可  
使有隔閡之見也馮玉祥亦派人爲之調停劉意認可而愍不從派兵據鞏縣兵工廠布  
置防線作頑強堅決之表示景翼不得已乃與戰愍恃劉爲後援劉尙審度猶豫愍以電  
話促之言詞忿激至於大罵劉乃盡率所部東行而以電告執政府自稱出關巡視前方  
以陝西督篆託吳新田代爲照料吳新田者亦直軍師長初隨閻相文入關率部駐防陝  
南者也景翼見調停無效戰機已發乃親至鄭州督師兩軍戰線在汜水棗陽之間胡部  
岳維峻李雲龍鄧寶珊弓富魁等各率部當敵之正面鄭州警備司令楊瑞軒率輕騎間  
道疾馳側出敵之後方至偃師襲據隴海路車站毀其鉄道敵軍自後方增援之列車盡

覆瑞軒伏兵突出擊之獲其軍械輜重前線之敵復經岳李各軍之猛烈攻擊潰退劉鎮華猶派援扼守黑石關顧人徒既衆運輸匆促兵站擁塞給養不均其中一部有譁變者遂大敗劉急渡河入山西愁亦棄洛陽退歸嵩縣發狂疾死豫西戰事乃告結束景翼令李雲龍部駐陝州靈寶不得擅出豫境故潼關仍爲劉鎮華之殘部駐防

豫西既定景翼即回開封籌善後分途派人慰問民商辦理振濟撫安流亡收編潰散忽右臂生惡疔延醫割治數次然猶譙勞諸將督飭政事晨夕不輟僚屬有勸其休養者景翼曰革命軍人死且不惜微疾何足介意乎由是疔毒內潰竟至不起乃電執政府謂豫局雖定隱患猶伏請以岳維峻暫代已任藉完未竟之責遂於四月十日逝世去孫公中山逝世之日尙未及一月也

岳維峻繼任河南軍務督辦諸事一秉景翼成規派兵剿豫東流氓平之又以關中乃國民軍發源地而吳新田爲北洋軍閥殘餘勢力且於劉鎮華離陝時曾保護其後路與涇原各部隊戰於渭南因商諸馮玉祥擬以孫岳督陝使李雲龍副之是年七月李雲龍率部西進令其旅長丁增華爲前衛師抵潼關以計賺城入收編守關鎮嵩軍之殘部進攻二華渭南勢如破竹前行至臨潼新豐吳新田竭全力抵抗雲龍旅長赤炳文指揮

前軍激戰數日不勝雲龍親身督戰渭北各部又出兵助之敵遂大潰吳新田棄城西竄當是時楊虎城已受國民三軍編制率部由榆林南下至渭北與雲龍會師合擊吳新田部吳退入南山其衆王鴻恩鄧全發何毓斌悉以所部降駐同州之麻振武昔隸靖國軍第一路郭堅郭死後改隸劉鎮華至是亦爲雲龍收編仍使駐原防段政府乃任命孫岳督辦陝西軍務李雲龍爲幫辦劉治洲爲省長先後來陝就職而陝局亦暫定

當曹吳既敗段祺瑞被擁執政後奉系軍閥即乘機伸展其勢力於直魯蘇皖各省且與日本帝國主義勾結青島上海兩處遂有五二九及五卅空前未有之慘案連續發生直系浙督孫傳芳以奉軍違反淞滬不駐兵之議爲口實出兵進攻蘇皖蘇皖奉軍撤退山東境內十一月中旬岳維峻與孫傳芳會於徐州議攻魯維峻自允擔任徐州以北軍事又天津會議時京漢路劃歸國民軍負責保護國民三軍原駐保定大名奉系李景林督直後迫之使人豫隔斷國民一軍與二軍南北間之聯絡至此乃以索回保定大實行諾言爲詞命鄧寶珊爲總指揮率師沿京漢線北上鄧部旅長劉繼邦任前衛至保定之于家莊即電知駐保定之東北軍第一師高某請其退出高親至與接洽約以五日後讓防劉不允當晚率兵一營進至保定西門揚言不讓防即攻城李景林迫於前議乃令所

部退出鄧軍遂進駐保定其後又與國民一三兩軍大敗李景林之兵於天津段政府因調孫岳督直而以李雲龍繼任陝督以鄧寶珊爲直省軍務幫辦

當是時北方各派議員高唱恢復法統之說護法護憲議論紛紜段祺瑞則以國民代表會議爲抵制國民二軍將領鄧寶珊史宗法等反對之主張召開國民會議組織國民政府發出通電兩次其第一電文云

民衆病軍閥之禍國久矣去年本軍班師其目的即在消滅軍閥亂國之大患首以武力歸之國民開一武力與民衆結合之新紀元不料反動軍閥張作霖與其黨羽李景林張宗昌等乘機而起伸張其一系之勢力由北而南淫威所屆凡反抗帝國主義之民衆非慘罹屠殺即痛遭禁錮所有士農工商各團體非封即禁無一倖免以故民衆憤怒之所鬱結遂爆發而爲反奉之戰爭寶珊等誓與民衆效命掃蕩殘賊今者奉命北向直搗津魯驅彼兇頑救民水火茲特鄭重宣言此戰之目的不僅在顛覆張作霖等之個人勢位而在根本廓清軍權交還與民衆自由行使否則一軍閥仆一軍閥來則一年一戰之結果不過以人民之痛苦流離兵士之斷頭流血反復迴演爭權之慘劇無已非本軍爲自由而戰之意義也現在全國人民之希望與要求在依政治

革命以結束反復迴演之戰禍其實現革命之程序在依民衆本身之勢力建立一臨時革命之政治組織解放人民之集會結社言論出版之自由保障人民生命財產之安寧召集真正代表民衆之國民會議組織國民政府對內謀全國之統一對外謀國際之平等寶珊等認此主張爲救國之不二法門決以武力擁護之與民衆爲友者卽本軍之友與民衆爲敵者卽本軍之敵天日可移此志不渝云云

## 其第二電文云

寶珊等損甲荷戈數載於茲非有爭城略地之心尤以越職干政爲戒惟念軍人對於國內戰爭非認定組織國家之目標與解決政治之途徑將使生者相尋於私鬪死者見擯於國殤長此喋血犧牲無從得其代價言念前途浩嘆曷勝前曾聯電縷陳計荷賜察比者事機益迫來日大難國事一日不定軍人之職責一日不完用敢申述前議加以概括揭爲二事貢諸國人其一爲國法問題論者以國亂頻仍由於無法以恢復法統之主張而起囂然寶珊等對於此義不無疑問無論法之本身支離破碎久已自亂其統無法收拾卽令乞靈蜀狗存朔餽羊而此項主張出自軍閥議員何異口銜大憲朕卽國家矯誣民意莫此爲甚日來無恥政客匍匐軍閥之前以法爲市對甲



言約對乙言憲朝如可復夕即可毀名爲恢復法統實則兒戲大法寶珊等敢以國民資格敬告全國父老若由軍閥政客之手恢復法統吾儕國民誓不承認吾人愛國尤甚於愛法重法必先以重民關於法統之各問題應付諸國民會議以求最後之分判舍此實無何人具恢復法統之職權與資格至於國民會議之組織及召集各方式宜以中山先生之國民大會宣言爲根據段氏之欽定條例與各省區長官委派代表辦法應一併取消庶足以表示大公而得其真正民意之所在其二爲政府問題寶珊等以組織國民政府爲澈底改造政局之辦法已如前電所述在國民政府未成立期內應由現政府維持現狀對外謀法權稅權根本解決對內與長江西南協定大計寶珊等爲國家全局起見絕無黨派及任何關係論者或以現政府由段氏命令所產生對於段之去留與閣員之進退均多疑問此則不然段氏失政釀亂禍國殃民於國爲罪人於民爲公敵彼之任命閣員本爲交出政權束身待罪之地宣言俱在口血未寒爲去爲留均其個人私計無足論列亦無待猶豫彼既不能因閣制之成立而始留又安能因他方之表示而始去國家之禍亂已極矣陰謀操縱誰爲厲階海內賢豪當爲國家計安危不當爲獨夫計利害事至今日惟有一致努力自效於國民之前豈容託命

於元惡大憝之下此則國人所應自決者也以上所陳並關大計寶珊等內迫熱誠不敢有所顧忌深冀邦人君子加以省覽共襄國是尤盼現政府與段氏爲人格自愛計當機立斷毋長亂速亂以重國民之怨云云

此電發出時岳維峻已出兵山東命李紀才爲東路總指揮由蘭封攻曹州取道濟寧兗州泰安以攻濟南弓富魁爲北路總指揮由保定大名攻德州以拊濟南之背會奉軍師長郭松齡向張作霖倒戈進兵奉天約國民一軍爲之援而李景林阻之於是有天津之戰鄧寶珊率兵攻天津下之李景林出走既而張作霖得日本兵之助郭松齡失敗張作霖復引日本兵艦威脅天津國民一三軍撤退北京二軍攻魯之師北路已佔德州東路已抵泰安旋以前方將帥意見不合降將田維勤靳雲鶚等叛變全師潰退吳佩孚乘機復起使其將寇英傑攻信陽國民二軍師長蔣世傑堅守四十餘日維峻調兵往援爲當地紅槍會所扼及田靳反戈逼開封維峻遂退鄭州又退陝州劉鎮華率其殘卒塞嶠函維峻不得西因單身渡河爲晉軍拘留所部盡散皆十五年一月以後事自首都革命後西北革命勢力驟形發展軍兵由一萬增至二十餘萬至是遂復挫敗國民一三兩軍亦旋受奉軍之壓迫自北京撤退南口轉至綏遠包頭一帶其詳情具見馮玉祥所著

西北革命史徵稿 上卷

國民革命軍紀事中可以參攷茲編避繁不贅述

一九四

# 圍城紀事

## (一) 西安之圍

十五年春劉鎮華既蹙國民二軍於崤陝之間二軍諸將與戰不勝皆棄師微服間道脫走劉更煽起豫西各地紅槍會沿途截阻凡操秦語者多被殺害其非陝籍部伍悉爲劉脅降收編旬月之間其勢復振乃南通款於吳佩孚北與晉督閻錫山勾結閻並助以太原兵工廠所造之大砲多門三月初劉遂率其所部十餘萬衆大舉西犯

當豫東戰事吃緊時陝西軍務督辦李雲龍奉岳維峻電令率其全部精銳赴豫增援僅留郭秉誠一旅宋錫侯一團駐守潼關及劉衆西來而去歲曾受雲龍編制仍駐同州之麻振武卽復叛與劉合潼關守軍至是處於兩面受敵之中且無後援被迫撤退劉衆遂長驅入潼關矣

四月十四日敵先頭大部侵及臨潼省城危急財政廳長朱子敏星夜赴三原與國民二三兩軍將領田玉潔鄧寶珊楊虎城等開軍事緊急會議請楊助守西安先是楊在西路岐鳳一帶與直軍吳新田及隴南鎮守使孔繁錦各部相持數月及聞二軍敗於豫

西乃引兵還三原鞏固渭北防務至是見敵兵已逼省城卽從衆議命其所部姬旅卽日開入西安協防留其第一旅旅長李子高與二軍田部防守三原楊本人悉率大部星夜渡渭增援西安

四月十六日楊部第六旅旅長馮欽哉部隊甫入西安北門適敵大隊已迫及近郊韓森塚八福莊三伏灣各處李雲龍部之在城外佈防者悉被敵軍壓迫退入城內欽哉卽與姬旅長匯伯各率騎兵一連同出東關與敵搏戰數小時後來大隊旋亦趕到增援敵始少卻乃命各部擇要扼守馮入城晤李督辦共議攻守之策

四月十七日敵軍漸向城南北兩面移動向我取包圍之勢

十八日楊師長虎城入西安以敵勢方張因令各部就城外各要隘及四城各處增築戰壕暫作堅守之計

劉鎮華此次西來初意國民二軍大敗之餘西安守兵無幾滿可一鼓而下及楊師入城城防轉堅連日屢以重兵攻城皆不得逞顧劉長陝久熟悉城內情形居民素不積粟平時三日外若無食糧進城人心卽生恐慌同時有知陝軍内幕者以李楊有二三軍之別平時主張本不一致一日食糧告罄又無外援內訌必起因獻四面合圍之計欲曠

日持久以困之三個月後必可得志劉亦以爲然遂於五月十五日派兵將城之四面一併包圍自此以後西安遂處於四面圍困之中與外縣各軍彼此不通矣

是時在西安城內者有李雲龍楊虎城及衛定一三部因開軍事聯合會議決定防守計劃公推李爲總司令楊副之於五月二十日宣佈就職並設西安城防司令部及軍警聯合處並佈置四城防務如下

一、楊虎城部 國民三軍第三師

二、李雲龍部 國民二軍第十師

三、衛定一部 陝西陸軍第四師

甲、東城及東關

一、國民三軍第三師第六旅旅長兼第十一團團長馮欽哉

二、國民三軍第三師第六旅第十一團一營營長王集生

三、國民三軍第三師第六旅第十一團二營營長曹國華

四、國民三軍第三師第六旅第十一團三營營長王勤軒

五、國民三軍第三師第一游擊支隊司令黑憲章

六、國民三軍第三師第一游擊支隊一營營長呼延立人

七、國民三軍第三師第一游擊支隊二營營長白德明

八、國民三軍第三師第一游擊支隊三營營長薛光漢

乙、北城及北關

一、國民三軍第三師補充第一旅旅長兼第一團團長姬匯伯

二、國民三軍第三師第五旅第九團團長張自強

三、國民三軍第三師第二游擊支隊司令孫蔚如

四、國民三軍第三師第二游擊支隊一營營長仲興哉

五、國民三軍第三師第二游擊支隊二營營長趙壽珊

六、國民三軍第三師第二游擊支隊三營營長任子傑

七、國民三軍第三師第五旅第九團一營營長杜葆田

八、國民三軍第三師第五旅第九團二營營長馮義安

九、國民三軍第三師第五旅第九團三營營長劉天佑

十、國民三軍第三師補充第一旅一團一營營長韓世本

- 十一、國民三軍第三師補充第一旅一團二營營長党澄清
- 十二、國民三軍第三師補充第一旅一團三營營長姬雲山
- 十三、國民三軍第三師補充第一旅補充營營長母百堂

丙、西城及西關

- 一、陝西陸軍第四師第一團團長沈仲斐
- 二、陝西陸軍第四師補充團團長逵松山

丁、南城及南關

- 一、國民二軍第四混成旅旅長劉文伯
- 二、國民二軍第十師第一團團長宋錫侯
- 三、國民二軍第十師第二團團長王子茂
- 四、國民二軍第十師第三團團長李定五
- 五、國民二軍第十師騎兵團團長韓子祥

戊、城內

- 一、國民二軍第十師衛隊團團長兼西安城防司令史 鑄



副 司 令董瑞生

二、西安軍警聯合處處長丁增華

三、國民三軍第三師衛隊營營長孫友仁

四、國民三軍第三師騎兵營營長李傑三

五、國民二軍第十師衛隊營營長張兩銘

五月二十五日敵以大砲二十餘門分攻東北兩關激戰約五小時卒不得逞死傷甚衆退去

六月八日敵由東關東北角暗挖地道數處用棺木滿裝火藥於是晚約二點鐘時燃發轟倒城牆三四丈繼以大部兵力襲城我官兵拚死抵禦激戰至三小時之久至拂曉斃敵官兵數百人獲長短槍數十支紅槍會符號無數敵不支始退我方亦傷亡官兵十餘員名

十五日敵以大兵佔領小雁塔我軍以其地爲南關咽喉關係重要決議奪回二軍派兵兩營三軍派兵一營由姬旅長匯伯指揮進攻馮旅長欽哉於南城上指揮砲兵向敵射擊並派騎兵一連由南關稍門出向敵側方包抄連戰四晝夜小雁塔失而復得者

五次最後至十八日我軍冒雨衝鋒卒將小雁塔奪回是役雙方傷亡均甚慘重

二十二日城內各將領決議出擊北關以外之敵以通糧道藉與北路三原聯絡並護送百姓出城逃避以姬旅長匯伯爲總指揮率步兵一營騎兵一連担任右翼張自強率兵一營担任左翼第六旅抽步兵一營騎兵一連大炮兩門擔任正面自上午十二時下令總攻作戰竟夜丁增華另率兵一團攻大白楊寨及大塚下之正面敵軍踏敵人戰壕兩道未幾天明大雨如注敵增加大部生力軍反攻均經我軍擊退遂相持於紅廟坡一帶凡二十餘日終未能將北路打通

二十七日敵以大部精銳攻我西關楊師長虎城命馮欽哉爲總指揮率抽編之各部隊出西門迎擊丁增華任正面曹國華爲左翼騎兵連爲預備隊均向敵猛烈進攻已佔領大營盤之兵站卒以子彈缺乏並爲敵之深溝所阻致西路亦未能打通

七月四日敵窺我軍出西關攻擊東關守兵薄弱遂集其野炮二十門重炮山炮步兵炮不計其數突向東關猛烈進攻轟倒城上女牆數十丈隨以大部精銳撲城我守軍沈着應戰前在西關之部隊亦卽抽回由馮欽哉率領登城助戰射殺敵炮兵指揮官一員經半日之久敵始退却

二十二日晨敵復猛攻東北城集中大炮十多門壓迫城上守兵一面以敢死隊架雲梯登城梯上各懸白布賞牌編有號數由敵師長柴雲陞署名蓋章並印關防書明第幾號梯第一名賞洋一千元第二名賞洋八百元第三名賞洋伍百元一面在護城壕水內鑿涵洞掘地道架橋梁輸送援兵直薄城下城上守軍楊部第二游擊支隊司令孫蔚如督率所部倉卒應戰以手溜彈大刀與敵肉搏東北角守兵隊長雒竹馨左腿受重傷猶指揮兵士增守城缺不肯退姬旅長匯伯時在總部聞警急率衛士數人乘汽車運炸彈趕往應援血戰竟日敵死傷甚衆然猶頑強抵抗於護城壕中不退楊部營長孫友仁母百堂率兵由北城壕內向東攻擊營長王集生薛光漢率兵由東城壕內向北攻擊始於下午五時將壕內之敵殲滅奪獲槍彈雲梯甚夥是役我軍陣亡參謀王俊生及官長數員傷亡士兵數十名孫司令蔚如足部亦受傷

先是敵兵合圍後卽於東關外之先農壇內構築砲壘經我城上守兵射擊久不能成乃改用棉花包以水浸之利用黑夜加緊築修壘成置大砲機關槍其上向我守軍射擊東郭門爲敵砲彈所燬敵並以大部生力軍向我猛撲近城數次均經我軍擊退三十日復逼城下與我軍對擊均不得逞未幾天亮有殘敵約一營之衆因我砲火稠密未能

退去我方派王營長集生帶精兵一營由東關北稍門遶出圍殲之斃敵百餘獲槍數十支而歸

九月二十六日敵忽以飛機兩架繞城飛翔散布傳單廣造謠言煽惑人心謂投降者賞以高官厚祿助守者城破之日雞犬不留並有如以楊虎城李雲龍馮欽哉諸人之首來降者酬以十萬元五萬元之語城內士兵皆一笑置之敵見誘嚇無效益於城之四週廣築長堤掘成寬深各兩丈餘之長壕外築圍牆以爲死困之計自此以後卽百姓亦不復能出入矣

西安平時居民約十餘萬自城圍合後李楊衛三部官兵公同核定共計九千餘人馬一千二百餘匹當時設置總糧台調查儲糧統籌分配約敷五個月之用詎意敵兵初至時城外附近居民倉皇逃難避入城中者不下十萬餘人總部初設收容所及粥廠計口授食耗糧甚鉅以致未屆秩令糧已告竭自七月初間士兵食糧卽以隔年糜穀蕎麥包谷豌豆黃豆綠豆各雜糧混合磨成麵粉搭發小麥不及十成之二三八月以後復於發給麵饅時每官兵減去二兩極力撙節兵士營養不足沿街捉野狗殺而食之李楊二公殺馬饗軍激勵將士而同時燃料亦無來源多年老樹均被砍伐代薪破屋拆除更無

論已居民初皆雜食麥麸及麥麸不可得則食油渣野菜草根樹皮甚至牛皮鞋底皆食而食之甘草紅糖藥材之類則爲商人之最高食品一般窮民更不得入口民間有預藏麥米少許者每斗價值百五十餘元青菜如蘿蔔之類每個售錢千五六百文因之七月以後難民卽有餓斃者慈善機關初猶竭力救濟及時已久亦皆籌措無術坐視其救九月十月之交因絕食而死者日益多舊家宦裔公教人員不但米麥毫無卽求麥麸亦不可得貧人爲減口計不惜以愛女與人換糧數升暫度朝夕曾有二八女郎沿街高叫有與一碗麵之值者卽從之爲妻妾不計入冬以後到處餓殍觸目無人收埋圍解後軍政當局於革命公園掩埋枯骨數萬具官兵負土爲墳合成東西兩大塚其中兵士十之二三人民蓋十之八九也

## (二) 三原之圍

十五年春國民二軍第三師師長田玉潔自河南甫返三原留原部隊僅有王紹猷旅兩團槍不滿千聞劉鎮華軍入潼關卽調赴相橋一帶佈防南與交口兩金甄上仁部北與關山下邽小石各留守殘部遙相聯絡保障渭北富平高陵各縣爲三原之外圍而同州之麻振武向附屬鎮嵩軍李雲龍督陝後與關內各部同時受編是時復叛與劉合

劉使其師長梅發魁爲北路總指揮自渭南渡河以窺三原麻振武率部助之自號一師六混成旅同時西向與王部在田市小石擊戰竟日王以不利退守黑策橋此時田玉潔親來指揮調馮華堂駐櫟陽王玉柱駐大程鎮張九才駐福音村太和村弼田王一帶與敵相持者百餘日激戰數十次及劉屢攻西安不利轉欲先取涇原以絕省城之外援遂益以王老五之部衆攜帶晉閩所助之重砲若干門與梅麻兩部同時進攻櫟陽馮華堂部兵單不能守禦退卻敵遂由櫟陽長驅西進我軍之在黑策橋者受其側面威脅奉命退回三原保守城池甄士仁部孤守交雨聯絡斷絕因亦西撤六月二十六日敵軍遂至三原城下

是時三原我軍以楊虎城部李于高旅駐北城田部分布南城外林李河漕各堡及英華醫院南關外之大營盤甄士仁守西城並調駐乾縣丑秀珊旅張祥生一營來原佈置城防同取守勢敵以大砲日夜轟擊駐鳳翔之党玉琨及李雲龍部李鴻林亦各率一團先後由咸陽來援分駐涇陽塔及城西南之秦家堡一帶軍勢復振方議反攻而咸陽戰事復吃緊党玉琨部及李鴻林奉調往援玉琨親帶衛隊一連助守三原敵攻益急

七月二十五日敵陷秦家堡及申家堡三原西面遂被包圍

八月五日以後城東南之河漕堡及城西之空城堡城東之林李堡均先後爲敵所攻佔我軍仍固守南營盤英華醫院南稍門及東義園等處日夜以手榴彈炸彈與敵相對擲擊或短兵搏戰守陣兵士並以火藥包投擲敵不能近城但以大炮轟擊炮彈落於東西兩關者極多我軍炮隊亦自東關大操場架炮描準林李堡之敵連番轟射中敵臨時司令部及城樓敵潛伏不敢動

先是八月初旬麻振武率部攻富平駐富平國民二軍第六師師長馮子明在外未歸軍中無主其參謀王季常自稱留守與衆不諧至是王以麻軍勢大派人與之言和以大軍不入城爲條件麻乃留其團長姜福壽以一營進駐連城自率大部趨三原駐瓦窰頭樓底五官坊西陽鎮一帶時向三原北城進攻北門外之三里店數被威脅三原至是亦處四面包圍之中

當是時三原城內有二軍田玉潔指揮三軍李子高及姚振乾甄士仁各部軍需匱竭朱子敏以私人名義担保籌借商款數萬元分餉各軍合力守禦某日敵軍某旅長化裝鄉人賣菜者挑担入城覘視竟日出而告其曹曰城內人心鎮定市面秩序平靜如常此城未易得也未幾而蒲城駐軍緱保傑爲其部下團長緱天相鄭百川等所殺舉旗反

正馳書三原遙爲聲援各軍聞之守志益堅保傑者李天佐之舊部也自陳樹藩敗後卽投劉鎮華李雲龍入關後隨衆受編此次劉軍圍西安保傑復與麻振武勾結響應劉軍然部下皆陝人惡其反覆親敵不顧桑梓天相等遂因衆怨而殺之並與白水高峻部聯合揚言將攻同州以覆麻軍老巢時高已佔領郃陽麻振武聞訊因稍鬆三原北面之圍向東撤退而三原南面之敵猶在西關外之桑園潛掘地道企圖轟城未及城下而止

十月初國民一軍自甘肅來援前鋒至興平劉鎮華急集中兵力謀與抗乃先檄撤三原之圍東退以保後路十月十二日三原解嚴未幾于公右任自俄經內蒙繞道甘省至三原成立二三聯軍臨時總司令部

### (三) 解圍情形

當西安合圍之前數日衛定一命其參謀長楊文軒馳赴西路各縣悉調陝軍駐鳳翔醴泉之党玉琨駐武功之党海樓駐岐山之王寶發駐興平之陳發榮各旅暨駐屋之姜宏模旅同來援省期與城內取得聯絡及各部陸續東來而城圍已合敵且以兵攻咸陽咸陽守軍不及千人防禦幾不能支急使人赴興平求援楊王姜党等共開會議公推王寶發部馳入咸陽城防始固旋議先解省西之圍以通糧道分兵三路渡河陳發榮



部任左翼首先進發至未央宮省城在望姜宏模部任右翼進至三橋其餘各部爲中路佈置未定敵忽以步騎砲數旅以上之衆自大白楊村分三面來攻我軍各部子彈向均不充姜陳兩部隊遂爲敵軍壓迫退過渭北與敵隔河相持兩月之久屢有攻戰均無大勝嗣聞三原被圍黨海樓陳發榮兩部仍返興武原防王寶發以一旅之衆堅守咸陽數月敵屢以大兵來攻砲火轟擊戰事之烈亦復不亞西安云

八月初姜陳諸部復議二次解圍此次不由正面攻擊採取迂迴戰略姜部由興平渡河經鄠縣以東繞至省西南之居安坊杜城一帶陳部兩團繼進至宜井梁家橋一帶均被敵軍阻止未能再進但由此牽制敵人一部兵力使其不能以全力攻咸陽亦勝算也

先是本年二月國民一軍軍長馮玉祥因受奉軍壓迫棄軍赴俄留學四月中旬一軍統帥張之江鹿鐘麟等率全部自北京撤退居庸關一帶五月與直奉各軍大戰於南口不勝時有國民二軍前駐河北之部隊史可軒賈玉齋馬子和三團因與豫中各部失其聯絡乃受二軍叛將被吳佩孚所編之田毅民改編因毅民亦爲同鄉故也收編後旋奉命開駐懷來一帶協同奉軍進攻國民一軍爲前鋒軍實補充復斬不與又屢乏食賈

馬等乃使人與國民一軍主事者議圖反正事爲毅民所聞欲收其槍已剋期矣賈馬等卽復揭國民二軍舊幟倒戈與抗毅民軍不敢逼相持二十餘日國民一軍乃得自南口陣地從容撤退至張家口綏遠一帶賈馬各團亦自他道經綏遠至榆林越數千里南返渭北是時馮玉祥在俄都莫斯科經人介紹加入國民黨受任爲國民政府委員及軍事委員會委員而于公右任亦於夏間至莫斯科與馮晤商決定援陝及參加國民政府北伐大計八月中旬于馮相偕返國是時國民一軍已全部退至綏西包頭五原一帶聯合寧夏回軍馬鴻逵部與在蘭州主席劉郁芬所統帥之國民一軍各部隊遙爲聲援派兵肅清隴東鎮守使張兆鉀及隴南鎮守使孔繁錦各部奠定甘肅

九月十五日于馮歸抵五原各部公推馮爲國民聯軍總司令並率全軍入黨發表宣言十七日在五原誓師是時一軍師長孫良誠已由固原東下進駐平涼三原方面推鄧寶珊李可亭爲代表馳赴平涼求援而姜宏模楊文軒等亦代表省方至平涼協議多日始行決定以孫良誠爲援陝總指揮率同孫連仲吉鴻昌馬鴻逵等各部合計四師六混成旅由姜宏模作前導沿邠長南下十月初旬前鋒遂進至興平

十月中旬援軍進至咸陽與敵戰於距城四十里之猴兒寨三橋之間敵猶集中兵

力頑強死抗血戰四十餘日不決最後以奇兵繞南山抄敵省東後路敵軍團長李某在城南者響應我軍城內守軍知援軍已到亦派兵出南城衝擊二十七日東南西北兩面戰爭均極激烈入夜敵始撤圍狼狽東竄

十一月二十八日西安圍解

十六年二月馮玉祥由甘入陝至西安統編各軍爲國民聯軍以李雲龍部爲第八路楊虎城部爲第十路田玉潔部爲第十一路衛定一部爲第十二路推于公右任爲國民聯軍駐陝總司令以前一二三軍名義完全取消

是年三月岳維峻亦自山西歸陝就其留陝舊部丑秀珊一旅擴編爲國民聯軍南路軍由商維出師參加北伐

是年六月國民政府出師大舉北伐復改國民聯軍爲國民革命軍第二集團軍由馮玉祥率領東進第十路楊虎城部隨之出關

七月國民革命軍既會師於中原北伐告成于公右任先已於四月間解除駐陝國民聯軍總司令職南赴武漢參加組織國民政府西北軍政大權遂歸馮部諸將掌握自後宋哲元繼石敬亭爲陝省主席陝軍舊部如田玉潔李雲龍党玉琨馮子明高

峨等兩年之中次第均被消滅及國民政府奠都南京全國政治已步入於一個新的階段而西北自辛亥以來歷經培養長成之革命勢力不得不應時代之要求作一結束所餘者獨岳維峻之南路軍與楊虎城之第十路因參與北伐有功屢經改編番號受命中央爲國軍云